

SAMOA

Faatulagaina o Aiaiga

VAEGA I FAATOMUAGA

1. Igoa puupuu ma le amataga
2. Faamatalaina o uiga o upu
3. Faasilasilaga faalauaitetele
4. Suega i le tulaga e mafai ai ona totogi aitalafu
5. Tulafono e noatia ai le Malo

VAEGA II TUUFAATASIA FAALETULAFONO MA IGOA

6. Tusi talosaga mo le tuufaatasia faaletulafono
7. Tusi faamaonia o le tuufaatasia faaletulafono
8. Taunuuga o le tuufaatasia faaletulafono
9. Faamauina e avea ai o se kamupani tumaoti po o se kamupani a le Malo
10. Igoa o le kamupani
11. Suiga o le igoa
12. Faatonuga e suia ai le igoa
13. Faaaogaina o le igoa o le kamupani

VAEGA III MATAUPU O FAAVAE A LE KAMUPANI I LE TUUFAA- TASIA FAALETULAFONO

14. Faaaogaina ma le suia o Mataupu o Faavae a le kamupani
15. Mataupu o Faavae a le kamupani ua fai ma taiala
16. Faasologa o Mataupu ma le taunuuga o Mataupu o Faavae a le kamupani

VAEGA IV SEA

17. Aia tatau ma pule e fesootai i sea
18. E le tatau i sea ona faaee atu noataga i le na te umia sea
19. Tuuina atu o sea amata
20. Tuuina atu o isi sea
21. Taimi o le tuuina atu o sea
22. Faasaina faasoasoaga o tupe vagana ua faamalieina le suega i le tulaga e mafai ai ona totogi aitalafu
23. Toe faaolaina o faasoasoaga le talafeagai
24. Tufatufaga

25. E mafai e le kamupani ona maua ana lava sea
26. Faaleaogaina o sea ua maua e le kamupani
27. Faamamaluina o konekarate e toe faatau mai ai sea
28. O sea e mafai ona toe faaola mai
29. Faaolaina mai o sea e mafai ona toe faaola mai
30. Fesoasoani tau tupe
31. Sea umia faatasi
32. Faaliliuina atu o sea
33. Faaliliuina atu o sea e ala i le faatinoga o le Tulafono
34. Ia tausia e le kamupani se tusi resitala o sea
35. Tusi resitala o sea e aveva ma molimau i agavaa faaletulafono
36. Pule a le Faamasinoga e faasao ai le tusi resitala o sea
37. Meatotino ua tausia faa mavaega e le tatau ona faaulufaleina i totonu o le tusi resitala
38. Faamauina o sui tau i le tagata lava ia po o tagata e faaliliu i ai meatotino o le gaumativa
39. Tusi faamaonia o sea
40. Natura faaletulafono o sea
41. Leai ni tau aoga itiiti o sea
42. Aofaiga aupito maualalo o sea

**VAEGA V
TAGATA E UMIA SEA MA A
LATOU AIA TATAU MA
NOATIAGA**

43. Noataga a tagata e umia sea
44. Faaiuga e tatau ona faia e tagata e umia sea
45. Faaiuga e ono mafai ona faia e tagata e umia sea

46. Faamaoniga a tagata e umia sea i galuega faatino tetele
47. Faamaoniga autasi a tagata e umia sea
48. Iugafono tusitusia a tagata e umia sea
49. Fonotaga a tagata e umia sea
50. Suiga o aia tatau a tagata e umia sea
51. Toe faatauina mai o sea a le tagata ua auese ai
52. Lipoti faaletausaga i tagata e umia sea
53. Asiasia o faamaumauga a le kamupani e tagata e umia sea
54. Isi faamatalaga mo tagata e umia sea
55. Suesuega e faia i le talosaga a le tagata e umia sea
56. E tatau i kamupani taitasi uma ona i ai le le itiiti ifo i le toatasi le tagata e umia sea

**VAEGA VI
FAATONU MA O LATOU
PULE MA TIUTE**

57. Uiga o le "faatonu"
58. Pulega o le kamupani
59. Tiute faavae o faatonu
60. Tiute o faatonu i le tausisia o le Tulafono
61. Tiute o faatonu i le tausisia o Mataupu o Faavae a le kamupani
62. Aia a faatonu i galuega faatino a le kamupani
63. Faaaogaina ma le faalauiloaina atu o faamatalaga a le kamupani
64. Tulaga tumau o le tausia lelei o faatonu
65. Noatiaga o faatonu e fesootai ma le le mafai e le kamupani ona totogi aitalafu

66. Taunuuga o le faamaoniga autasi a tagata e umia sea i luga o ni tiute a faatonu
67. Agavaa o faatonu
68. Tofiga o faatonu
69. Faatonu ua faamutaina le umia o le tofi
70. Faasilasilaga o le suia o faatonu
71. Tagata ua fuafuaina e avea ma faatonu mo faamoemoega o noataga
72. Nisi faamagaloga ua faasaina
73. E mafai e le kamupani ona faamagalo pe inisiaua faatonu
74. Totogi o faatonu
75. Taualumaga a faatonu

**VAEGA VII
FAAMAMALUINA**

76. Poloaiga a le faamasinoga e manaomia ai le tausisia o le Tulafono ma Mataupu o Faavae a le kamupani
77. Gaoioiga e afua mai isi gaoioiga
78. Gaoioiga tau i le tagata lava ia e faia e tagata e umia sea e faasaga i le kamupani
79. Gaoioiga tau i le tagata lava ia e faia e tagata e umia sea e faasaga i faatonu
80. Gaoioiga i le avea ai ma sui
81. Tagata e umia sea ua aafia i faufauga le tonu
82. O ni faiga ua avea e faapea o ni faufauga le tonu
83. Suiga i Mataupu o Faavae a le kamupani e le Faamasinoga
84. Taunuuga o le fuaiupu tau i faiga e teuteu ai se finauga i le faaiuga a ni sui lautogia i totonu o Mataupu o Faavae a le kamupani

85. Tusi talosaga mo se faamama avega e faia e le Loia Sili

**VAEGA VIII
FAIGA MA ISI VAEGA**

86. Pule e noatia ai le kamupani
87. Loia
88. Tulaga e aloaia ai feuiaiga ma isi vaega
89. Manatu e mafai ona faia e isi vaega
90. Galuega faatino o lo o aafia ai faatonu
91. Galuega faatino ua ulufale i ai faatonu e solia ai ni tiute
92. Taunuuga o isi vaega
93. E mafai ona faamaonia konekarate e faia muamua ao lei tuufaatasia faaletulafono
94. Faamaoniga e faatatau i konekarate e faia muamua ao le i tuufaatasia faaletulafono
95. O le le mafai ona faamaonia

**VAEGA IX
FAAMAUMAUGA A LE
KAMUPANI**

96. Faamaumauga a kamupani
97. Faiga o faamaumauga
98. Isi nofoaga o faamaumauga
99. Asiasia o faamaumauga e faatonu
100. Asiasia o faamaumauga e tagata e umia sea
101. Asiasia o faamaumauga e tagata lautele
102. Ala e faia ai asiasiga o faamaumauga a le kamupani

**VAEGA X
PEPA ALOAIA E TATAU ONA
AUINA ATU I LE RESITARA**

103. Faamatalaga o tupe maua faaletausaga
 104. Isi pepa aloaia e ao ona auina atu i le Resitara

**VAEGA XI
 PEPA ALOAIA E AO ONA
 AUINA ATU I TAGATA E
 UMIA SEA**

105. Lipoti faaletausaga e auina atu i tagata e umia sea
 106. Isi pepa aloaia e ao ona auina atu i tagata e umia sea

**VAEGA XII
 OFISA FAAMAUINA**

107. Ofisa faamauina
 108. Suiga o le ofisa faamauina
 109. Manaoga e suia ai le ofisa faamauina

**VAEGA XIII
 TAUSIGA O TUSI MA LE
 SUEINA**

110. Faamaumauga o faamatalaga o tupe e ao ona tausia
 111. E ao ona saunia faamatalaga o tupe maua ma tupe alu
 112. Tofiga o le suetusi
 113. Agavaa o le suetusi
 114. Faamavaega a le suetusi po o le aveesea
 115. Ia aloese le suetusi mai aia feteenai
 116. Lipoti a le suetusi
 117. Avanoa i faamatalaga
 118. Auai o le suetusi i fonotaga a tagata e umia sea

**VAEGA XIV
 TUUFAATASIGA**

119. Tuufaatasiga

120. Faasilasilaga o so o se tuufaatasiga ua faatu mai
 121. Faamauina o le talosaga i le tuufaatasiga
 122. Tusi faamaonia o le tuufaatasiga
 123. Taunuuga o le tusi faamaonia o le tuufaatasiga
 124. Tusi Resitala
 125. Pule a le Faamasinoga e faasino i le tuufaatasiga

**VAEGA XV
 MALIEGA FETUUNAI MA
 TAGATA O NOFO AITALAFU
 AI LE KAMUPANI**

126. Faamatalaina o uiga o upu
 127. Talosaga mo le maliega fetuunai
 128. Faasilasilaga o le maliega fetuunai ua faatuina mai
 129. Taunuuga o le maliega fetuunai
 130. Eseelega o le maliega fetuunai
 131. Pule a le Faamasinoga
 132. Taunuuga o le maliega fetuunai i le faamaapeina o le kamupani
 133. Tau o le maliega fetuunai

**VAEGA XVI
 FAAMAONIGA O
 FAATULAGAGA MA ISI E LE
 FAAMASINOGA**

134. Faamatalaina o uiga o upu
 135. Faamaoniga o faatulagaga, tuufaatasiga ma maliega fetuunai
 136. E mafai e le Faamasinoga ona faia o poloaiga faaopoopo
 137. Faaaogaina o le fuaiupu 132.

**VAEGA XVII
AVEESEA MAI LE TUSI
RESITALA**

138. Aveesea mai le tusi resitala
139. Mafuaaga mo le aveesea mai le tusi resitala
140. Faasilasilaga o le faamoe-moe e aveesea ai pe afai ua faamuta le tauaveina o pisinisi e le kamupani
141. Faasilasilaga o le faamoemoe e aveesea ai i isi tulaga.
142. Tetee i le aveesea mai le tusi resitala
143. Tiute o le Resitara pe afai e mauaina se tetee
144. Pule a le Faamasinoga
145. Aveesea mai le tusi resitala o meatotino a le kamupani
146. Tuuese atu o meatotino e le Malo
147. Noataga o faatonu, tagata e umia sea, ma isi ia faamauina
148. Faamaapeina o le kamupani ua aveesea mai le tusi resitala a Samoa
149. E mafai e le Resitara ona toe faaofi le kamupani i le tusi resitala a Samoa
150. E mafai e le Faamasinoga ona toe faaofi le kamupani i le tusi resitala a Samoa
151. Toe faaofiga i le tusi resitala
152. Faaeina atu o meatotino i le kamupani

**VAEGA XVIII
KAMUPANI MAI FAFO**

153. Uiga o le “tauaveina pea o pisinisi”
154. Igoa e tatau ona tausisia ai le fuaiupu 10

155. Kamupani mai fafo ia faamauina i lalo o lenei Tulafono
156. Tulaga e aloaia ai galuega faatino e le o aafia
157. Tusi talosaga mo le faamauina
158. Faamauina o kamupani mai fafo
159. Faaaogaina o le igoa e le kamupani mai fafo
160. Isi faamatalaga e ao ona tuuina mai e kamupani mai fafo
161. Faamatalaga o tupe maua faaletausagea a le kamupani mai fafo
162. Kamupani mai fafo ua faamuta le tauaveina o pisinisi i totonu o Samoa
163. Faamaapeina o meatotino i totonu o Samoa
164. Loia a kamupani mai fafo.

**VAEGA XIX
FAALILIUINA ATU O LE
FAAMAUINA**

165. E mafai e kamupani mai fafo ona faamauina e pei o kamupani i lalo o lenei Tulafono
166. Tusi talosaga mo le faamauina
167. E tatau ona faatagaina kamupani mai fafo ina ia faamauina
168. Kamupani mai fafo e faapea e le mafai ona faamauina
169. Faamauina
170. Taunuuga o le faamauina
171. E mafai e kamupani ona faaliliu atu le tuufaatasia faaletulafono
172. Tusi talosaga e faaliliu atu ai le tuufaatasia faaletulafono

173. Faamaoniga a tagata e umia sea
 174. Ia tuuina atu e kamupani faasilasilaga faalauaitetele
 175. Kamupani e faapea e le mafai ona faaliliu atu le tuufaatasia faaletulafono
 176. Aveesea mai le tusi resitala
 177. Taunuuga o le aveesea mai le tusi resitala

**VAEGA XX
 TOE FAAMAUINA O
 KAMUPANI SA I LALO O LE
 TULAFONO O KAMUPANI
 1955**

178. Vaitaimi mo le toe faamauina
 179. Mataupu o Faavae a kamupani ua toe faamauina
 180. Pepa aloaia e ao ona failaina
 181. Taunuuga o le toe faamauina
 182. Noataga o kamupani ua toe faamauina mo aitalafu i lalo o le Tulafono 1955
 183. Le usitaia o le toe faamauina

**VAEGA XXI
 RESITARA**

184. Resitara ma Sui Resitara o Kamupani
 185. Tusi resitala
 186. Faamauina o pepa aloaia
 187. Pule a le Resitara e manaomia ai faamatalaga ma ata o pepa aloaia
 188. Asiasiga ma molimau a le tusi resitala
 189. Faasilasilaga e faia e le Resitara
 190. Pule a le Resitara i asiasiga
 191. Faalauiloaina atu o faamatalaga ma lipoti
 192. Talosaga toe iloilo mai faaiuga a le Resitara

193. Totogifuapauina

**VAEGA XXII
 SOLITULAFONO MA
 FAASALAGA**

194. Faasalaga mo le le usitaia o le Tulafono
 195. Faasalaga e mafai ona faaee atu i faatonu i mataupu tau i le tagata lava ia
 196. Puiipuiga mo faatonu
 197. Taualumaga mo solitulafono
 198. Faamatalaga tau faasee
 199. Faaaogaina faasolitulafono po o le faatamaia o meatotino a le kamupani
 200. Faaseeina o faamaumauga
 201. Tauaveina pea o pisinisi i ala faasolitulafono

**VAEGA XXIII
 FAASAINA MA LE FAALE-
 AOGAINA O FAATONU**

202. Tagata e faasaina mai le pulea o kamupani
 203. E mafai e le Faamasinoga ona faaleaogaina faatonu
 204. Faaleaogaina o tagata mai le puleaina o kamupani o i latou ia e i ai o latou sao i le gau o le kamupani
 205. Noataga mo le solia o fuaiupu 202 po o le 203 po o le 204.

**VAEGA XXIV
 MEA UA SOLOIA MA
 TEUTEUGA**

206. Soloia o le Tulafono o Kamupani 1955

**VAEGA XXV
 MEA ESEESE**

- | | |
|---|--|
| <p>207. Tufaina atu o pepa aloaia i kamupani i taualumaga faaletulafono</p> <p>208. Tufaina atu o isi pepa aloaia i kamupani</p> <p>209. Tufaina atu o pepa aloaia i kamupani mai fafo i taualumaga faaletulafono</p> <p>210. Tufaina atu o isi pepa aloaia i kamupani mai fafo</p> | <p>211. Tufaina atu o pepa aloaia i tagata e umia sea ma tagata o nofo aitalafu ai le kamupani</p> <p>212. Aiaiga faaopoopo e faasino i le tufatufaina atu</p> <p>213. Fesootaiga i tulaga aloaia</p> <p>214. Tulafono faatonutonu</p> |
|---|--|

Faamatalaga

2001, Nu. 6

O SE TULAFONO e tuuina atu mo le faatuina ma le puleaina o Kamupani i totonu o Samoa. [20 Iuni 2001]

UA FAIA e le Fono Aoaio Faitulafono o Samoa i totonu o le Palemene ua potopoto e faapea:-

**VAEGA I
FAATOMUAGA**

1. Igoa puupuu ma le amataga-(1) E mafai ona taua lenei Tulafono o le Tulafono o Kamupani 2001.

(2) O lenei Tulafono o le a amata faamamaluina i le aso e atofaina e le Minisita i se faasilasilaga e lomina i totonu o le Savali.

(3) E tatau i le Resitara ona tuuina atu se faasilasilaga faalauaitele i le aso o le a amata faamamalu ai le Tulafono.

2. Faamatalaina o uiga o upu-(1) I totonu o lenei Tulafono, ae vagana ai e ese se isi uiga e manaomia e le mataupu:

“Pule” o lona uiga o se tagata ua tofia e pulea mataupu tau i le kamupani i lalo o tulafono ua faavae ai se tulafono tau pulega saoloto e talafeagai i kamupani i totonu o Samoa:

“Mataupu o Faavae” o lona uiga o mataupu o faavae tau i le tuufaatasia faaletulafono o se kamupani:

“kamupani” o lona uiga o se kamupani ua tuufaatasia faaletulafono po o ua toe faamauina i lalo o lenei Tulafono:

“Faamasinoga” o lona uiga o le Faamasinoga Maualuga:

“Faatonu” ua i ai le uiga ua faatulagaina atu i le fuaiupu 57:

“Faasoasoaina o tupe”, e faasino i se faasoasoaga e faia e se kamupani i se tagata e umia sea, o lona uiga –

(a) O le faaliliuina atu o tupe i se ala tuusao po o le faaalatua po o meatotino, e ese mai ai i lo sea a le kamupani lava ia, i po o mo le faamanuiaina ai o le tagata e umia sea; po o

(b) Le faatulai mai o se aitalafu i po o mo le faamanuiaina ai o le tagata e umia sea -

e faasino i sea o lo o umia e lena tagata e umia sea, pe auala mai i se tufatufaga, o se faatauina mai, toe faaola mai po o nisi sea ua mauaina mai, o se faasoasoaga o tupe maua mai tulaga faaaitalafu po o nisi lava auala.

“Pepa Aloaia” o lona uiga o se pepa aloaia i so o se faiga, ma e aofia ai –

(a) So o se tusitusiga i luga o so o se auala;

(b) Faamatalaga ua pueina po o ua teuina i se laau pueleo, komipiuta, po o isi faiga, ma nisi faamatalaga ua maua mulimuli ane ai mai faamatalaga sa pueina po o sa teuina;

(c) O se tusi, kalafa po o se ata tusia;

(d) O se ata pue, ata tifaga, kopi o ata pue, lipine po o isi auala o lo o faaalitino ai le tasi po o le sili atu o ata vaai i lo latou tino mai ina ia mafai ai ona toe faia (i le i ai po o le aunoa ma le fesoasoani mai o meafaigaluega);

“kamupani o lo o i ai nei” o lona uiga o se faalapotopotoga ua faamauina faaletulafono po o ua avea e faapea o le a faamauina i lalo o le Vaega II po o le Vaega X o le Tulafono o Kamupani 1955, po o lalo o le Tulafono o Kamupani 1933, le Tulafono o Kamupani 1908, le Tulafono o Kamupani 1903, le Tulafono o Kamupani 1882 po o le Tulafono o Oloa Tuufaatasi a Kamupani 1860:

“Tagata e faamaapeina” o lona uiga o se tagata ua tofia e faafoea le faamaapeina o se kamupani i lalo o tulafono e pulea ai le faamaapeina po o le faamaapeina o kamupani i totonu o Samoa:

“galuega faatino tetele” ua i ai le uiga o lo o faatulaga atu i le fuaiupu 46(2):

“Mataupu o Faavae ua avea ma taiala” o lona uiga o mataupu o faavae a le kamupani ua avea ma taiala o le tuufaatasia faaletulafono ua faatulaga atu i totonu o Faamatalaga Muamua, Lua ma le Tolu:

“Minisita” o lona uiga o le Minisita o lo o nafa ma le Matagaluega o Faamasinoga:

”kamupani mai fafo” o lona uiga o se kamupani e faapea sa tuufaatasia faaletulafono i fafo atu o Samoa, e tusa lava pe sa faamauina i lalo o le Vaega XVIII pe leai:

“tusi resitala mai fafo” o lona uiga o le tusi resitala o lo o tausia e le Resitara i lalo o le fuaiupu 185(1)(b):

“faatonuina” o lona uiga ua faatonuina i totonu o tulafono faatonutonu ua faia i lalo o lenei Tulafono:

“kamupani tumaoti” o lona uiga o se kamupani ua faamauina e avea o se kamupani tumaoti i luga o le tusi resitala a Samoa:

“tausii tusii o tagata lautele: o lona uiga o se tausii tusii o tagata lautele o lo o aofia i totonu o le uiga o le Tulafono o Tausii Tusi o Tagata Lautele 1984:

“kamupani a le Malo” o lona uiga o se kamupani ua faamauina e avea o se kamupani a le Malo (mo tagata lautele) i luga o le tusi resitala a Samoa:

“tupe totogi o le faamauina” o lona uiga o se tupe totogi e tusa ai o meatotino a se kamupani ua faamauina i lalo o so o se Tulafono e ese mai ai i le Tulafono o le Faamauina o Fanua 1992/1993 o lo o aiaia ai le faamauina o tupe totogi po o isi aia tau i le malu puipuia:

“ofisa faamauina” e faasino i se kamupani ua i ai le uiga o lo o ua faatulaga atu i totonu o le fuaiupu 107:

“Resitara” o lona uiga o le Resitara o Kamupani ua tofia i lalo o le fuaiupu 184:

“Tusi Resitala a Samoa” o lona uiga o le tusi resitala o lo o tausia e le Resitara i lalo o le fuaiupu 185(1)(a):

“Failautusi” o le uiga o le Failautusi o le Ofisa o Faamasinoga:

“tagata e umia sea” o lona uiga o se tagata o ia lea ua faaulufaleina lona igoa i luga o le tusi resitala o sea a se kamupani e avea o se umia le tasi po o le sili atu o sea i totonu o le kamupani:

“suega i le tulaga e mafai ai ona totogi aitalafu” o lona uiga o le suega i le tulaga e mafai ai ona totogi aitalafu o lo o faasinomia i ai i totonu o le fuaiupu 4:

“iugafono faapitoa” o lona uiga o se iugafono -

- (a) Ua faamaonia e tusa ai ma le fuaiupu 48; po o
- (b) Ua faamaonia i se fonotaga a tagata e umia sea na taloina e iloilo lena iugafono i luga o se faasilasilaga e le itiiti ifo i le 10 aso faigaluega -
 - (i) e le 75% o se vaega toatele (po o se vaega toatele e maualuga atu e pei ona faamaoti mai i totonu o Mataupu o Faavae a le kamupani o palota a tagata e umia sea ua agavaa e palota ma ua palota i luga o le fesili; ma
 - (ii) e tusa ai o so o se manaoga faaopoopo ua faamaoti mai i totonu o Mataupu o Faavae a le kamupani e tusa ai o ia iugafono;

“aso faigaluega” o lona uiga o se aso o le vaiaso e ese mai ai -

- (a) Aso Toonai ma le Aso Sa;
- (b) O se aso ua faamatalaina e faapea, po o ua faasilasilaina e avea o se aso malolo faalauaitete i lalo o le Tulafono o Faleoloa 1961;

- (c) O se aso ua faamatalaina e avea o se, po o ua faasilasilaina e avea o se aso malolo faalauaitele i lalo o so o se isi Tulafono.
- (2) Mo faamoemoega o lenei Tulafono, o se kamupani o le a avea ma lala o se isi kamupani pe afai, peitai pe afai e na o:
- (a) Le isi lea kamupani -
- (i) o lo o pulea le tuufaatasia o le komiti faatino a le kamupani; po o
 - (ii) o lo o i se tulaga e faatino ai, po o le pulea o le faatinoina, o le sili atu i le tasi le afa o le aofaiga aupito i toatele o palota e faapea e mafai ona faatinoina i se fonotaga a le kamupani; po o
 - (iii) o lo o umia le sili atu i le tasi le afa o sea ua tuuina atu a le kamupani, e ese ai na i lo sea e le o tauaveina ai aia tatau e auai ai i tua atu o se aofaiga ua faamaoti mai i se faasoasoaga o tupe mama po o tupe faavae; po o
 - (iv) ua agavaa e mauaina le sili atu i le tasi le afa o so o se tufatufaga taitasi uma ua totagi atu i luga o sea ua tuuina atu e le kamupani, e ese mai ai i lo sea e le o tauaveina ai aia tatau e auai ai i tua atu o se aofaiga ua faamaoti mai i se faasoasoaga o tupe mama po o tupe faavae; po o
- (b) O le kamupani e avea ma lala o se kamupani pe a faapea o le isi lea lala o le kamupani.
- (3) Mo le faamoemoe o lenei Tulafono, o se kamupani e avea ma kamupani umia a le isi kamupani pe a faapea o le isi lea kamupani o sona lala.
- (4) Mo le faamoemoe o lenei Tulafono, e fesootai se kamupani i le isi kamupani pe afai:
- (a) O le isi kamupani o sana kamupani umia po o sona lala; po o
 - (b) O le sili atu i le afa o sea tuuina atu a le kamupani, e ese mai ai i lo sea e le o tauaveina ai aia tatau e auai ai i tua atu o se aofaiga maoti i se faasoasoaga o tupe mama po o tupe faavae o lo o umia e le isi kamupani ma kamupani e fesootai i

le isi lea kamupani (pe tuusao po o le faaalatua ae ese mai ai i se malosiaga e umia ai faatausi mavaega); po o

(c) Le sili atu i le afa o sea tuuina atu, e ese mai ai i lo sea e le o tauaveina ai aia tatau e auai ai i tua atu o se aofaiga maoti i se faasoasoaga o tupe mama po o tupe faavae, o ia sea taitasi o lo o umia e sui auai o le isi kamupani (pe tuusao po o le faaalatua ae ese mai ai i se malosiaga e umia ai faa tausi mavaega); po o

(d) O pisinisi a kamupani sa tauaveina lava i luga o le tuueseeseina o pisinisi a ia lava kamupani taitasi, po o se vaega tele o ia pisinisi ua le o mafai ona iloaina vave i lea taimi; po o

(e) O lo o i ai se isi kamupani o lo o fesootai i ai ia kamupani uma;

ma o “kamupani fesootai” e i ai lona uiga e foliga tutusa ai.

(5) I totonu o faafuaiupu (2), (3) ma le (4), o le faaupuga “kamupani” e aofia ai se faalapotopotoga.

3. Faasilasilaga faalauaitele – Faasilasilaga faalauaitele o so o se mataupu e mafai ona tuuina atu mo le faamoemoe o lenei Tulafono e ala i le lomua faasalalau i totonu o le:

(a) Le itiiti ifo i le tasi le lomiga o le nusipepa o le Savali; po o

(b) Le itiiti ifo i le lua lomiga a so o se isi nusipepa ua faatonuina.

4. Suega i le tulaga e mafai ai ona totogi aitalafu-(1)

Mo le faamoemoe o lenei Tulafono, e faamalieina e se kamupani le suega o le tulaga e mafai ai ona totogi aitalafu pe afai:

(a) Ua mafai e le kamupani ona totogi ana aitalafu pe a oo i le taimi e tatau ona totogi ai i le faagasologa masani o ana pisinisi; ma

(b) O le tau aoga o aseta a le kamupani e le itiiti ifo na i lo le tau aoga o ana noataga.

(2) O se tagata ua manaomia e iloilo pe ua faamalieina e se kamupani le suega o le tulaga e mafai ai ona totogi aitalafu i totonu o le faafuaiupu (1) e tatau ona silasila i:

- (a) Faamatalaga o tupe ua saunia i luga o faiga masani ma faavae o le tausiga o tusi e faapea ua talafeagai ma tulaga ua tulai mai;
- (b) Le faatatauina o le fua o le aoga o aseta po o noataga;
- (c) Isi faamatalaga e faasino i le tulaga tau tupe a le kamupani e pei ona talafeagai ai i tulaga uma.

(3) Afai o aiaia i Mataupu o Faavae a se kamupani se tulaga e faatapulaa ai le tulaga e mafai ai ona totogi aitalafu e tatau ona tausia e le kamupani, e faaaoga i ai le faafuaiupu (1)(b) e faasino i lea kamupani, ae vagana ai pe afai o aseta faasili a le kamupani ua faasoasoina:

- (a) I se faamaapega; po o
- (b) Le faia muamua a o le i aveesea le kamupani mai le tusi resitala a Samoa e tusa ai ma le Vaega XVII.

5. Tulafono e noatia ai le Malo – O lenei Tulafono e noatia ai le Malo.

VAEGA II TUUFAATASIA FAALETULAFONO MA IGOA

Tuufaatasia faaletulafono

6. Tusi talosaga mo le tuufaatasia faaletulafono-(1) O se tusi talosaga mo le tuufaatasia faaletulafono o se kamupani e tatau ona faia i le Resitara i le faiga ua faatonuina.

(2) O se tusi talosaga mo le tuufaatasia faaletulafono o se kamupani e tatau ona faamaoti ai:

- (a) Le igoa o le kamupani, lea e tatau ona tausisia ai le fuaiupu 10;
- (b) Pe o le kamupani o se kamupani tumaoti po o se kamupani a le Malo (mo tagata lautele);

- (c) Pe o Mataupu o Faavae a le kamupani e ese mai i Mataupu o Faavae ua fai ma taiala o lo o faatulaga atu i le Faamatalaga Muamua (i le tulaga o se kamupani tumaoti) po o le Faamatalaga Tolu (i le tulaga o se kamupani a le Malo);
 - (d) O le igoa atoa ma le tuatusi nofomau ma tuatusi o falemeli o faatonu taitasi o le kamupani ua faatuina mai;
 - (e) O le igoa atoa o tagata taitasi e umia sea a le kamupani ua faatuina mai, ma le aofaiga o sea e ao ona tuuina atu i tagata taitasi e umia sea;
 - (f) O le ofisa faamauina a le kamupani ua faatuina mai; ma
 - (g) O le tuatusi o le falemeli a le kamupani, e faapea e mafai ona avea ma tuatusi o le falemeli a le ofisa faamauina po o so o se isi lava tuatusi o le falemeli.
- (3) O se tusi talosaga mo le tuufaatasia faaletulafono e tatau ona tuuina mai faatasi ma:
- (a) Se maliega mai tagata taitoatasi ua taua lona igoa e avea o se faatonu ina ia galue e avea o se faatonu a le kamupani, i totonu o se faiga faatonuina;
 - (b) Se ata o Mataupu o Faavae a le kamupani, pe afai e ese mai i Mataupu o Faavae ua avea ma taiala;
 - (c) Le totogifuapauina ua faatonuina.

7. Tusi faamaonia o le tuufaatasia faaletulafono – O le taimi lava e maua ai e le Resitara se tusi talosaga mo le tuufaatasia faaletulafono o lo o tausisia ai le fuaiupu 6, e tatau loa i le Resitara ona:

- (a) Faaulufale le kamupani i totonu o le tusi resitala a Samoa; ma
- (b) Tuuina atu se tusi faamaonia o le tuufaatasia faaletulafono e faasino i le kamupani.

8. Taunuuga o le tuufaatasia faaletulafono-(1) O se tusi faamaonia o le tuufaatasia faaletulafono o se kamupani ua tuuina atu i lalo o le fuaiupu 7 o se molimau maumaututu lea:

- (a) O manaoga uma o lenei Tulafono e tusa ai o le tuufaatasia faaletulafono ua uma ona tausisia; ma
 - (b) I luga ma e amata mai i le aso o le tuufaatasia faaletulafono o lo o taua i totonu o le tusi faamaonia, o le kamupani ua tuufaatasia faaletulafono i lalo o lenei Tulafono.
- (2) O se kamupani ua tuufaatasia faaletulafono i lalo o lenei Tulafono, o se vaega ua aloaia faaletulafono i lana lava aia tatau e ese mai ai i ana tagata e umia sea, ma e faaaauau lona i ai pea seia vagana ai ua aveesea mai i le tusi resitala a Samoa.

9. Faamauina e avea ai o se kamupani tumaoti po o se kamupani a le Malo-(1) E mafai ona faamauina se kamupani e avea o se kamupani tumaoti pe afai:

- (a) O lo o faasaina o ia i totonu o ana Mataupu o Faavae mai le tuuina atu o ana faamalumaluga i le Malo; ma
 - (b) O lo o faatapulaaina i ana Mataupu o Faavae le aofaiga o tagata e umia sea i totonu o le kamupani i le le sili atu i le 100; ma
 - (c) E le o ia te ia le sili atu i le 100 tagata e umia sea.
- (2) O se kamupani e le o faamauina e avea o se kamupani tumaoti ua avea o se kamupani a le Malo (mo tagata lautele).
- (3) E mafai e se kamupani a le Malo (mo tagata lautele) ona talosaga i le Resitara ina ia faamauina e avea o se kamupani tumaoti pe afai:
- (a) Ua faamalieina e le kamupani manaoga o le faafuaiupu (1); ma
 - (b) Ua faamaonia e tagata e umia sea le tusi talosaga e ala i se iugafono faapitoa.

E tatau i le Resitara ona teuteuina le faamauina o le kamupani ina ia talafeagai ai, ma tuuina atu se tusi faamaonia fou o le tuufaatasia faaletulafono mo le kamupani i totonu o se faiga ua faatonuina.

(4) E mafai e se kamupani tumaoti ona talosaga i le Resitara ina ia faamauina e avea o se kamupani a le Malo (mo tagata lautele) i luga o se faamaoniga a tagata e umia sea e ala i se iugafono faapitoa.

(5) E tatau i se kamupani tumaoti ona talosaga ina ia faamauina e avea o se kamupani a le Malo (mo tagata lautele) pe afai ua le mafai ona ia faamalieina manaoga o le faafuaiupu (1).

(6) Afai:

(a) O se tusi talosaga ua faia i le Resitara e tusa ai ma le faafuaiupu (4) po o le faafuaiupu (5); po o

(b) Ua oo mai i le silafia o le Resitara e faapea o se kamupani tumaoti ua ia le mafai ona faamalieina manaoga o le faafuaiupu (1) -

e tatau i le Resitara ona faamauina le kamupani e avea o se kamupani a le Malo, (mo tagata lautele) ma tuuina atu se tusi faamaonia fou o le tuufaatasia faaletulafono mo le kamupani i se faiga ua faatonuina.

Igoa

10. Igoa o le kamupani-(1) O le igoa o se kamupani e tatau ona faaiu i le upu “Limited”.

(2) E le tatau i le Resitara ona faamauina se kamupani i se igoa:

(a) O lo o foliga tutusa po o e tali foliga tutusa i le igoa o le isi kamupani; po o

(b) O le faaaogaina o lea igoa o le a solia ai so o se tulafono e faasino i le faaaogaina o igoa; po o

(c) Le faaaogaina o le igoa o le a solia ai tulafono faatonutonu ua faia i lalo o lenei Tulafono e faasino i igoa o kamupani; po o

(d) Ua manatu le Resitara e mataga.

(3) Afai o se tusi talosaga a se kamupani mo le tuufaatasia faaletulafono o lo o faamaoti mai ai se igoa e faapea e le faamalieina ai manaoga o lenei fuaiupu, e tatau i le Resitara ona faamauina faaletulafono le kamupani i se igoa i le faiga e faapenei “Company number x Limited”, e avea ai le “X” o se fuainumera tutasi ua tuuina atu e le Resitara i le kamupani mo lenei faamoemoe.

11. Suiga o le igoa-(1) O se tusi talosaga mo le suia o le igoa o se kamupani e tatau ona:

(a) Faia i le faiga faatonuina; ma

- (b) Ia sainia ese faatonu o le kamupani; ma
 - (c) Tuuina atu faatasi ma le totogifuapauina ua faatonuina.
- (2) O se tusi talosaga mo le suia o le igoa o se kamupani, e le o se teuteuga lea o Mataupu o Faavae a le kamupani mo le faamoemoe o lenei Tulafono.
- (3) I le taimi lava e maua ai e le Resitara se tusi talosaga ua maea ona faatumuina lelei i lalo o lenei fuaiupu o lo o tausisia ai le faafuaiupu (1) ma faatasi ai ma manaoga o le fuaiupu 10, e tatau i le Resitara ona:
- (a) Faaulufale le igoa fou o le kamupani i le tusi resitala a Samoa; ma
 - (b) Tuuina atu se tusi faamaonia o le tuufaatasia faaletulafono mo le kamupani o lo o faamauina ai le suiga o le igoa o le kamupani.
- (4) O se suiga i le igoa o se kamupani:
- (a) O le a faamamaluina mai le aso o lo o faamaoti mai i totonu o le tusi faamaonia ua tuuina atu i lalo o le faafuaiupu (3); ma
 - (b) E le aafia ai aia tatau po o noatiaga a le kamupani, po o taualumaga faaletulafono e faia e po o e faasaga i le kamupani. O taualumaga faaletulafono e faapea sa tatau ona faaauuina po o le amataina e faasaga i le kamupani i lalo o lona igoa muamua e mafai ona faaauuina po o le amataina e faasaga ia te ia i lalo o lona igoa fou.

12. Faatonuga e suia ai le igoa-(1) Afai ua talitonu le Resitara i luga o ni mafuaaga talafeagai e faapea sa faamauina se kamupani i lalo o se igoa o lo o solia ai le fuaiupu 10 i le taimi o le faamauina, e mafai e le Resitara ona tuuina atu se faasilasilaga i le kamupani e suia lona igoa i se aso ua faailoa maoti i totonu o le faasilasilaga, o sea aso e le itiiti ifo i le 20 aso faigaluega pe a tuanai le aso na tuuina atu ai le faasilasilaga.

(2) Afai e le suia e le kamupani lona igoa i totonu o le vaitaimi ua faailoa maoti mai i totonu o le faasilasilaga, e mafai e le Resitara ona faaulufale i le tusi resitala a Samoa se igoa fou

o le kamupani i se faiga faapenei “Company number x Limited” e avea ai le “X” o se fuainumera tutasi ua tuuina atu e le Resitara i le kamupani mo lenei faamoemoe.

(3) Afai ua faamauina e le Resitara se igoa fou i lalo o le faafuaiupu (2):

- (a) E tatau i le Resitara ona tuuina atu se tusi faamaonia o le tuufaatasia faaletulafono mo le kamupani ua faamauina ai le igoa fou o le kamupani; ma
- (b) O le fuaiupu 11(4) ua faaoga e faasino i le faamauina o le igoa fou e faapei ai o le igoa o le kamupani sa suia i lalo o le fuaiupu 11.

13. Faaaogaina o le igoa o le kamupani-(1) E tatau i se kamupani ona mautinoa e faapea o lona igoa o lo o taua manino i totonu o:

- (a) So o se fesootaiga tusitusia ua auina atu e po o i le avea ma sui o le kamupani; ma
- (b) So o se pepa aloaia ua tuuina atu po o ua sainia e, po o le avea ai ma sui, o le kamupani e faapea ua molimauina ai po o ua faia ai se noatiaga faaletulafono o le kamupani.

(2) Afai:

- (a) O se pepa aloaia e faapea o lo o molimauina ai po o ua faia ai se noatiaga faaletulafono o le kamupani na tuuina atu po o ua sainia e po o le avea ma sui o le kamupani; ma
- (b) O le igoa o le kamupani e le o sao ona taua i totonu o le pepa aloaia - o tagata uma sa tuuina atu pe sainia le pepa aloaia ua noatia i le tulaga lava e tasi e pei ona oo i ai le kamupani pe afai ua le mafai e le kamupani ona faamatuu atu noatiaga ae vagana ai;
- (c) O le tagata o ia lea sa tuuina atu po o ua sainia le pepa aloaia ua faamaonia e faapea o le tagata sa faatulai mai ai lea noatiaga sa malamalama lelei lava i le taimi e faapea o le pepa aloaia sa tuuina atu pe sainia na ala ai ona faatulai mai lea noatiaga sa faaee atu i le kamupani; po o

(d) Ua faamalieina le Faamasinoga e faapea e le o se mea amiotonu ma talafeagai ona noatia o le tagata o ia lea na tuuina atu pe sainia le pepa aloaia.

(3) Mo faamoemoega o faafuaiupu (1) ma le (2) o lenei fuaiupu ma le fuaiupu 86 (o lo o faasino i le auala e mafai ai e se kamupani ona ulufale atu i faiga faakonekarate ma isi noatiaga), e mafai e se kamupani ona faaoga se faapuupuuga ua aloaia faalauaitele o se upu po o upu o lona igoa pe afai e le taufaasese lea faiga.

(4) Afai, i totonu o le vaitaimi o le 12 masina i le taimi faatoa tuana'i atu le tuuina atu e se kamupani o so o se faasilasilaga faalauaitele i le suia o le igoa o le kamupani, e tataui i le kamupani ona mautinoa o lo o taua i le faasilasilaga e faapea:

- (a) O le igoa o le kamupani sa suia i lea vaitaimi; ma
- (b) O le igoa muamua po o igoa o le kamupani.

(5) Afai ua le mafai e se kamupani ona taasisia le faafuaiupu (1) ma le faafuaiupu (4):

- (a) Ua faia e le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga atu i le fuaiupu 194(1); ma
- (b) O faatonu uma o le kamupani ua faia se solitulafono ma ua noatia i luga o se moliaga ua faamaonia faaletulafono i le faasalaga ua faatulaga atu i le fuaiupu 195(1).

VAEGA III

MATAUPU O FAAVAE A LE KAMUPANI I LE TUUFAATASIA FAALETULAFONO

14. Faaogaina ma le suia o Mataupu o Faavae a le kamupani-(1) E mafai e se kamupani ona faaoga Mataupu o Faavae o le Tuufaatasia Faaletulafono i le taimi o lona tuufaatasia faaletulafono i le:

- (a) Failaina o ia Mataupu o Faavae faatasi ma lana tusi talosaga mo le tuufaatasia faaletulafono ina ia tusa ai ma le fuaiupu 6(3); po o

- (b) I le tulaga o Mataupu o Faavae ua fai ma taiala o lo o faatulaga atu i totonu o le Faamatalaga Muamua po o le Faamatalaga Lua po o le Faamatalaga Tolu, ua faaalua mai i totonu o lana tusi talosaga mo le tuufaatasia faaletulafono e faapea ua ia manatu e faaaoga Mataupu o Faavae ia ua fai ma taiala e ave ma ana Mataupu o Faavae.
- (2) I le noatia ma le fai fuafua i so o se tapulaa i totonu o ana Mataupu o Faavae, e mafai e se kamupani e ala i se iugafono faapitoa ona faaaoga Mataupu o Faavae fou, po o le suia o ana lava Mataupu o Faavae.
- (3) I totonu o le 10 aso faigaluega talu ona faaaogaina e se kamupani o Mataupu o Faavae fou po o le fesuiaiga o Mataupu o Faavae a se kamupani, po o le a lava le tulaga e i ai, e tataui i le kamupani ona auina atu se faasilasilaga i le Resitara mo le faamauina i le faiga ua faatonuina.
- (4) Afai ua le mafai e se kamupani ona tausisia le faafuuiupu (3), ua faia e faatonu taitasi o le kamupani se solitulafono ma ua noatia, i luga o se moliaga ua faamaonia faaletulafono i le faasalaga o lo o faatulaga atu i le fuaiupu 195(2).

15. Mataupu o Faavae a le kamupani ua fai ma taiala-

- (1) O Mataupu o Faavae a le kamupani ua fai ma taiala o lo o faatulaga mai i totonu o le Faamatalaga Muamua e i ai le aoga e pei ai o Mataupu o Faavae a se kamupani tumaoti ae vagana ai e oo i le tulaga e faapea ai o le kamupani ua:
- (a) Faaaogaina Mataupu o Faavae ua fai ma taiala o lo o faatulaga mai i totonu o se isi Faamatalaga e ave ma ana Mataupu o Faavae; po o
- (b) Ua faaaogaina Mataupu o Faavae o lo o toesea ai po o toe teuteu ai po o e le o ogatasi ma Mataupu o Faavae ua fai ma taiala.
- (2) O Mataupu o Faavae a le kamupani ua fai ma taiala o lo o faatulaga mai i totonu o le Faamatalaga Tolu e i ai le aoga e pei ai o Mataupu o Faavae a se kamupani a le Malo mo tagata lautele ae vagana ai e oo i le tulaga ae faapea ai o le kamupani ua:

- (a) Faaaoga Mataupu o Faavae ua fai ma taiala o lo o faatulaga mai i totonu o se isi Faamatalaga e avea ma ana Mataupu o Faavae; po o
 - (b) Ua faaaogaina Mataupu o Faavae o lo o toesea ai po o toe teuteu ai po o e le o ogatasi ma Mataupu o Faavae ua fai ma taiala.
- (3) E mafai e se kamupani ona filifili e faaaoga Mataupu o Faavae ua fai ma taiala o lo o i totonu o le Faamatalaga Muamua po o le Faaamatalaga Lua po o le Faamatalaga Tolu e avea ma ana Mataupu o Faavae ina ia tusa ai ma le fuaiupu 14(2).

16. Faasologa o Mataupu ma le taunuuga o Mataupu o Faavae a le kamupani-(1) E mafai ona aofia i Mataupu o Faavae a se kamupani:

- (a) Mataupu ua faamatalaina e lenei Tulafono mo le aofia ai i totonu o Mataupu o Faavae a se kamupani;
 - (b) Isi mataupu ua manatu le kamupani e tatau ona aofia i totonu o ana Mataupu o Faavae.
- (2) I le noatia ma le fai fuafua i le faafuaiupu (3):
- (a) O Mataupu o Faavae a se kamupani ua i ai le taunuuga ma e mafai ai ona faamamaluina e faapei ai ua latou faavaeina ai se konekarate -
 - (i) i le va o le kamupani ma ana tagata e umia sea; ma
 - (ii) i le va o le kamupani ma faatonu taitasi; ma
 - (b) E i ai i tagata e umia sea ma faatonu o se kamupani aia tatau, pule, tiute ma noatiaga o lo o faatulaga mai i totonu o Mataupu o Faavae a le kamupani.
- (3) O Mataupu o Faavae a se kamupani o le a leai se taunuuga pe a oo i le tulaga e faapea ai ua le ogatasi ma lenei Tulafono.

**VAEGA IV
SEA**

Aia tatau e fesootei i sea

17. Aia Tatau ma pule e fesootei i sea-(1) I le noatia ma le fai fuafua i Mataupu o Faavae a le kamupani ma i tuutuuga ua tuuina atu ai, e faaeeina atu ai se sea i totonu o se kamupani i se na te umia:

(a) Le aia tatau i le palota e tasi i luga o se faiga palota i se fonotaga a le kamupani i luga o so o se iugafono e aofia ai so o se iugafono e -

(i) tofia po o le aveesea ai o se faatonu po o se suetusi;

(ii) e faaaogaina ai Mataupu o Faavae fou a le kamupani;

(iii) suia ai Mataupu o Faavae a le kamupani;

(iv) faamaonia ai se galuega faatino tele;

(v) faamaonia ai se tuufaatasiga o le kamupani;

(vi) faamaonia ai le toe faamauina o se kamupani a le Malo (mo tagata lautele) e avea o se kamupani tumaoti po o se kamupani tumaoti e avea o se kamupani a le Malo (mo tagata lautele);

(vii) tuuina ai le kamupani i le faamaapeina;

(viii) faamaonia ai le faaliliuina atu o le faamauina o le kamupani i se isi atunuu.

(b) O le aia tatau i sea tutusa i tufatufaga e tologi e le kamupani;

(c) O le aia tatau i sea tutusa i le faasoasoina o tupe o aseta faasili a le kamupani i se faamaapeina.

(2) I le noatia ma le fai fuafua i Mataupu o Faavae a le kamupani, o vasega eseese o sea e mafai ona tuuina atu i totonu o se kamupani.

(3) E aunoa ma le faatapulaaina o le faafuaiupu (2), o sea i totonu o se kamupani e mafai ona:

(a) Toe faaola mai; po o

(b) Le faaee atu o aia tatau filifilia i faasoasoaga o tupe faavae po o tupe maua; po o

(c) Le faaee atu o aia tatau faapitoa, faatapulaaina po o aia tatau i luga o tuutuuga tau palota; po o

(d) Le le faaeeina atu o aia tatau e palota ai.

18. E le tatau i sea ona faaee atu noataga i le na te umia sea-(1) E le tatau i se sea ona faaee atu se noataga e faia ai se totogi i le kamupani i luga o le na te umia lea sea.

(2) E leai se tulaga i totonu o le faafuaiupu (1):

- (a) E puipuia ai se kamupani mai le tuuina atu o tuutuuga, mutaaga po o tapulaa i aia tatau ma pule e fesootai i sea; po o
- (b) E puipuia ai se kamupani mai le tuuina atu o se sea i luga o tuutuuga faaaitalafu e aiaia ai se noataga e faia ai se totogi atoa i le lumanai i le kamupani, e le tagata o ia lea ua uluai tuuina atu i ai le sea.

Tuuina atu o Sea

19. Tuuina atu o sea amata – E tatau i se kamupani ona:

- (a) Tuuina atu loa pe a tuanai le faamauina o le kamupani, i so o se tagata o lo o taua lona igoa i totonu o le tusi talosaga mo le faamauina e avea o se tagata e umia sea le aofaiga o sea ua faaamoti mai i totonu o le tusi talosaga e avea o le aofaiga o sea e ao ina tuuina atu i lena tagata po o ia tagata;
- (b) I le tulaga o se kamupani ua tuufaatasia, ia tuuina atu loa i le taimi lava e aloaia ai le tuufaatasiga i so o se tagata ua agavaa i se sea po o sea i lalo o le talosaga o le tuufaatasiga, le sea po o sea e agavaa i ai lena tagata.

20. Tuuina atu o isi sea-(1) E mafai e se kamupani ona tuuina atu sea:

- (a) Ina ia tusa ai ma ana Mataupu o Faavae; po o
- (b) I luga o le faamaoniga a tagata uma e umia sea i lalo o le fuaiupu 47.

(2) E tatau i se kamupani ona auina atu i le Resitara mo le faamauina, i totonu o le 10 aso faigaluega o le tuuina atu o ni sea, se faasilasilaga i le faiga ua faatonuina o le tuuina atu o sea e le kamupani. Pe afai o aia tatau ua tuuina atu i sea e le o

faatulagaina atoa mai i totonu o Mataupu o Faavae a le kamupani, e tatau ona faapipii faatasi le faasilasilaga ma se pepa aloaia o lo o faatulaga mai ai tuutuuga o le tuuina atu o sea.

(3) Afai ua le mafai e se kamupani ona tausisia le faafuaiupu (2), ua faia e faatonu taitasi uma o le kamupani se solitulafono ma ua noatia i luga o se moliaga ua faamaonia faaletulafono i le faasalaga o lo o faatulaga mai i le fuaiupu 195(2).

21. Taimi o le tuuina atu o sea – E tuuina atu se sea pe afai ua faaulufaleina le igoa o le na te umia i totonu o le tusi resitala o sea.

Faasoasoaina o tupe – aiaiga faalauaitele

22. Faasaina faasoasoaga o tupe vagana ua faamalieina le suega i le tulaga e mafai ai ona totogi aitalafu – E le tatau i se kamupani ona faia se faasoasoaga o tupe i tagata e umia sea ae vagana ai o lo o i ai ni mafuaaga tatau e talitonuina ai e faapea, pe a uma ona faia o lena faasoasoaga, o le a faamalieina e le kamupani le suega i le tulaga e mafai ai ona totogi aitalafu i le fuaiupu 4.

23. Toe faaolaina o faasoasoaga le talafeagai-(1) O se faasoasoaga o tupe ua faia i se tagata e umia sea e solia ai le fuaiupu 22 po o le fuaiupu 24 po o le fuaiupu 25 e mafai ona toe faaola mai e le kamupani mai le tagata e umia sea ae vagana ai:

- (a) Ua talia e le tagata e umia sea le faasoasoaga i le loto lelei ma e aunoa ma le iloa ua solia ai e le kamupani le fuaiupu 22 po o le fuaiupu 24 po o le fuaiupu 25, po o le a lava le tulaga e i ai; ma
 - (b) Ua suia e le tagata e umia sea le tulaga o le tagata e umia sea i le faalagolago atu i le tulaga aloaia o le faasoasoaga; ma
 - (c) O le a le amiotonu le manaomia o le toe faaolaina mai atoa po o le faia foi o se totogi e faaola ai;
- (2) Afai o se faasoasoaga ua faia e solia ai le fuaiupu 22, o so o se tagata o ia lea ua faatagaina e faia le faasoasoaga i se

taimi ina ua iloa e lena tagata po o sa tatau ona iloa e lena tagata e faapea o le faasoasoaga e le o tausisia ai le fuaiupu 22 ua noatia e toe totogi atu i le kamupani se aofaiga o lena faasoasoaga ua le ono mafai ona toe faaola mai ia latou na taliaina i lalo o le faafuaiupu (1).

(3) Afai, i totonu o se gaoioiga ua faia i lalo o lenei fuaiupu, ua faamalieina le Faamasinoga e faapea e mafai e le kamupani ona faia se faasoasoaga i se aofaiga itiiti ifo, ua faamalieina ai manaoga o le fuaiupu 22, e mafai e le Faamasinoga ona :

(a) Faataga le tagata e umia sea ina ia taofia; po o

(b) Le tuusaunoa o se tagata o ia lea ua faatagaina le faasoasoaga mai noataga e tusa ai o,

se aofaiga e tutusa ma le aoga o so o se faasoasoaga e faapea sa tatau ona mafai ona fai lelei.

Tufatufaga

24. Tufatufaga - I le noatia ma le fai fuafua i le fuaiupu 22 ma le faafuaiupu (2) o lenei fuaiupu, e mafai e se kamupani ona totogi atu se tufatufaga i le tagata e umia sea pe afai ma e faatoa mafai lava pe afai o lea tufatufaga ua faatagaina:

(a) E tagata uma e umia sea i lalo o le fuaiupu 47; po o

(b) Pe afai o lo o aiaia i Mataupu o Faavae a le kamupani, o se tufatufaga ua faatagaina e faatonu e tatau ona tausisia ai so o se tuutuuga po o tapulaa ua faatulaga mai i totonu o Mataupu o Faavae a le kamupani.

(2) I le noatia ma le fai fuafua i ana Mataupu o Faavae ma i tuutuuga o le tuuina atu o so o se sea, e le tatau ai i se kamupani ona totogi atu se tufatufaga:

(a) E tusa ai i le na o ni sea ae le o sea uma; po o

(b) E faapea e sili atu le aoga o le sea e tasi e tusa ai o nisi sea na i lo isi,

ae vagana ai o le totogiina atu o lea tufatufaga i le auala lea ua faamaonia e tagata uma e umia sea i lalo o le fuaiupu 47.

(3) I totonu o lenei fuaiupu, “Tufatufaga” o lona uiga o so o se faasoasoaga e ese ai nai lo:

(a) O se faasoasoaga e ala mai i le toe faatauina mai po o le toe faaolaina mai o sea; po o

- (b) O se faasoasoaga o aseta faasili a le kamupani i se faamaapega.

Mauaina o ana lava sea

25. E mafai e le kamupani ona maua ana lava sea-(1) E mafai e se kamupani ona maua ana lava sea:

- (a) Ina ia tusa ai ma le faafuaiupu (2) po o le fuaiupu 51; ma
- (b) I le noatia ma le fai fuafua i le fuaiupu 22, peitai e le tusa ai ma se isi tuutuuga e ese mai ai.
- (2) E mafai e se kamupani ona maua ana lava sea i luga o se maliliega e faia ma se tagata e umia sea:
- (a) Ina ia tusa ai ma ana Mataupu o Faavae; po o
- (b) I luga o le faamaoniga a tagata uma e umia sea i lalo o le fuaiupu 47.
- (3) E tatau i se kamupani ona auina atu i le Resitara mo le faamauina, i totonu o le 10 aso faigaluega o le mauaina o so o se sea, se faasilasilaga i se faiga ua faatonuina o le mauaina o sea e le kamupani.

(4) Afai o le mauaina mai o sea e se kamupani e le i mafua, mai i se ofo na faia i tagata uma e umia sea e faapea:

- (a) Pe afai e taliaina, o le a le aafia ai aia tatau e palota ai ma aia tatau i faasoasoaga e talafeagai ai; ma
- (b) Faaavanoa se taimi talafeagai mo le taliaina o le ofo, o le faasilasilaga o lo o manaomia i lalo o le faafuaiupu (3) e tatau foi ona auina atu i tagata taitasi e umia sea i totonu o le 20 aso faigaluega o le mauaina o sea.

(5) Afai ua le mafai e se kamupani ona tausisia le faafuaiupu (3) po o le faafuaiupu (4) ua faia e faatonu taitasi uma o le kamupani se solitulafono ma ua noatia i luga o se moliaga ua faamaonia faaetulafono i le faasalaga ua faatulaga mai i totonu o le fuaiupu 195(2).

26. Faaleaogaina o sea ua maua e le kamupani-(1) Afai o se kamupani ua mauaina ana lava sea, o ia sea ua ave a faapea o le a faaleaogaina loa lava i luga o le taimi e mauaina ai

ae vagana ai ua aiaia manino mai i totonu o Mataupu o Faavae a le kamupani i se isi tulaga e ese mai ai.

(2) Afai o se kamupani ua maua e ia ana lava sea ma ua aiaia i Mataupu o Faavae a le kamupani e faapea o ia sea e le faaleaogaina i luga o le taimi na mauaina ai, o aia tatau e fesootai ma ia sea e le mafai ona faatinoina e po o e, faasaga i le kamupani i so o se taimi lava o le a faapea ai, e ese mai ai i lenei fuaiupu, o le a agavaa:

(a) E faatino ia aia tatau; po o

(b) E tuuina atu o faatonuga i le o lo o umia lena sea i le ala e tatau ona faatino ai so o se tasi o ia aia tatau.

(3) Mo le faamoemoe o lenei fuaiupu, e maua e se kamupani se sea i le taimi e tatau ona ia maua ai, e ese mai ai i aiaiga o lenei fuaiupu o le a agavaa ai:

(a) O le a agavaa ai e faatino aia tatau e fesootai i lena sea; po o

(b) O le a agavaa ai e tuuina atu o faatonuga i le o lo o umia lena sea i le auala e tatau ona faatino ai so o se aia tatau e fesootai i lena sea.

27. Faamamaluina o konekarate e toe faatau mai ai sea-

(1) O se konekarate ua faia ma se kamupani o lo o aiaia ai le mauaina e le kamupani o ana sea ua faasino tonu lava lona faamamaluina e faasaga i le kamupani ae vagana ai ua oo i le tulaga e faapea ai o lona faatinoina o le a solia ai le fuaiupu 22.

(2) Ua i ai i le kamupani le avega o le faamaonia o le faatinoga o le konekarate o le a solia ai le fuaiupu 22.

(3) Seia vagana ai ua faatinoina atoatoa e le kamupani se konekarate o lo o faasinomia i ai le faafuaiupu (1), o le isi vaega i le konekarate e taofia le tulaga o se ua tagi ua agavaa ina ia totogi atu ia te ia i le taimi lava e mafai ai faaletulafono e le kamupani ona faia po o le faia muamua a o le i aveesea le kamupani mai le tusi resitala a Samoa, ina ia faatulaga maualalo ifo o aia tatau a tagata o lo o nofo aitalafu ai le kamupani, peitai e ave le faamuamua i isi tagata e umia sea.

Toe Faaolaina mai o sea

28. O sea e mafai ona toe faaola mai-(1) Mo le faamoemoe o lenei Tulafono, e mafai ona toe faaola mai se sea pe afai o Mataupu o Faavae a le kamupani po o tuutuuga o le tuuina atu o sea o lo o faia ai ni aiaiga mo le toe faaolaina mai o lena sea e le kamupani:

- (a) I le filifiliga a le kamupani; po o
- (b) I le filifiliga a le umia le sea; po o
- (c) I luga o se aso o lo o faamaoti mai i totonu o Mataupu o Faavae a le kamupani po o tuutuuga o le tuuina atu sea -

mo se iloiloga e faapea:

- (d) Ua faamaoti mai; po o
- (e) O le a fuafuaina e ala i le faasinomaga se fua faatatau; po o
- (f) E manaomia ina ia faia e se tagata agavaa talafeagai o ia lea e le fesootai ma po o e i ai sona aia i le kamupani.

(2) Mo le alofia o le masalosalo, o le suetusi a se kamupani o le a le fesootai ma pe i ai sona aia i le kamupani mo faamoemoega o le faafuaiupu (1)(f).

29. Faaolaina mai o sea e mafai ona toe faaola mai-(1) E tatau i se kamupani ona toe faaola mai se sea e mafai ona toe faaola mai ina ia tusa ai ma ana Mataupu o Faavae ma tuutuuga o le tuuina atu o le sea, ae vagana ai ua oo i le tulaga e faapea ai, o le faia e le kamupani o lea tulaga, o le a solia ai le fuaiupu 22.

(2) Ua i ai i le kamupani le avega o le faamaoniaina e faapea o le toe faaolaina mai o se sea o le a solia ai le fuaiupu 22.

(3) Seia vagana ai ua toe faaolaina atoa mai e le kamupani se sea ina ia tusa ai ma le faafuaiupu (1), o le na umia muamua le sea e taofia le tulaga o se ua tagi e agavaa ai ina ia totogi atu ia te ia i le taimi lava e mafai ai faaletulafono e le kamupani ona faia po o le faia muamua a o le i aveesea le kamupani mai le tusi lesitala a Samoa, ina ia faatulaga maualalo ifo aia tatau a tagata o lo o nofo aitalafu ai le kamupani peitai e ave le faamuamua i isi tagata e umia sea.

(4) O sea e mafai ona toe faaola mai ua avea e faapea o le a faaleaogaina loa lava i le aso ua aiaia i totonu o Mataupu o Faavae a le kamupani po o a latou tuutuuga o le tuuina atu o sea mo ia sea ina ia toe faaolaina mai, ae vagana ai ua aiaia i Mataupu o Faavae a le kamupani po o tuutuuga o le tuuina atu o sea i se isi tulaga e ese mai ai.

(5) E tatau i se kamupani ona auina atu i le Resitara mo le faamauina, i totonu o le 10 aso faigaluega o le toe faaolaina mai o so o se sea, se faasilasilaga i se faiga faatonuina o le toe faaolaina mai o sea e le kamupani.

(6) Afai ua le mafai e le kamupani ona tausisia le faafuaiupu (5) ua faia e faatonu taitasi uma o le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i le fuaiupu 195(1).

Fesoasoani a le kamupani i le faatauina mai o ana lava sea

30. Fesoasoani tau tupe – E mafai e se kamupani ona tuuina atu fesoasoani tau tupe i se tagata mo le faamoemoe o, po o i le aofia ai ma le faatauina mai o se sea ua tuuina atu po o le a tuuina atu e le kamupani, pe tuusao po o le faaalatua, e gata lava pe afai:

- (a) O le kamupani na te tuuina atu le fesoasoani i le faatinoga masani o ana pisinisi ma i luga o ana aiaiga ma tuutuuga masani; po o
- (b) O le tuuina atu o le fesoasoani ua faatagaina e faatonu po o tagata uma e umia sea i lalo o le fuaiupu 47; ma
 - (i) e i ai mafuaaga tatau e talitonuina ai e faapea, ina ua uma ona tuuina atu le fesoasoani, o le a mafai e le kamupani ona faamalieina le suega o le tulaga e mafai ai ona totogi aitalafu; ma
 - (ii) ua tausisia e le kamupani ni tuutuuga po o tapulaa i totonu o ana Mataupu o Faavae.

O sea umia faatasi

31. Sea umia faatasi-(1) I le noatia ma le fai fuafua i lenei fuaiupu, e le tatau i se lala o le kamupani ona umia sea i lona kamupani umia.

(2) O le tuuina atu o sea e se kamupani umia i lona lala ua le faaaogaina ma ua leai sona aoga.

(3) O le faaliliuina atu o sea e se kamupani umia i lona lala ua le faaaogaina ma ua leai sona aoga.

(4) Afai o se kamupani na te umia sea i se isi kamupani e avefa ai o ia o se lala o le isi lona kamupani:

(a) E mafai e le lala o le kamupani, e ese mai ai i le faafuiauupu (1), ona faaaou o lona umia o na sea; ae peitai

(b) E le mafai e le lala o le kamupani ona faatino ni aia tatau tau palota po o nisi aia tatau e fesootai ma ia sea, e ese mai ai i aia tatau e taliaina ai faasoasoaga ma talia faasilasilaga ma isi faamatalaga mai le kamupani.

(5) O le a leai se vaega i lenei fuaiupu e puipuia ai se lala o se kamupani mai i le umia o sea i lona kamupani umia i lona tulaga o se tagata e fai ai ma sui tau i le tagata lava ia po o se tausimaavaega vagana ai o le kamupani umia po o se isi lala o le kamupani e i ai sona aia e faamanuiaina ai i lalo o le tuutuuga tau mavaega e ese mai i se aia e tupu mai e ala i faamalumaluga mo faamoemoega o se gaoioiga ua faia i le faatinoga masani o le pisinisi o le nonoina atu o tupe.

(6) O lenei fuaiupu e faaoga i se sui ua faatu mai mo se lala o se kamupani i le auala lava e tasi e pei ona faaoga ai i le lala o le kamupani.

Faaliliuina atu o sea

32. Faaliliuina atu o sea-(1) I le noatia ma le fai fuafua i so o se mutaaga po o tapulaa i luga o le faaliliuina atu o sea i totonu o Mataupu o Faavae a le kamupani e ono mafai ai ona faaliliuina atu se sea.

(2) Ua faaliliuina atu se sea pe a faaulufaleina i totonu o le tusi resitala o sea ina ia tusa ai ma le fuaiupu 34.

(3) E mafai e le sui tau i le tagata lava ia a se tagata e umia sea ua maliu ona faaliliu atu se sea e tusa lava pe o le sui tau i le tagata lava ia e le o se tagata e umia sea i le taimi o le faaliliuina atu.

33. Faaliliuina atu o sea e ala i le faatinoga o le Tulafono-(1) I le noatia ma le fai fuafua i le faafuaiupu (2), e mafai ona pasia sea i totonu o se kamupani e ala i le faatinoga o le Tulafono e ese mai ai i so o se tulaga i totonu o Mataupu o Faavae a le kamupani.

(2) E mafai ona aiaia i totonu o Mataupu o Faavae a se kamupani e faapea, afai o se sea ua tuuina atu e ala i le faatinoga o le tulafono, o aia tatau tau paota ua fesootai atu i lena sea ua faamuta le ono toe faatinoina seia vagana ai ua faaliliuina atu e tusa ai ma Mataupu o Faavae a le kamupani.

Tusi resitala o sea

34. Ia tausia e le kamupani se tusi resitala o sea-(1) E tatau i se kamupani ona tausia se tusi resitala o sea e faamaumau ai sea ua tuuina atu e le kamupani ma ia taua ai:

- (a) Igoa, ua faatulagaina i mataitusi o le pi faitau ma tuatusi lata mai ua iloa o tagata taitasi o i latou ia ua po o sa avea ma tagata e umia sea i totonu o le fitu tausaga ua tuanai; ma
- (b) Le aofaiga o sea i vasega taitasi o sea o lo o umia e tagata taitasi e umia sea i totonu o le fitu tausaga ua tuanai; ma
- (c) Le aso -
 - (i) o le tuuina atu o so o se sea i; po o
 - (ii) le toe faatau mai po o le toe faaolaina o sea mai; po o
 - (iii) le faaliliuina atu o sea e po o i -
 tagata taitasi e umia sea i totonu o le fitu tausaga ua tuanai ma e tusa ai o le faaliliuina atu, o le igoa o le tagata na faaliliu i ai pe na faaliliu mai ai sea.

(2) E tatau ona tausia le tusi resitala o sea:

- (a) I se faiga ua faatagaina i lalo o le fuaiupu 97; ma

- (b) I le ofisa faamauina a le kamupani po o so o se isi nofoaga po o se nofoaga ua faatagaina i lalo o le fuaiupu 98.
- (3) E mafai e se sooupu ona tausia le tusi resitala o sea a le kamupani.
- (4) Afai ua le mafai e le kamupani ona tausisia manaoga o lenei fuaiupu:
 - (a) Ua faia e le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i totonu o le fuaiupu 194(2);
 - (b) Ua faia e faatonu uma o le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i totonu o le fuaiupu 195(2).

35. Tusi resitala o sea e avea ma molimau i agavaa faaletulafono-(1) I le noatia ma le fai fuafua i le fuaiupu 36, o le faaulufaleina o le igoa o se tagata i totonu o le tusi resitala o sea e avea ai o se na te umia se sea, o le molimau aloaia muamua lea o le agavaa faaletulafono i le sea ua faaee atu i lena tagata.

(2) E tatau i se kamupani ona amanaia le tagata e umia sea ua faamauina e avea na o se tagata lava e agavaa i le:

- (a) Faatinoina o le aia tatau e palota ai ua tuuina atu i le sea; ma
- (b) Talia faasilasilaga; ma
- (c) Talia se faasoasoaga e tusa ai ma le sea; ma
- (d) Faatino isi aia tatau ma pule ua tuuina atu i se sea.

36. Pule a le faamasinoga e faasao ai le tusi resitala o sea-(1) Afai ua sese ona faaulufaleina le igoa o le tagata i totonu po o le soloia mai le tusi resitala o sea a se kamupani, e mafai e le tagata ua aafia ai po o se tagata e umia sea ona talosaga i le Faamasinoga mo le toe faasaoina o le tusi resitala o sea po o le faia o le tui mo le gau ua faatulai mai ai po o le faia o ia vaega uma e lua.

(2) I luga o se tusi talosaga i lalo o lenei fuaiupu, e mafai e le Faamasinoga ona faia se poloaiga:

- (a) I le faasaoga o le tusi resitala o sea; po o
 - (b) Le totogi atu e le kamupani po o se faatonu o tau mo le gau ua faatulai mai ai; po o
 - (c) Le faasaoga ma le totogi atu o le tau.
- (3) I luga o se tusi talosaga e faia i lalo o lenei fuaiupu, e mafai e le Faamasinoga ona filifili:
- (a) Se fesili e faasino i le agavaa o se tagata o ia lea o se vaega i le talosaga ina ia faaulufaleina lona igoa i totonu po o le soloia mai le tusi resitala; ma
 - (b) Se fesili talafeagai po o e aoga i le filifiliga mo le faasaoga o le tusi resitala.

37. Meatotino ua tausia faa mavaega e le tatau ona faaulufaleina i totonu o le tusi resitala – E leai se faasilasilaga o se meatotino e tausii faamavaega, pe faaalua, faatatauina po o le faia, e mafai ona faaulufale i totonu o le tusi resitala o sea.

38. Faamauina o sui tau i le tagata lava ia po o tagata e faaliliu atu i ai meatotino o le gaumativa-(1) E ese mai ai i le fuaiupu 37, ae i le noatia ma le fai fuafua i le fuaiupu 33, o se sui tau i le tagata lava ia o se tagata ua maliu o ia lea ua faamauina lona igoa i totonu o se tusi resitala o sea a se kamupani e avea o se na te umia se sea i lona kamupani ua agavaa ina ia faamauina e avea o se na te umia lona sea i le avea ai o se sui tau i le tagata lava ia.

(2) E ese mai ai i le fuaiupu 37, ae i le noatia ma le fai fuafua i le fuaiupu 33(2), o le tagata e faaliliu atu i ai meatotino o se gaumativa ua faamauina i totonu o se tusi resitala o sea a se kamupani e avea ai o se na te umia se sea i totonu o lona kamupani, ua agavaa ina ia faamauina e avea o se na te umia lona sea i le avea ai o se e faaliliu atu i ai meatotino o le gaumativa.

(3) O le faamauina o se tagata tausii mavaega, tagata e faatinoina galuega po o se pule po o se tagata e faaliliu atu i ai le gaumativa e tusa ai ma lenei fuaiupu e le faia ai se faasilasilaga o se meatotino ua tausii faamavaega.

(4) Mo le faamoemoe o lenei fuaiupu, “tagata e faaliliu atu i ai meatotino o le gaumativa” o lona uiga o le tagata o ia lea ua

faaee atu i ai meatotino o le gaumative e tusa ai o le Tulafono o le Gaumativa 1908.

Tusi faamaonia o sea

39. Tusi faamaonia o sea-(1) E mafai e se tagata e umia sea ona talosaga i le kamupani mo se tusi faamaonia o se sea e faasino i ni sea po o sea uma a le tagata e umia sea i totonu o le kamupani.

(2) I luga o le taliaina o se tusi talosaga mo se tusi faamaonia o sea i lalo o le faafuaiupu (1), e tatau i le kamupani i totonu o le 20 aso faigaluega ina ua tuanai le taliaina o le tusi talosaga:

(a) Pe afai o se tusi talosaga e faasino i ni sea ae le o sea uma, ia tuueseese sea o lo o faaalua i totonu o le tusi resitala o sea e faapea o lo o umia e le o lo o talosaga i vaega eseese; o le tasi vaega o sea ia o lo o faasino i ai le tusi faamaonia o sea, ma le isi vaega o ni sea ia o lo o totoe; ma

(b) I tulaga uma lava, ia auina atu i le tagata e umia sea se tusi faamaonia o lo o taua ai -

(i) le igoa o le kamupani; ma

(ii) le vasega o sea o lo o umia e le tagata e umia sea; ma

(iii) le aofaiga o sea o lo o umia e le tagata e umia sea o lo o faasino i ai le tusi faamaonia.

(3) Afai o se tusi faamaonia o sea ua uma ona tuuina atu, e le tatau ona faamauina e le kamupani le faaliliuina atu o sea o lo o faasino i ai le tusi faamaonia, seia vagana ai o le faiga o le faaliliuina atu o lo o manaomia e lena fuaiupu ua tuuina mai faatasi ma:

(a) Le tusi faamaonia o sea e faasino i le sea; po o

(b) Molimau i lona leiloa, po o le faatamaia ma pe afai e manaomia, o se faamagaloga i se faiga e manaomia e le komiti faatino.

(4) Afai o sea o lo o faasino i ai se tusi faamaonia o sea e faapea o le a faaliliuina atu, ma o le tusi faamaonia o sea ua auina atu i le kamupani e mafai ai ona fai le faamauina o le

faaliliuina atu, e tatau ona faaleaogaina le tusi faamaonia o sea ma e leai se isi tusi faamaonia o sea e tuuina atu ae vagana ai o se talosaga e faia e le tagata e faaliliuina atu le sea.

(5) Afai ua le mafai e le kamupani ona tausisia le faafuaiupu (1):

- (a) Ua faia e le kamupani se solitulafono ma ua noatia i luga o se moliaga ua faamaonia faaetulafono i le faasalaga ua faatulaga mai i le fuaiupu 194(1).
- (b) Ua faia e faatonu taitasi uma o le kamupani se solitulafono ma ua noatia i luga o se moliaga ua faamaonia faaetulafono i le faasalaga ua faatulaga mai i le fuaiupu 195(1).

Natura faaetulafono o sea ma isi

40. Natura faaetulafono o sea – O se sea i totonu o se kamupani o se meatotino tau i le tagata lava ia.

41. Leai ni tau aoga itiiti o sea-(1) E le tatau i se sea ona i ai se tau aoga itiiti po o se aoga tutusa.

(2) E leai se tulaga i le faafuaiupu (1) e puipuia ai le tuuina atu e se kamupani o se sea e mafai ona toe faaola mai.

42. Aofaiga aupito maualalo o sea – E tatau i kamupani taitasi uma ona i ai le le itiiti ifo i le tasi le sea e tuuina atu.

VAEGA V TAGATA E UMIA SEA MA A LATOU AIA TATAU MA NOATIAGA

Noataga o tagata e umia sea

43. Noataga a tagata e umia sea-(1) E le noatia se tagata e umia sea mo se noatiaga a le kamupani i le mafuaaga e faapea ai ua na o ia o se tagata e umia sea.

(2) O le noataga o se tagata e umia sea i le kamupani ua faatapulaaina i:

- (a) So o se noataga e toe totogi ai se faasoasoaga e faapea e mafai ona toe faaola mai i lalo o le fuaiupu 23;

(b) So o se noataga i lalo o le fuaiupu 71.

(3) E leai se tulaga i totonu o lenei fuaiupu e aafia ai le noataga a se tagata e umia sea i se kamupani i lalo o se konekarate, e aafia ai se konekarate mo le tuuina atu o sea, po o se noataga ua faatulai mai i so o se isi lava malosiaga, e aafia ai le avea o se faatonu o le kamupani po o noataga mo so o se gaioioiga sese, po o le solia ai o se tiute faaletulafono po o isi gaioioiga sese ua faia e le tagata e umia sea.

Pule a tagata e umia sea

44. Faaiuga e tatau ona faia e tagata e umia sea – O pule ua taua i lalo e tatau ona faatinoina e tagata e umia sea a se kamupani e ala i se iugafono faapitoa ma e le mafai ona faasoaina atu i lalo o Mataupu o Faavae a le kamupani po o se isi tulaga e ese mai ai:

- (a) O le pule e faamaonia ai le toe faamauina o se kamupani a le Malo (mo tagata lautele) e avea ai o se kamupani tumaoti i lalo o le fuaiupu 9(3) po o se kamupani tumaoti e avea o se kamupani a le Malo (mo tagata lautele) i lalo o le fuaiupu 9(4),
- (b) O le pule e faaaoga ai Mataupu o Faavae fou a le kamupani po o e teuteu ai Mataupu o Faavae a le kamupani i lalo o le fuaiupu 14(2).
- (c) O le pule e faamaonia ai le tuufaatasiga o le kamupani i lalo o le fuaiupu 121 ma le Faamatalaga Lima;
- (d) O le pule e faamaonia ai se galuega faatino tele i lalo o le fuaiupu 46(1)(b)(i);
- (e) O le pule e tuuina atu ai le kamupani i le faamaapeina;
- (f) O le pule e faamaonia ai le faaopoopoina o le taimi mo le faamaeaina o faamatalaga tau tupe a le kamupani tumaoti i lalo o le fuaiupu 111(3);
- (g) O le pule e faamaonia ai le faaliliuina atu o le faamauina o le kamupani i le isi atunuu i lalo o le fuaiupu 173.

45. Faaiuga e ono mafai ona faia e tagata e umia sea-(1)

Ae vagana ai ua aiaia e Mataupu o Faavae a le kamupani se isi tulaga e ese mai ai, o pule ua taua i lalo e faatinoina e tagata e umia sea:

- (a) O le pule e tofia ai pe aveesea ai se faatonu;
- (b) O le pule e tofia ai se suetusi.

(2) E mafai e Mataupu o Faavae a le kamupani ona aiaia ai isi mataupu ina ia filifili i ai tagata e umia sea po o e faamaonia e tagata e umia sea.

(3) Seia vagana ai ua aiaia e Mataupu o Faavae a le kamupani se isi tulaga e ese mai ai, o pule ua faasinomia i totonu o le faafuaiupu (1), ma so o se isi pule ua faaee atu i luga o tagata e umia sea i lalo o le faafuaiupu (2), e mafai ona faatinoina:

- (a) I se iugafono masani; po o
- (b) Ina ia tusa ai ma le fuaiupu 47.

46. Faamaoniga a tagata e umia sea i galuega faatino tetele-(1) E le tatau i se kamupani ona ulufale atu i se galuega faatino tele seia vagana ai:

- (a) Ua faatagaina manino o ia e Mataupu o Faavae a le kamupani e ulufale atu i lena galuega faatino po o galuega faatino o lena vasega; po o
- (b) O le ulufale atu i se galuega faatino ua faamaonia e tagata e umia sea -
 - (i) i se iugafono masani; po o
 - (ii) ina ia tusa ai ma le fuaiupu 47; po o
- (c) O galuega faatino o lo o i ai i luga o tulaga faatuutuuga o le faamaoniga a tagata e umia sea ina ia tusa ai ma le parakalafa (b).

(2) I totonu o lenei fuaiupu:

“Aseta” e aofia ai meatotino o so o se ituaiga pe moni pe le moni:

“Galuega faatino tetele” e faasino i se kamupani, o lona uiga -

- (a) O le mauaina o po o se maliega e maua ai, pe o lo o i ai i se tulaga le mautinoa pe leai, aseta o o latou aoga e sili atu i le afa o le aoga o aseta a le kamupani a o le i mauaina; po o

- (b) O le lafoaia o po o se maliega e lafoai ai pe o lo o i ai i se tulaga le mautinoa pe leai, aseta a le kamupani o o latou aoga e sili atu i le afa o le aoga o aseta a le kamupani a o le i lafoaia; po o
- (c) Se galuega faatino o lo o i ai po o e foliga o le a i ai se aafiaga o aia tatau a le kamupani e maua ai po o aia po o noatiaga ua faatulai mai po o noatiaga, o le aoga o lea galuega faatino e sili atu i le afa o le aoga o aseta a le kamupani ao le i faia le gaoioiga faapisinisi.

(3) E leai se mea i totonu o le parakalafa (2) o le faamatalaina o le uiga o le upu “Galuega faatino tetele” i totonu o le faafuaiupu (2) e faaoga ai i luga o se mafuaaga e faapea ua na o le kamupani e tuuina atu po o ua ulufale atu i se maliega e tuu atu ai se totogi faamalumalu i luga o aseta a le kamupani, o le aoga o ia aseta e sili atu i le afa o le aoga o aseta a le kamupani mo le faamoemoe e faamalumalu ai i le toe totogiina o tupe po o le faatinoga o se noatiaga.

(4) E leai se mea i totonu o lenei fuaiupu e faaoga i se galuega faatino tele ua faaulufale atu i ai se tagata e faamaapeina meatotino sa tofia e tusa ai ma se pepa faalelufono ua faia ai se totogi i luga o meatotino a le kamupani.

47. Faamaoniga autasi a tagata e umia sea-(1) Afai o tagata uma e umia sea a se kamupani ua malilie e po o ua afaatasi i so o se gaoioiga e faia e le kamupani po o se faatonu, o le faia o lea gaoioiga ua ave e faapea sa faatagaina aloaia e le kamupani e ese mai ai i:

- (a) So o se aiaiga e ese mai i ana Mataupu o Faavae; po o
- (b) O le leai o se faatagaga manino e faia ai se gaoioiga i totonu o ana Mataupu o Faavae.

(2) O mataupu o lo o mafai ona faatagaina e tusa ai ma le faafuaiupu (1) e aofia ai ae le faatapulaaina ai i mea ua taua i lalo:

- (a) Tuuina atu o sea;
- (b) O le faia o se faasoasoaga;
- (c) O le toe faatauina mai o sea;

- (d) Tuuina atu o fesoasoani tau tupe mo le faamoemoe o, po o le fesootea ma le faatauina mai o sea i totonu o le kamupani;
- (e) O le totoigiina atu o le totoigi o se faatonu, po o le faia o se nonogatupe i se faatonu po o le faaeeina atu o so o se isi faamanuiaga i luga o se faatonu;
- (f) O le faia o se konekarate i le va o le kamupani ma se faatonu po o so o se isi konekarate o lo o i ai se aia a se faatonu;
- (g) Ulufale atu i se galuega faatino tele;
- (h) O le faamaoniga ina ua uma ona tulai mai so o se gaoioiga o lo o faapea sa tataua ona faatagaina i lalo o lenei fuaiupu.

(3) E le tataua i se kamupani ona faatagaina se faasoasoaga i lalo o lenei fuaiupu seia vagana ai o lo o i ai mafuaaga tataua e talitona ai e faapea, ina ua uma ona faia o lenei faasoasoaga, o le a faamalieina ai e le kamupani le suega i le tulaga e mafai ai ona totoigi aitalafu i totonu o le fuaiupu 4.

(4) O le fuaiupu 23 e faaoga i se faasoasoaga ua faia e solia ai le faafuaiupu (3) e pei ai:

- (a) O le faasoasoaga sa faia e solia ai le fuaiupu 22; ma
- (b) O le faasoasoaga sa faatagaina e tagata uma e umia sea.

48. Iugafono tusitusia a tagata e umia sea-(1) I le noatia ma le fai fuafua i le faafuaiupu (3), o se iugafono tusitusia ua sainia e tagata e umia sea o i latou ia o lo o umia faatasi le le itiiti ifo i le 75% o palota ua agavaa e faia i luga o lenei iugafono i se fonotaga a tagata e umia sea, ua aloaia e faapei ai sa pasia i se fonotaga a ia tagata e umia sea.

(2) O se iugafono tusitusia e faapea:

- (a) E faasino i se mataupu ua manaomia e lenei Tulafono po o e Mataupu o Faavae a le kamupani ina ia filifili i ai i se fonotaga a tagata e umia sea a se kamupani; ma
- (b) Ua sainia e tagata e umia sea o lo o faasinomia i ai le faafuaiupu (1) -

ua faia e tusa ai ma lenei Tulafono po o Mataupu o Faavae a le kamupani, po o le a lava le tulaga e i ai.

(3) Afai, e tusa ai ma so o se mataupu, o Mataupu o Faavae a se kamupani:

(a) E manaomia le faamaoniga e se aofaiga toatele e maualuga atu na i lo le 75% o ia tagata e umia sea ua agavaa e palota ma le faia o palota, o le faasinoga i totonu o le faafuaiupu (1) i le 75% ua avea e faapea o se faasinoga lea i lena aofaiga pito i maualuga;

(b) Ua faamaoti ai manaoga faaopoopo mo le faamaoniga o ia mataupu, o ia manaoga e tatau foi ona faamalieina ina ia aloaia ai le iugafono.

(4) I totonu o le lima aso faigaluega talu ona pasia se iugafono i lalo o lenei fuaiupu, e tatau i le kamupani ona auina atu se ata o le iugafono i tagata taitasi uma e umia sea, o i latou ia e le i sainia le iugafono.

(5) E mafai ona sainia se iugafono i lalo o le faafuaiupu (1) po o le faafuaiupu (2) o lenei fuaiupu e aunoa ma se faasilasilaga e tuuina atu muamua i tagata e umia sea.

(6) Afai ua le mafai e le kamupani ona tausisia le faafuaiupu (4):

(a) Ua faia e le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i le fuaiupu 194(1);

(b) Ua faia e fatonu taitasi uma se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i le fuaiupu 195(1).

49. Fonotaga a tagata e umia sea-(1) O fonotaga a tagata e umia sea e tatau ona usuia ina ia tusa ai ma Mataupu o Faavae a le kamupani.

(2) O se fonotaga faapitoa a tagata e umia sea ua agavaa e palota i luga o se mataupu:

(a) E mafai ona taloina i so o se taimi e se faatonu;

(b) E tatau ona taloina e faatonu i luga o se talosaga tusitusia a tagata e umia sea, o lo o umia faatasi sea e le itiiti ifo na i lo le lima (5) pasene o palota e mafai ona faia i luga o le mataupu.

(3) E pulea e Mataupu o Faavae a le kamupani taualumaga i fonotaga a tagata e umia sea.

Suiga o aia tatau a tagata e umia sea

50. Suiga o aia tatau a tagata e umia sea-(1) E le tatau i se kamupani ona faia se gaoioiga e aafia ai aia tatau ua tuuina atu i sea ae vagana ai o lena gaoioiga sa faamaonia e:

(a) Se iugafono faapitoa a vaega taitasi e aia i ai; po o

(b) Tagata uma e umia sea i lalo o le fuaiupu 47.

(2) Mo le faamoemoe o le faafuaiupu (1), o aia tatau ua tuuina atu i se sea e aofia ai:

(a) Aia tatau, tulaga aloaia, tapulaa ma tuutuuga ua tuuina atu i le sea e lenei Tulafono po o Mataupu o Faavae a le kamupani, e aofia ai aia tatau e palota ai ma aia tatau i faasoasoaga;

(b) O aia tatau e maua ai so o se aiaiga o Mataupu o Faavae a le kamupani e faasino i le tuuina atu o nisi sea o lo o tausia e le kamupani;

(c) O le aia tatau e maua ai taualumaga ua faatulaga atu i totonu o lenei fuaiupu, ma so o se isi taualumaga e manaomia e Mataupu o Faavae a le kamupani mo toe teuteuga ma suiga o aia tatau, o lo o tausia e le kamupani;

(d) O le aia tatau e faapea ai o se taualumaga o lo o manaomia e Mataupu o Faavae a le kamupani mo le toe teuteuina po o le suia o aia tatau e le teuteuina pe suia.

(3) I totonu o lenei fuaiupu -

“Vasega” o lona uiga o se vasega o sea ua uma ona tuuina atu i ai aia tatau e tutusa lelei, tulaga aloaia i tapulaa ma tuutuuga:

“Vaega e aia i ai” e faasino i so o se gaoioiga po o se talosaga e aafia ai aia tatau ua tuuina atu i sea, o lona uiga o se vaega o tagata e umia sea:

(a) O a latou aia tatau ua aafia e tutusa lelei; ma

(b) O a latou aia tatau ua aafia i le gaoioiga po o le talosaga i le auala lava e tasi; ma

- (c) I le noatia ma le fai fuafua i le faafuaiupu (4)(b) o lo o aofia ai tagata e umia le tasi po o le sili atu o vasega o sea i totonu o le kamupani.
- (4) Mo le faamoemoe o lenei fuaiupu ma le faamatalaina o le upu “Vaega e aia i ai”:
- (a) E mafai ona i ai le tasi po o le sili atu o vaega e aia i ai e faasino i so o se gaoioiga po o se talosaga; ma
- (b) Afai -
- (i) ua faia se gaoioiga e faasino i ni tagata e umia sea i totonu o se vasega ma e le o isi; po o
- (ii) se talosaga ua faaalua manino ai le eseese i le va o ni tagata e umia sea i totonu o se vasega ma isi tagata e umia sea o lena vasega - o tagata e umia sea i totonu o le vasega lava e tasi e mafai ona pau atu i le lua po o le sili atu vaega e aia i ai.

Aia tatau a se vaega toaititi e faatau ese atu ai sea

51. Toe faatauina mai o sea a le tagata ua auese ai-(1)

Afai:

- (a) O se tagata e umia sea ua agavaa e palota i luga o le faatinoina o le tasi po o le sili atu o pule ua faatulaga atu i totonu o -
- (i) le fuaiupu 44(b) ma le suiga ua faatu mai po o le aveesea o se tapulaa i luga o gaoioiga a le kamupani; po o
- (ii) le fuaiupu 44(c) po o le fuaiupu 44(d); ma
- (b) Ua filifili tagata e umia sea e faatino le pule; ma
- (c) Ua tuuina atu e tagata e umia sea palota uma ua tuuina atu i sea ua faamauina i le igoa o le tagata e umia sea ma ua i ai faamanuiaga tutusa a le ana le sea e faasaga i le faatinoina o le pule,
- ua agavaa lena tagata e umia sea e manaomia le kamupani e faatau mai ia sea ina ia tusa ai ma taualumaga ua faatulaga mai i totonu o le Faamatalaga Fa.

(2) Afai:

- (a) O se vaega e aia i ai ua faamaonia e se iugafono faapitoa i lalo o le fuaiupu 50, le faia o se gaoioiga e aafia ai aia tatau ua tuuina atu i sea; ma
- (b) Ua agavaa le kamupani e faia le gaoioiga; ma
- (c) O se tagata e umia sea o ia lea o se sui o le vaega e aia i ai ua tuuina uma atu palota ua tuu atu i le sea ua faamauina i le igoa o lena tagata e umia sea ma ua i ai faamanuiaga tutusa a le ana le sea e faasaga i le gaoioiga,

o lena tagata e umia sea ua agavaa e manaomia le kamupani e faatau mai ia sea e tusa ai ma taualumaga ua faatulaga mai i totonu o le Faamatalaga Fa.

(3) Afai o se iugafono a tagata e umia sea po o se vaega e aia i ai ua tusitusia e tusa ai ma le fuaiupu 48, faafuiaiupu (1) ma le (2) ua faaoga e pei ai o se faasinoga i se tagata e umia sea o ia lea ua faia uma palota ua tuuina atu i sea ua faamauina i le igoa o le tagata e umia ma ua i ai faamanuiaga tutusa a le ana le sea e faasaga i le mataupu ua fesiligia o faasinoga i ai se tagata e umia sea o ia lea e le i sainia le iugafono tusitusia e tusa ai o ia sea.

Faalauiiloa atu i tagata e umia sea

52. Lipoti faaletausaga i tagata e umia sea-(1) I le noatia ma le fai fuafua i le faafuiaiupu (2), e tatau i faatonu o kamupani taitasi uma, i totonu o le 20 aso faigaluega ina ua tuanai le aso na manaomia ai le kamupani e faamaea ana faamatalaga tau tupe i lalo o le fuaiupu 111:

- (a) Ona saunia se lipoti faaletausaga i luga o mataupu a le kamupani i le faagasologa o le vaiitaimi faaletupe ua faaiuina i lena aso; ma
- (b) Auina atu se ata o lena lipoti i tagata taitasi e umia sea.

(2) O Mataupu o Faavae a se kamupani tumaoti, e mafai ona aiaia ai e faapea faatoa manaomia faatonu e saunia se lipoti faaletausaga e tusa ai o se vaiitaimi faaletupe pe afai ua tuuina

mai e se tagata e umia sea se faasilasilaga tusitusia i le kamupani a o le i faaiuina lena vaitaimi faaletupe e manaomia ai sea lipoti ina ia saunia.

(3) O lipoti taitasi uma faaletausaga mo se kamupani e tatau:

- (a) Ona tusitusia ma tuu i ai le aso; ma
- (b) Aofia ai faamatalaga o tupe mo le vaitaimi faaletupe o loo tausisia ai le fuaiupu 111; ma
- (c) Afai ua manaomia se lipoti a le suetusi i lalo o le fuaiupu 112 e faasino i le faamatalaga o tupe o loo aofia i le lipoti, ia aofia ai foi le lipoti a lena suetusi; ma
- (d) Taua ai igoa o tagata o loo umia tofi o faatonu o le kamupani e pei ona i ai i le faaiuga o le vaitaimi faaletupe ma igoa o so o se tagata o ia lea ua faamuta le toe umia o le tofi e avea ai o se faatonu o le kamupani a o faagasolo le vaitaimi faaletupe; ma
- (e) Aofia ai so o se isi faamatalaga pe afai e manaomia e -
 - (i) tulafono faatonutonu ua faia i lalo o lenei Tulafono; ma
 - (ii) Mataupu o Faavae a le kamupani; ma
- (f) Ia sainia e faatonu e toalua (2) e avea ai ma sui o faatonu o le kamupani po o pe afai e na o le toatasi le faatonu o le kamupani, ia sainia e lena faatonu.

(4) Afai ua le mafai e faatonu o se kamupani ona tausisia le faafuaiupu (1), ua faia e faatonu taitasi uma se solitulafono ma ua noatia i luga o se moliaga ua faamaonia faalettulafono i le faasalaga ua faatulaga mai i le fuaiupu 195(2).

53. Asiasia o faamaumauga a le kamupani e tagata e umia sea – Ua agavaa se tagata e umia sea e asiasia faamaumauga a le kamupani e tusa ai ma le fuaiupu 100.

54. Isi faamatalaga mo tagata e umia sea-(1) E mafai e se tagata e umia sea i so o se taimi ona faia se talosaga tusitusia i se kamupani mo faamatalaga o loo umia e le kamupani.

(2) E tatau i le talosaga ona faamaoti mai ai auiliiliga o faamatalaga o lo o sailia ina ia faafaigofie ai ona iloa.

(3) I totonu o le 10 aso faigaluega o le mauaina o se talosaga i lalo o le faafuaiupu (1), e tatau i le kamupani ona:

- (a) Tuuina mai le faamatalaga; po o
- (b) Ua malilie e tuuina mai le faamatalaga i totonu o se vaitaimi ua faamaotiina mai; po o
- (c) Ua malilie e tuuina mai le faamatalaga i totonu o se vaitaimi ua faamaoti mai pe afai e totogiina e le tagata e umia sea se totogi talafeagai i le kamupani (e tatau ona faamaoti ma faamalamalama) e faamalieina ai le tau o le tuuina atu o le faamatalaga; po o
- (d) Le teena o le tuuina atu o le faamatalaga, ma faamaoti mai mafuaaga mo le teena.

(4) E aunoa ma le faatapulaaina ai o mafuaaga e faaono teena ai e se kamupani le tuuina mai o faamatalaga i lalo o lenei fuaiupu e mafai e le kamupani ona teena le tuuina mai o faamatalaga pe afai:

- (a) O le faailoa atu o faamatalaga o le a foliga mai e faia ai ni faufauga le tonu i le tulaga faapisinisi o le kamupani; po o
- (b) Le faailoa atu o faamatalaga o le a foliga mai e faia ai ni faufauga le tonu o le tulaga faapisinisi a so o se isi tagata pe o lea tagata sa tuuina atu faamatalaga i le kamupani pe leai; po o
- (c) Le talosaga mo le faamatalaga e le taua po o e faatupu faalavelave.

(5) Afai e manaomia e le kamupani le tagata e umia sea e totogi mai se totogi mo le faamatalaga, e mafai e le tagata e umia sea ona faai i tua le talosaga ma na avea e faapea sa faia lava, ae vagana ai i totonu o le 10 aso faigaluega o le mauaina o le faasilasilaga o le totogi, e logoina ai le kamupani e le tagata e umia sea:

- (a) E faapea o le tagata e umia sea o le a totogiina le totogi; po o
- (b) E faapea o le tagata e umia sea ua manatu ua le talafeagai le totogi.

(6) E mafai e le Faamasinoga, i luga o se tusi talosaga a se tagata o ia lea ua faia se talosaga mo faamatalaga, pe afai ua faamalieina o ia e faapea:

(a) O le vaitaimi sa faamaoti mai mo le tuuina mai o le faamatalaga ua le talafeagai; po o

(b) O le totogi sa faatulaga mai e le kamupani ua le talafeagai,

po o le a lava le tulaga e i ai, ona faia se poloaiga e manaomia ai le kamupani e tuuina mai faamatalaga i totonu o sea taimi po o i luga o le totogiina atu o sea totogi e pei ona manatu le Faamasinoga ua talafeagai ai.

(7) E mafai e le Faamasinoga i luga o se tusi talosaga a se tagata o ia lea ua faia se talosaga mo faamatalaga, pe afai ua faamalieina o ia e faapea:

(a) E le lava mafuaaga a le kamupani e teena ai le tuuina atu o le faamatalaga; po o

(b) E lava mafuaaga a le kamupani e teena ai le tuuina atu o faamatalaga peitai e i ai lava isi mafuaaga e faaleaogaina ai le teena -

ona faia se poloaiga e manaomia ai le kamupani e tuuina atu faamatalaga.

(8) Afai e faia e le Faamasinoga se poloaiga i lalo o le faafuaiupu (7) e mafai ona ia faamaoti ai le faaaogaina o le faamatalaga ma tagata o i latou ia e mafai ona faailoa atu i ai.

(9) I luga o se tusi talosaga mo se poloaiga i lalo o lenei fuaiupu, e mafai e le Faamasinoga ona faia sea poloaiga mo le totogiina o le tau e pei ona manatu o ia ua talafeagai ai.

55. Suesuega e faia i le talosaga a le tagata e umia sea-

(1) E mafai e le Faamasinoga i luga o se talosaga a se tagata e umia sea a se kamupani, ona faia se poloaiga e faataga ai se tagata ua taua i totonu o le poloaiga i se taimi ua faamaoti mai i le poloaiga, e asiasia ma faia ata o po o le aveina o mataupu sii mai i faamaumauga po o isi pepa aloaia a le kamupani, po o sea faamaumauga po o pepa aloaia a le kamupani e pei ona faamaoti mai i le poloaiga ma e mafai ona faia se poloaiga lagolago e pei ona manatu o ia ua talafeagai ai, e aofia ai se poloaiga e sueina ai tusi a le kamupani e lena tagata.

(2) E mafai e le Faamasinoga ona faia se poloaiga i lalo o le faafuaiupu (1) pe afai ua faamalieina o ia e faapea:

(a) I le faia o le tusi talosaga, sa faia lava i le agaga lelei o le tagata e umia sea ma o le asiasiga ua faatu mai e ao ina faia mo se faamoemoe talafeagai; ma

(b) O le tagata e ao ona tofia o se tagata e talafeagai mo le galuega.

(3) O se tagata ua tofia e le Faamasinoga i lalo ole faafuaiupu (1) e tatau ona tauaveina ma le faamaoni le asiasiga ma o le faia o lea galuega, o le a tatau ai ona faia se lipoti atoatoa i le Faamasinoga.

(4) I luga o le mauaina o le lipoti a se tagata asiasi, e mafai e le Faamasinoga ona faia sea poloaiga e faasino i le faalauiloaina atu ma le faaaogaina e faapea e ono mafai ona faia i faamaumauga ma faamatalaga ua maua e pei ona ua manatu o ia ua talafeagai ai.

(5) O se poloaiga ua faia i lalo o le faafuaiupu (4) e ono mafai ona eseese mai lea taimi i lea taimi.

(6) O tau talafeagai o asiasiga e tatau ona faamalieina e le kamupani ae vagana ai ua poloaia e le Faamasinoga i se isi tulaga e ese mai ai.

(7) Faatoa mafai e se tagata ona faailoa atu po o le faaaogaina o faamatalaga po o faamaumauga e maua i lalo o lenei fuaiupu e tusa ai ma se poloaiga e faia i lalo o le faafuaiupu (4) po o le faafuaiupu (5).

(8) O se tagata o ia lea ua faailoa atu po o ua faaaogaina faamatalaga po o faamaumauga i lalo o lenei fuaiupu e ese ai mai se poloaiga e faia i lalo o le faafuaiupu (4) po o le faafuaiupu (5) ua faia se solitulafono ma ua noatia i se moliaga ua faamaonia faaletulafono i le faasalaga ua faatulaga mai i le fuaiupu 194(2).

Aofaiga aupito maualalo o tagata e umia sea

56. E tatau i kamupani taitasi uma ona i ai le le itiiti ifo i le toatasi le tagata e umia sea – E tatau i se kamupani ona i ai i taimi uma lava le le itiiti ifo i le tasi le tagata e umia sea.

VAEGA VI
FAATONU MA O LATOU PULE MA TIUTE

57. Uiga o le “faatonu” – I totonu o lenei Tulafono, o le “faatonu” e faasino i se kamupani:

- (a) E aofia ai se tagata o lo o tauaveina le tulaga o le faatonu, po o le a lava le igoa o lo o valaau ai; peitai
- (b) E le aofia ai se tagata e faataapeina le kamupani.

58. Pulega o le kamupani – Ae vagana ai ua oo i le tulaga e faapea ai, o lenei Tulafono po o Mataupu o Faavae a le kamupani ua aiaia ai se isi tulaga e ese mai ai:

- (a) O pisinisi ma mataupu a se kamupani e tatau ona pulea e, po o i lalo o le taitaiga po o le vaaiga a faatonu o le kamupani;
- (b) Ua i ai i faatonu o se kamupani pule uma talafeagai mo le pulea ma mo le taitaiga ma le vaaiga o le pulega o pisinisi ma mataupu a le kamupani.

Tiute o faatonu

59. Tiute faavae o faatonu – E tatau i faatonu taitasi uma o se kamupani, pe afai e faatino pule po o le faatinoina o tiute e avea ai o se faatonu, ona galue:

- (a) I le agaga lelei; ma
- (b) I se auala e talitonu faatonu o lo o faia mo le lelei o le kamupani.

60. Tiute o faatonu i le tausisia o le Tulafono – E le tatau i se faatonu o se kamupani ona galue po o e malie i le kamupani o lo o galue i se ala e solia ai lenei Tulafono.

61. Tiute o faatonu i le tausisia o Mataupu o Faavae a le kamupani – E le tatau i se faatonu o se kamupani ona galue po o e malie i le kamupani o lo o galue i se ala e solia ai Mataupu o Faavae a le kamupani.

62. Aia a faatonu i galuega faatino a le kamupani-(1) E le tatau i se faatonu ona faatinoina so o se pule e avea ai o se faatonu i tulaga e tulai mai pe afai o lena faatonu e aia tuusao pe faaalatua i le faatinoga o lena pule ae vagana ai:

- (a) Ua faataga manino mai e lenei Tulafono le faatonu e faatino le pule e talafeagai lelei e ese mai ai i sea aia; po o
 - (b) O lo o i ai mafuaaga tatau a le faatonu e talitonuina ai e faapea o le a faamalieina e le kamupani le suega i le tulaga e mafai ai ona totogi aitalafu ina ua uma ona faatino lena pule, ma pe -
 - (i) ua faataga manino mai e Mataupu o Faavae a le kamupani le faatonu e faatino le pule talafeagai lelei, e ese mai ai i sea aia, ina ua uma ona faailoa atu lea aia e tusa ai ma le faafuaiupu (2); po o
 - (ii) o le faatinoina o le pule e le faatonu ua uma ona faamaonia e tagata uma e umia sea i lalo o le fuaiupu 47, ina ua uma ona faailoa atu le uiga ma le tele o le aia a le faatonu i tagata uma e umia sea o i latou ia e le o malamalama i na mataupu.
- (2) O se faatonu o ia lea o lo o aia tuusao po o le faaalatua i le faatinoga o so o se pule, ua na o le faatagaga mai Mataupu o Faavae a le kamupani e mafai ai e ia ona faatino lena pule pe afai e manaomia e Mataupu o Faavae a le kamupani a o le i faatinoina le pule, e tatau i le faatonu ona faailoa mai i se tusi le uiga ma le tele o lena aia:
- (a) Afai o lo o i ai se isi faatonu e toatasi o ia lea e le aia tuusao pe faaalatua i le galuega faatino po o le galuega faatino ua faatu mai i faatonu o le kamupani;
 - (b) Afai e le faaaogaina le parakalafa (a) i tagata uma e umia sea e ese mai ai i le faatonu.

63. Faaaogaina ma le faalauiloaina atu o faamatalaga a le kamupani – O se faatonu o se kamupani o ia lea ua i ai ia te ia faamatalaga i lona malosiaga o le faatonu po o se tagata faigaluega a le kamupani, o faamatalaga e faapea e le tatau ona

avanoa ia te ia, e le tatau ona faailoaina atu lena faamatalaga i so o se tagata po o le faaaogaina po o le faia o se gaoioiga i luga o le faamatalaga ae vagana ai:

- (a) I le aia a le kamupani; po o
- (b) E pei ona manaomia e le tulafono; po o
- (c) Pe afai o lo o i ai mafuaaga tatau e talitonu ai e faapea o le a faamalieina ai e le kamupani le suega i le tulaga e mafai ai ona totogi aitalafu ina ua uma ona faia e faatonu lena gaoioiga, ma o lena gaoioiga -
 - (i) ua faatagaina e Mataupu o Faavae a le kamupani; po o
 - (ii) ua faamaonia e tagata e umia sea i lalo o le fuaiupu 47.

64. Tulaga tumau o le tausia lelei o faatonu – I le noatia ma le fai fuafua i Mataupu o Faavae a le kamupani, e tatau i se faatonu o se kamupani, a o faatinoina pule po o tauaveina tiute o le faatonu, ona faatino le tausia lelei, faamaoni ma tomai e faapea e tatau ona faatinoina e se tagata lelei i tulaga lava e tasi e tulai mai, ma ia manatu ae le faatapulaa ai:

- (a) Le autu o le kamupani; ma
- (b) Le uiga o le faaiuga; ma
- (c) Le tulaga o le faatonu ma le uiga o matafaioi e tauaveina e ia.

65. Noatiaga o faatonu e fesootai ma le le mafai e le kamupani ona totogi aitalafu-(1) O se faatonu o se kamupani o ia lea:

- (a) Ua talitonu e faapea ua le mafai e le kamupani ona totogi ana aitalafu i le taimi e tatau ona totogi ai i le faagasologa masani o pisinisi; po o
- (b) Ua malamalama i mataupu o le a fesiligia ai so o se tagata lelei, e pei ona ua le mafai e le kamupani ona totogi ana aitalafu i le taimi e tatau ona totogi ai i le faagasologa masani o pisinisi -

e tatau ona taloina se fonotaga a faatonu i totonu o le 10 aso faigaluega e iloilo ai pe tatau i faatonu ona tofia se pule po o se tagata e faamaapeina.

(2) I se fonotaga ua taloina i lalo o lenei fuaiupu e tatau i faatonu ona iloilo ai pe tofia se pule po o se tagata e faamaapeina po o le faaauau o le tauaveina o pisinisi a le kamupani.

(3) Afai:

(a) O se faatonu ua le mafai ona tausisia le faafuaiupu (1); ma

(b) I le taimi o lea faaletonu sa le mafai ai e le kamupani ona totogi ana aitalafu i le taimi e tatau ona totogi ai i le faagasologa masani o pisinisi; ma

(c) Mulimuli ane ua tuua ai le kamupani i le tulaga e faamaapeina ai,

o lena faatonu ua noatia i so o se tagata o lo o nofo aitalafu ai le kamupani, o ia lea ua faatulai mai ai e le kamupani se noatiaga ina ua tuunai lena taimi e tusa ai ma le faafuaiupu (5).

(4) Afai:

(a) I se fonotaga sa taloina i lalo o lenei fuaiupu ae ua le mafai ona filifili faatonu i le tofiaina o se pule po o se tagata e faamaapeina; ma

(b) I le taimi o lena fonotaga sa leai ni mafuaaga tatau e talitonuina ai e faapea sa mafai e le kamupani ona totogi ana aitalafu i le taimi e tatau ona totogi ai; ma

(c) E mulimuli ane ua tuua ai le kamupani i le tulaga e faamaapeina ai,

o faatonu taitasi uma e ese mai ai i na faatonu sa auai i le fonotaga ma palota mo le tofiaina o se pule po o se tagata e faamaapeina ua noatia i so o se tagata o lo o nofo aitalafu ai le kamupani o ia lea sa faatulai mai ai se noatiaga o le kamupani ina ua tuunai le aso o le fonotaga e tusa ai ma le faafuaiupu (5).

(5) O se faatonu o ia lea ua noatia i se tagata o lo o nofo aitalafu ai le kamupani i lalo o le faafuaiupu (3) po o le faafuaiupu (4) e tusa ai o se noatiaga o le kamupani, ua noatia i lena tagata o lo o nofo aitalafu ai le kamupani mo se aofaiga o so o se gau ua afaina ai lena tagata o lo o nofo aitalafu ai le kamupani ona ua le mafai e le kamupani ona faatino lea noatiaga ae vagana ai ua faatu mai e le faatonu e faapea o lena tagata o lo o nofo aitalafu ai:

- (a) Sa iloa pe sa tatau ona iloa tulaga ua tulai mai na fesiligia ai le tulaga ile mafai e le kamupani ona totogi ana aitalafu; po o
 - (b) I se isi tulaga e ese ai ia talia lamatiaga o le feagai ai ma le kamupani i na tulaga ua tulai mai.
- (6) Afai e sili atu i le tasi le faatonu ua noatia i se tagata o lo o nofo aitalafu ai le kamupani i lalo o lenei fuaiupu, o le noataga o na faatonu ua tuufaatasia ma e le faasoaina.

66. Taunuuga o le faamaoniga autasi a tagata e umia sea i luga o ni tiute a faatonu – Afai o se faatonu ua faatinoina so o se pule po o ua tauaveina so o se isi gaoioiga i lona malosiaga e avea ai o se faatonu i le maliliega po o le taliaina e tagata e umia sea i lalo o le fuaiupu 47:

- (a) O le faatonu ua avea e faapea sa ia faia lava e tusa ai ma manaoga o le fuaiupu 61; ma
- (b) Afai, i le taimi na faia ai e le faatonu lea gaoioiga, o lo o i ai mafuaaga tatau e talitonu ai e faapea e mafai e le kamupani ona totogi ana aitalafu i le taimi e tatau ona totogi ai, o lena faatonu ua avea e faapea sa faia lena gaoioiga e tusa ai ma manaoga o le fuaiupu 59 ma le 64.

Tofiga ma le litaea o faatonu

67. Agavaa o faatonu-(1) E mafai ona tofia se tagata ma umia le tofiga e avea ai o se faatonu o se kamupani, ae na o lenei:

- (a) O lena tagata o se tagata moni; ma
 - (b) O lena tagata e le i faaleaogaina mai le avea o se faatonu i lalo o le faafuaiupu (2).
- (2) O tagata ua taua i lalo ua faaleaogaina mai le avea ma faatonu o se kamupani:
- (a) O se tagata e i lalo ifo o le 21 tausaga le matua;
 - (b) O se tagata e le i faamatuueseina le gaumativa;
 - (c) O se tagata o ia lea sa faia i ai se poloaiga a le Faamasinoga i lalo o le fuaiupu 189 o le Tulafono o Kamupani 1955, e faasa ai lena

tagata mai le avea ma faatonu o po o le aafia po o le auai i le pulega o se kamupani po o ia lea ua faasaina e tusa ai o sea poloaiga peitai mo le soloia o lena Tulafono;

- (d) O se tagata ua fasaina mai le avea o se faatonu po o se tagata e falauiloaina po o le aafia po o le auai i le pulega o se kamupani i lalo o le fuaiupu 202 po o le 203 po o le 204 o lenei Tulafono;
 - (e) O se tagata ua faailoa mai e le atoatoa le malosi o le mafaufau i lalo o le Tulafono o le Tulaga Maloloina o le Mafaufau 1961;
 - (f) E faasino i so o se kamupani faapitoa, o se tagata ua le tausisia so o se agavaa mo faatonu o lo o aofia i totonu o Mataupu o Faavae a lena kamupani.
- (3) O se tagata ua faaleaogaina mai le avea o se faatonu, ae o ia lea ua galue e avea o se faatonu ua amanaia e avea ma faatonu mo le faamoemoe o so o se aiaiga o lenei Tulafono o lo o faaee atu ai se tiute po o se noatiaga i luga o se faatonu a se kamupani.

68. Tofiga o faatonu-(1) O se tagata ua taua o se faatonu i totonu o se tusi talosaga mo le faamauina po o se talosaga tau i le tuufaatasiga o lo o umia le tofi e avea ai o se faatonu mai le aso o le faamauina po o le aso o le a faaaoga ai le talosaga o le tuufaatasiga, po o le a lava le tulaga e i ai, seia vagana ai o lena tagata ua faamutaina le umia o le tofi e avea ai o se faatonu e tusa ai ma lenei Tulafono.

(2) E mafai e faatonu uma o se kamupani e mulimuli mai ai, ae vagana ai ua aiaia e Mataupu o Faavae a le kamupani se isi tulaga e ese mai ai, ona tofia e ala i se iugafono masani.

(3) O le tofiga o se tagata e avea o se faatonu o le a le amanaiaina seia vagana ua faia se maliega tusingusia a lena tagata e galue ai e avea o se faatonu a le kamupani.

69. Faatonu ua faamutaina le umia o le tofi-(1) O le tofiga o le faatonu o se kamupani ua avanoa pe afai o le tagata o lo o umia lena tofi:

- (a) Ua faamavae e tusa ai ma le faafuaiupu (2); po o

- (b) Ua aveesea mai le tofi e tusa ai ma le faafuaiupu (3) po o Mataupu o Faavae a le kamupani; po o
 - (c) Ua faaleaogaina mai le avea o se faatonu e tusa ai ma le fuaiupu 67 (2) po o
 - (d) Ua maliu; po o
 - (e) I se isi tulaga e ese mai ai ua avanoa ai le tofi e tusa ai ma Mataupu o Faavae a le kamupani.
- (2) E mafai e se faatonu o se kamupani ona faamavae e ala i le sainia o se faasilasilaga tusitusia o le faamavaega ma auina atu i le ofisa faamauina o le kamupani. I le noatia ma le fai fuafua i le faafuaiupu (4) ma le (5), o le a faaogaina le faasilasilaga pe afai e maua i lena tuatusi po o i se taimi mulimuli ane o lo o faamaoti mai i totonu o le faasilasilaga.
- (3) I le noatia ma le fai fuafua i Mataupu o Faavae a le kamupani, e mafai ona aveesea se faatonu e ala i se iugafono masani.
- (4) Afai o se kamupani e na o le toatasi le faatonu, e le mafai ona faamavae lena faatonu mai le tofi:
- (a) Seia vagana ai ua taloina e lena faatonu se fonotaga a tagata e umia sea e taliaina ai le faasilasilaga o le faamavaega; po o
 - (b) Pe afai o le kamupani e na o le toatasi le tagata e umia sea, seia vagana ai ua tuuina atu e lena faatonu i lena tagata e umia sea le faasilasilaga o le faamavaega e le itiiti ifo i le 10 aso faigaluega.
- (5) O se faasilasilaga ua tuuina atu e se faatonu o se kamupani o le a le amanaia, e ese mai ai i ana tuutuuga, seia vagana ua tofia muamua se isi faatonu a le kamupani po o:
- (a) Le taimi ma le aso e taloina ai se fonotaga a tagata e umia sea i lalo o le faafuaiupu (4)(a); po o
 - (b) Pe afai e na o le toatasi le tagata e umia sea a le kamupani, ia 10 aso faigaluega talu ai le tuuina atu o le faasilasilaga o le faamavaega i lena tagata e umia sea.
- (6) E ese mai ai i le avanoa o le tofi, o se tagata sa umia le tofi e avea ai o se faatonu e tumau pea ona noatia i lalo o aiaiga o lenei Tulafono o lo o faaee atu ai noataga i luga o faatonu e faasino i gaoioiga, o mea ua le faia ma faaiuga sa faia ao avea lena tagata ma faatonu.

70. Faasilasilaga o le suia o faatonu-(1) E tatau i se kamupani ona mautinoa e faapea o le faasilasilaga i le faiga ua faatonuina o:

- (a) Se suiga i faatonu o se kamupani, pe ona e talu ai o se faatonu ua faamuta le umia o le tofi po o le tofiga o se faatonu fou po o tulaga uma ia e lua; po o
 - (b) Se suiga i le igoa po o tuatusi nofomau po o tuatusi o falemeli a se faatonu o se kamupani –
- ua auina atu i le Resitara mo le faamauina.

(2) O se faasilasilaga i lalo o le faafuaiupu (1) e tatau:

- (a) Ona faamaoti ai le aso o le suiga; ma
- (b) Ia aofia ai le igoa atoa ma le tuatusi nofomau ma le tuatusi o le falemeli o tagata taitasi uma o ia lea o se faatonu o le kamupani mai le aso o le faasilasilaga; ma
- (c) I le tulaga tau i le tofiaina o se faatonu fou, ia faapipii mai ai se maliiega a lena tagata e galue ai e avefa ma se faatonu i se faiga ua faatonuina; ma
- (d) Auina atu i le Resitara i totonu o le 20 aso faigaluega o -
 - (i) le suiga ua faatulai mai i le tulaga tau i le tofiga po o le faamavaega a se faatonu; po o
 - (ii) ia malamalama muamua le kamupani i le suiga i le tulaga tau i le maliu o se faatonu, po o se suiga i le igoa po o le tuatusi nofomau po o le tuatusi o le falemeli a se faatonu.

(3) Afai ua le mafai ona taasisia e se kamupani lenei fuaiupu:

- (a) Ua faia e le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i totonu o le fuaiupu 194(2); ma
- (b) Ua faia e faatonu taitasi uma o le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i totonu o le fuaiupu 195(2).

Faatonu ua fuafuaina

71. Tagata ua fuafuaina e avea ma faatonu mo faamoe-moega o noataga-(1) O se tagata (“o le ulu”) e tusa ai ma ana taitaiga po o faatonuga o lo o manaomia i se faatonu po o ua masani e galue o se faatonu ua noatia i lalo o le fuaiupu 59 i le 65 i le tulaga lava e tasi e pei o lena faatonu, ae vagana ai ua faaalai mai e le ulu e faapea e le i galue le faatonu e tusa ai ma le taitaiga a le ulu po o faatonu e galue ai po o ua le mafai ona galue i le ala ua mafua ai ona tulai mai le noataga i le vaega a le faatonu.

(2) O se tagata o ia lea ua faatinoina po o ia lea ua agavaa e faatino po o ia lea e pulea po o ia lea ua agavaa e pulea le faatinoina o pule, e ese mai ai i Mataupu o Faavae a le kamupani, o le a pau atu ina ia faatinoina e faatonu, ua noatia i lalo o fuaiupu 59 i le 64 e tusa ai ma le faatinoina o na pule e pei ai lena tagata sa avea o se faatonu.

(3) E aunoa ma le faatapulaaina ai o le faafuaiupu (2). Afai ua faaee atu e Mataupu o Faavae a se kamupani se pule i luga o tagata e umia sea e faapea e tatau ona tuuina atu e faatinoina e faatonu i lalo o lena Tulafono, so o se tagata e umia sea o ia lea ua faatinoina lena pule po o sa auai i le filifiliga pe faatinoina lena pule ua noatia i lalo o fuaiupu 59 e oo i le 64 e tusa ai o lena pule e pei ai lena tagata sa avea o se faatonu.

(4) E aunoa ma le faatapulaaina ai o le faafuaiupu (2) afai e manaomia e Mataupu o Faavae a se kamupani se faatonu po o faatonu e faatino pe aloese mai i le faatinoina o se pule e tusa ai o se faaiuga po o taitaiga a tagata e umia sea; so o se tagata e umia sea e auai i:

(a) Le faia o so o se faaiuga e faapea e tatau po o e le tatau ona faatinoina le pule; po o

(b) Le faia o so o se faaiuga pe tuuina atu se faatonuga - po o le a lava le tulaga e i ai, ua noatia i lalo o fuaiupu 59 e oo i le 64 e tusa ai ma le faatinoina o lena pule e faapei ai lena tagata sa avea o se faatonu.

(5) Afai o se tagata sa faasoa tuusao i ai se pule po o se tiute o faatonu i luga o le maliega a lena tagata po o le

faatagaga, po o ia lea ua faatinoina le pule po o le tiute i luga o le maliiega po o le faatagaga a faatonu ua noatia i lalo o fuaiupu 59 e oo i le 64 e tusa ai o le faatinoina o na pule e faapei ai lena tagata sa avea o se faatonu.

(6) Mo le aloese mai i masalosaloga, afai ua faamaonia e tagata uma e umia sea so o se gaoioiga i lalo o le fuaiupu 47:

- (a) E leai se tagata e umia sea e noatia i lalo o le fuaiupu 61 e tusa ai o lena gaoioiga;
- (b) Pe afai o lo o i ai mafuaaga tatau e talitonu ai e faapea e mafai e le kamupani ona totogi ana aitalafu pe a oo i le taimi e ao ona totogi, e leai se tagata e umia sea e noatia i lalo o fuaiupu 59 po o le 62 po o le 63 po o le 64 e tusa ai o lena gaoioiga.

Faamagaloga ma inisiua mo faatonu

72. Nisi faamagaloga ua faasaina-(1) E le mafai e se kamupani ona faamagaloga se faatonu o le kamupani po o so o se kamupani e fesootai i ai e tusa ai o:

- (a) So o se noataga tau soligatulafono; po o
 - (b) So o se noataga i le kamupani po o se kamupani e fesootai i ai mo so o se gaoioiga po o se mea ua le faia i lona malosiaga e avea ai o se faatonu o le kamupani po o le kamupani e fesootai ai po o le a lava le tulaga e i ai; po o
 - (c) So o se noataga i so o se tagata ua tulai mai i le solia e lena tagata o se tiute i le kamupani po o le kamupani e fesootai i ai, po o le a lava le tulaga e i ai i lalo o fuaiupu 59, 60, 61, 62, 63 po o le 65.
- (2) O se faamagaloga ua tuuina atu e solia ai lena fuaiupu ua faaleaogaina.
- (3) I totonu o lena fuaiupu:
 “Faatonu” e aofia ai -
- (a) Se tagata ua noatia i lalo o so o se fuaiupu o fuaiupu 59 e oo i le 65 e tusa ai ma le fuaiupu 71.
 - (b) O se faatonu sa i ai muamua.

“Faamagaloga” e aofia ai le faamalolo po o le tuusaunoa mai noataga pe muamua mai po o le uma ona tulai mai o le noataga; ma
 “faamagaloga” o lo o i ai se uiga e tali tutusa ai.

73. E mafai e le kamupani ona faamagalo pe inisiua faatonu – I le noatia ma le fai fuafua i le fuaiupu 72, e mafai e se kamupani ona tuuina atu se faamagaloga po o le faatau mai o se inisiua mo se faatonu o le kamupani po o se kamupani e fesootai i ai:

- (a) E tusa ai ma ana Mataupu o Faavae; po o
- (b) I luga o le faamaoniga a tagata e umia sea i lalo o le fuaiupu 47.

Aiaiga eseese e faasino i faatonu

74. Totogi o faatonu – E mafai ona maua totogi o faatonu ma isi faamanuiaga mai le kamupani:

- (a) E tusa ai ma ana Mataupu o Faavae; po o
- (b) I luga o le faamaoniga a tagata e umia sea i lalo o le fuaiupu 47.

75. Tausalumaga a faatonu – O tausalumaga a faatonu o se kamupani e pulea e ana Mataupu o Faavae.

**VAEGA VII
 FAAMAMALUINA**

Poloaiga a le faamasinoga e manaomia ai le tausisia o le Tulafono ma Mataupu o Faavae a le kamupani

76. Poloaiga a le faamasinoga e manaomia ai le tausisia o le Tulafono ma Mataupu o Faavae a le kamupani-(1) E aunoa ma le faatapulaaina ai o le fuaiupu 16(2) po o isi aiaiga o lenei Vaega, e mafai e le Faamasinoga, i luga o se tusi talosaga i lalo o lenei fuaiupu, ona faia se poloaiga e taofia ai se kamupani po o se faatonu o se kamupani o ia lea ua talosaga e auai i se gaoioiga o le a solia ai Mataupu o Faavae a le kamupani po o lenei Tulafono mai le auai i lena gaoioiga.

(2) E mafai ona faia se tusi talosaga i lalo o lenei fuaiupu e:

(a) Le kamupani; po o

(b) Se faatonu po o se tagata e umia sea a le kamupani.

(3) Afai e faia e le Faamasinoga se poloaiga i lalo o le faafuaiupu (1), e mafai foi ona ia tuuina atu se faamama avega faatupulaia ua manatu o ia ua talafeagai ai.

(4) E le mafai ona faia se poloaiga i lalo o lenei fuaiupu e faasino i gaoioiga po o le faagasologa o se gaoioiga e faapea ua uma ona faamaeaina.

(5) E mafai a le Faamasinoga i so o se taimi a o lei faia se iloiloga mautu o se tusi talosaga i lalo o le faafuaiupu (1) ona faia e avea o se poloaiga le tumau, so o se poloaiga e faapea ua i ai ia te ia le malosiaga e faia ai i lalo o lenei faafuaiupu.

Gaoioiga e afua mai isi gaoioiga

77. Gaoioiga e afua mai isi gaoioiga-(1) I le noatia ma le fai fuafua i le faafuaiupu (4), e mafai e le Faamasinoga, i luga o le tusi talosaga a se tagata o lo o faasinomia i ai le faafuaiupu (2) ona tuuina atu le faatagaga i lenei tagata e:

(a) Aumai ai taualumaga i le igoa ma le avea ai ma sui o le kamupani po o so o se lala o le kamupani; po o

(b) Le faauilavea i taualumaga o lo o avea ai le kamupani po o so o se kamupani ua avea ma lala, ma vaega mo le faamoemoe o le faaauauina, puipuia po o le le toe faaauauina o taualumaga e avea ai ma sui o le kamupani po o le lala po o le a lava le tulaga e i ai.

(2) O se tusi talosaga mo se faatagaga e aumai ai taualumaga po o le faauilavea i taualumaga i lalo o lenei fuaiupu e mafai ona faia e -

(a) Se faatonu o le kamupani; po o

(b) Se tagata e umia sea po o tagata e umia sea o lo o avea ma sui o aia tatau tau palota e le itiiti ifo i le 10% a tagata uma e umia sea ua agavaa e palota i luga o se iugafono e teuteu ai Mataupu o Faavae a le kamupani.

(3) E aunoa ma le faatapulaaina ai o le faafuaiupu (1) i le fuafuaina pe tuuina atu le faatagaga i lalo o lena faafuaiupu, e tatau ona silasila le Faamasinoga i le:

- (a) Tulaga e ono faamanuiaina ai taualumaga;
- (b) Tau o taualumaga e faasino i le faamama avega e ono mafai ona maua;
- (c) So o se gaioioiga ua maea ona faia e le kamupani po o le lala o le kamupani e maua ai le faamama avega.
- (d) Aia a le kamupani po o le lala a le kamupani i taualumaga ua amataina, faaauau, puipui po o ua le toe faaauauina po o le a lava le tulaga e i ai.

(4) O le faatagaga e aumai ai taualumaga po o le faauilavea i taualumaga e mafai ona tuuina atu i lalo o le faafuaiupu (1) ae vagana ua faamalieia le faamasinoga e faapea pe:

- (a) O le kamupani po o le lala o le kamupani e le manao e aumai, faaauau ma le faamoni po o le puipuia po o le le toe faaauauina o taualumaga po o le a lava le tulaga e i ai;
- (b) O lo o i ai i le aia a le kamupani po o le lala o le kamupani e faapea o le faagaoioia o taualumaga e le tatau ona tuua i faatonu po o i le fuafuaga a tagata e umia sea i le tulaga aoao tetele.

(5) E tatau ona tufaina atu le faasilasilaga o le tusi talosaga i le kamupani po o le lala o le kamupani.

(6) O le kamupani po o le lala o le kamupani:

- (a) E tatau ona faailoa i le Faamasinoga pe ua ia manao e aumai, faaauau, puipui, po o le le toe faaauauina o taualumaga pe leai po o le a lava le tulaga e i ai; ma
- (b) E mafai ona auai ma tautala atu.

(7) Ae vagana ai e pei ona aiaia i totonu o lenei fuaiupu, e le agavaa se tagata e umia sea e aumai pe faauilavea i so o se taualumaga i le igoa o po o le avega ma sui o se kamupani po o sona lala.

(8) E tatau i le Faamasinoga i luga o le tusi talosaga a le tagata o ia lea ua tuu atu i ai le faatagaga i lalo o lenei fuaiupu, ona poloia e faapea o tau atoa po o se vaega o tau atoa o le

aumaia po o le faauilavea i taualumaga, e aofia ai so o se tau e faasino i so o se faaiuga, maliega fetuunai po o le le faaauauina ua faamaonia i lalo o le faafuaiupu (9) e tatau ona totogi e le kamupani vagana ai ua manatu le Faamasinoga e faapea o le a le amiotonu pe le talafeagai mo le kamupani le tauaveina o na tau.

(9) E mafai e le Faamasinoga, i so o se taimi, ona faia so o se poloaiga ua manatu o ia ua talafeagai ai e faasino i taualumaga sa aumai pe sa faalavelaveina i le faatagaga a le Faamasinoga i lalo o lenei fuaiupu ma le aunoa ma le faatapulaaina ai o le tulaga aoao tetele o lenei fuaiupu e mafai ona:

- (a) Faia se poloaiga e faatagaina ai se tagata o ia lea sa tuuina atu i ai se faatagaga po o so o se tagata e pulea ai le faagaoioiga o taualumaga;
- (b) Tuuina atu taiala mo le faagaoioiga o taualumaga;
- (c) Faia se poloaiga e manaomia ai le kamupani po o faatonu ia tuuina mai faamatalaga po o fesoasoani e faasino i taualumaga;
- (d) Faia se poloaiga e faatonu ai le totogiina o so o se aofaiga sa poloaia e ao ona totogi mai e se itu tetee i taualumaga, ia totogi atoa atu po o se vaega i tagata e umia sea sa i ai muamua ma e o lo o i ai i le taimi nei a le kamupani po o le lala ae le o le faia i le kamupani po o le lala.

(10) E leai ni taualumaga sa aumaia pe faalavelaveina i luga o le faatagaga a le Faamasinoga i lalo o lenei fuaiupu e mafai ona foia, fetuutuunai pe le toe faaauauina e aunoa ma le faamaoniga a le Faamasinoga.

Gaoioiga tau i le tagata lava ia a tagata e umia sea

78. Gaoioiga tau i le tagata lava ia e faia e tagata e umia sea e faasaga i le kamupani-(1) E mafai e se tagata e umia sea a se kamupani ona faia se gaoioiga e faasaga i le kamupani mo le solia o se tiute o nofo aitalafu ai le kamupani ia te ia i le avea ai ma tagata e umia sea.

(2) E mafai e le Faamasinoga, i luga o se tusi talosaga a se tagata e umia sea a le kamupani, pe afai ua faamalieina o ia e faapea o se mea amiotonu ma talafeagai le faia o lea tulaga, ona faia se poloaiga e manaomia ai le kamupani ia faia so o se gaoioiga e faapea ua manaomia e Mataupu o Faavae a le kamupani po o lenei Tulafono e ao ona faia, pe o nofo aitalafu le kamupani i le tagata e umia sea ua faia ai lea gaoioiga pe leai. I luga o le faia o sea poloaiga, e mafai e le Faamasinoga ona tuu atu sea faamama avega faatupulaia e pei ona manatu o ia ua talafeagai ai.

79. Gaoioiga tau i le tagata lava ia e faia e tagata e umia sea e faasaga i faatonu-(1) E mafai e se tagata e umia sea po o se tagata e umia sea sa i ai muamua ona faia se gaoioiga e faasaga i se faatonu mo se tiute o nofo aitalafu ai ia te ia i le avea ai ma tagata e umia sea.

(2) E le mafai ona faia se gaoioiga i lalo o le faafuaiupu (1) ina ia toe faaola ai so o se gau i le faiga e faaitiitia ai le aoga o sea i totonu o le kamupani po o le le mafai e sea ona siitia le aoga ona o le mafuaaga o le gau ua afaina ai po o se faamanuiaga ua leiloa i le kamupani.

(3) E mafai e le Faamasinoga i luga o le tusi talosaga a se tagata e umia sea a se kamupani, pe afai ua manatu o ia o se mea amiotonu ma talafeagai le faia o lea tulaga, ona faia se poloaiga e manaomia ai se faatonu o le kamupani e faia so o se goaioiga ua manaomia le faia e faatonu i lalo o Mataupu o Faavae a le kamupani po o lenei Tulafono pe o le faatonu o nofo aitalafu i le tagata e umia sea e faia ai lena gaoioiga. I luga o le faia o sea poloaiga e mafai e le Faamasinoga ona tuu atu se faamama avega faatupulaia e pei ona manatu o ia ua talafeagai ai.

80. Gaoioiga i le avea ai ma sui – Afai o se tagata e umia sea a se kamupani ua aumaia tualumaga e faasaga i le kamupani po o se faatonu faapea ma isi tagata e umia sea o lo o i ai aia tutusa po o le sili atu foi o aia e faasino i mataupu o tualumaga, e mafai e le Faamasinoga ona tofia lena tagata e umia sea e avea ma sui o tagata uma e umia sea po o nisi o

tagata e umia sea o lo o i ai aia tutusa po o le sili atu foi ma e mafai, mo lena faamoemoe, ona faia sea poloaiga ua ia manatu ua talafeagai ai, e aunoa ma le faatapulaaina ai o le tulaga aoao tetele o lenei fuaiupu, o se poloaiga e aofia ai:

- (a) Le puleaina ma le faagaoioia o taualumaga;
- (b) Tau o taualumaga;
- (c) Faatonuina o le faasoasoaga o so o se aofaiga ua poloaia ina ia totogi mai e se itu tetee i taualumaga i le va o tagata e umia sea o lo o suitulaga ai o latou sui.

Tagata e umia sea ua aafia i faufauga le tonu

81. Tagata e umia sea ua aafia i faufauga le tonu-(1) O se tagata e umia sea po o se tagata e umia sea sa i ai muamua a se kamupani o ia lea ua manatu e faapea o mataupu a se kamupani sa faia, po o lo o faia po o e foliga mai o le a faia i se ala e faapea ua po o so o se gaoioiga po o gaoioiga a le kamupani sa faia po o lo o faia po o e foliga mai o le a faia i se ala faatupu faalavelave, le amiotonu, faailoga tagata po o faufauga le tonu ia te ia i lena tulaga, po o i so o se isi malosiaga, e mafai ona talosaga i le Faamasinoga i lalo o lenei Tulafono.

(2) Afai, i luga o se tusi talosaga ua faia i lalo o lenei fuaiupu, ua manatu le Faamasinoga e amiotonu ma talafeagai i le faia o lea tulaga, e mafai e ia ona faia sea poloaiga ua manatu o ia ua talafeagai ai, e aunoa ma le faatapulaaina ai o le tulaga aoao tetele o lenei fuaiupu, e aofia ai se poloaiga:

- (a) E manaomia ai le kamupani po o so o se isi tagata ina ia mauaina sea a le tagata e umia sea; po o
- (b) Le manaomia o le kamupani po o so o se isi tagata e totogi se tau i se tagata; po o
- (c) Le faatonuina o le faagaoioia i le lumanai o mataupu a le kamupani; po o
- (d) Se suiga po o se faaopoopoga i Mataupu o Faavae a le kamupani; po o
- (e) Le tofia o se tagata e faamaapeina meatotino a le kamupani; po o
- (f) Le faatonuina o faasaoga o faamaumauga a le kamupani; po o

- (g) Le tuuina atu o le kamupani i le faamaapeina; po o
 - (h) Le tuueseina o gaoioiga ua faia e le kamupani po o le komiti faatino e solia ai lenei Tulafono po o Mataupu o Faavae a le kamupani.
- (3) E leai se poloaiga e mafai ona faia e faasaga i le kamupani po o so o se isi tagata i lalo o le faafuaiupu (2) vagana ai ua avea le kamupani po o lena tagata ma vaega i le taulumaga o lo o ua faia i ai le tusi talosaga.

82. O ni faiga ua avea e faapea o ni faufauga le tonu-(1)
 O le le mafai ona tausisia o so o se fuaiupu o lenei Tulafono ua taua i lalo, o se gaoioiga ua avea e faapea o faufauga le tonu e le talafeagai mo le faamoemoe o le fuaiupu 81:

- (a) Fuaiupu 20(1) (o lo o faasino i le tuuina atu o sea);
 - (b) Fuaiupu 24 (o lo o faasino i tufatufaga);
 - (c) Fuaiupu 25 (o lo o faasino i le mauaina o sea ese kamupani);
 - (d) Fuaiupu 28 (o lo o faasino i le toe faaolaina mai o sea);
 - (e) Fuaiupu 30 (o lo o faasino i aiaiga o fesoasoani tau tupe a se kamupani e maua ai ana lava sea);
 - (f) Fuaiupu 46 (o lo o faasino i galuega faatino tetele);
 - (g) Fuaiupu 50 (o lo o faasino i le suiga o aia tatau a tagata e umia sea, o le faagaoioiga ua avea e faapea sa fuafuaina).
- (2) O le uiga o upu o faiga o lo o avea e faapea “o faufauga le tonu e le talafeagai” i totonu o le faafuaiupu (1) e le o faatapulaaina i mataupu o lo o faasinomia i ai i totonu o le faafuaiupu (1).

83. Suiga i Mataupu o Faavae a le kamupani e le Faamasinoga-(1) E ese mai ai i so o se mea o i totonu o lenei Tulafono, ae i le noatia ma le fai fuafua i le poloaiga, pe afai ua faia e le Faamasinoga se poloaiga i lalo o le fuaiupu 81, e suia ai po o le faaopoopo atu i Mataupu o Faavae a se kamupani, e le tatau i Mataupu o Faavae a se kamupani i le tulaga ua oo i ai le suiga po o le faaopoopoga i ai e le Faamasinoga, ona toe suia pe faaopoopoina e aunoa ma le faatagaga a le Faamasinoga.

(2) So o se suiga po o faaopoopoga i Mataupu o Faavae a se kamupani ua faia i luga o se poloaiga i lalo o le fuaiupu 81 ua i ai le taunuuga lava e tasi e pei ai sa faia e tagata e umia sea a le kamupani e tusa ai ma le fuaiupu 14, ma aiaiga o lenei Tulafono e faaoga i Mataupu o Faavae a le kamupani e pei ona suia ma faaopoopoina i ai.

(3) I totonu o le 10 aso faigaluega o le faia o se poloaiga i lalo o le fuaiupu 81, e suia ai pe faaopoopo i ai i Mataupu o Faavae a se kamupani, e tatau i le kamupani ona faamautinoa ua auina atu i le Resitara mo le faamauina se ata o Mataupu o Faavae e pei ona suia po o ua faaopoopoina ma se ata o le poloaiga.

(4) Afai ua le mafai e le kamupani ona tausisia le faafuaiupu (3):

- (a) Ua faia e le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i le fuaiupu 194(2);
- (b) Ua faia e faatonu taitasi uma o le kamupani se solitulafono ma ua noatia i se moliaga ua faamaonia faaletulafono i le faasalaga ua faatulaga mai i le fuaiupu 195(2).

84. Taunuuga o le fuaiupu tau i faiga e teuteu ai se finauga i le faaiuga a ni sui lautogia i totonu o Mataupu o Faavae a le kamupani – E agavaa se tagata e umia sea e talosaga i le Faamasinoga mo se faamama avega i lalo o fuaiupu 76, 77, 78, 79, ma le 81 e ese mai ai i so o se aiaiga i totonu o Mataupu o Faavae a se kamupani e manaomia ai feeseeseaiga e faasino i mataupu a le kamupani ina ia tuuina atu i faiga e teuteuina ai se finauga i le faaiuga a ni sui se toalua, po o i se isi tulaga e ese mai ai ia saili ina ia faasaina le tagata e umia sea mai le faia o sea tusi talosaga.

85. Tusi talosaga mo se faamama avega e faia e le Loia Sili-(1) E mafai ona talosaga le Loia Sili i le Faamasinoga mo se poloaiga e tusa ai o se kamupani a le Malo (mo tagata lautele) i lalo o fuaiupu 76, 77, 78, 79 ma le 81 e pei ai le Loia Sili sa avea ma tagata e umia sea a lena kamupani pe afai:

- (a) Ua talosagaina le Loia Sili e faia lea tulaga i se tusi a se tagata e umia sea po o tagata e umia sea o i latou ia e agavaa e faia le tusi talosaga ua fesiligia; ma
- (b) Ua manatu le Loia Sili e faapea o lo o i ai i le aia a tagata lautele e tatau ai ona faia le tusi talosaga; ma
- (c) Ua manatu le Loia Sili e faapea e le tatau ona faamoemoe e faia e le tagata po o tagata le talosaga ina ia tulituliloa ai e i latou lava le tusi talosaga.

(2) Afai ua manatu le Loia Sili e faapea o tagata ua faia se talosaga i lalo o le faafuaiupu (1) e tatau ona tauaveina se vaega o taua o so o se talosaga, e manaomia e le Loia Sili i latou e totogi se aofaiga o ia tau, po o le ulufale atu i se maliega e fai sao ai i ia tau. Afai ua le mafai e i latou ona faia lea tulaga, e mafai e le Loia Sili ona teena le faia o le tusi talosaga, po o le faia o so o se isi laasaga e faasino i le tusi talosaga.

(3) Afai o se tusi talosaga ua faia e le Loia Sili i lalo o lenei fuaiupu, ua mafua ai ona maua ai se tau i tau po o so o se isi tau i tau tupe mo le Loia Sili, po o le kamupani po o tagata e umia sea a le kamupani, ua i ai i le Loia Sili le avanoa muamua e faia ai se tagi i luga o lena tau mo totogi o tau sa faatulai mai e le Loia Sili i le faia o le tusi talosaga.

VAEGA VIII FAIGA MA ISI VAEGA

Faiga ma isi vaega

86. Pule e noatia ai le kamupani-(1) E mafai e se kamupani ona ulufale i se konekarate po o isi noataga e faaono faamalosia e faapea:

- (a) O se noataga e faapea, pe afai e faaulufale atu i ai e se tagata moni e aunoa ma sona sootaga faale-tulafono, o le a, e ala i le tulafono, ona manaomia ina ia faia i se tuutuuga aloaia, e mafai ona faaulufale i ai e fai ai ma sui o le kamupani i se tusi e sainia i lalo o le igoa o le kamupani e -

(i) le toalua po o le sili atu o faatonu e le kamupani; po o

(ii) pe afai e na o le tasi le faatonu e faia e lena faatonu, o lana saina e tatau ona molimauina; po o

(iii) pe afai e aiaia Mataupu o Faavae o le kamupani o lo o faapea ona aiaia, o se faatonu, po o nisi tagata po o vasega o tagata; po o

(iv) le toatasi po o le sili atu o loia ua tofia e le kamupani e tusa ai ma le fuaiupu 87;

(b) O se noataga o lo o faapea, pe afai e faaulufale atu i ai e se tagata moni ua manaomia e le tulafono ina ia faia i se tusitusiga, e mafai ona faaulufale atu i ai e avea ai ma sui o le kamupani -

(i) i le auala ua faamaoti mai i le parakalafa (a); po o

(ii) i se tusi a se tagata o lo o galue i lalo o le pule a le kamupani o lo o ua faaalua po o ua faatatauina;

(c) O se noataga e faapea, afai e faaulufaleina atu i ai e se tagata moni e le manaomia e le tulafono ina ia tusitusia, e mafai ona faaulufale atu i ai e avea ai ma sui o le kamupani e se tagata ua galue i lalo o le pule a le kamupani o lo o ua faaalua po o faatatauina.

(2) E leai se mea i totonu o le faafuiaiupu (1) e puipuia ai se kamupani mai i le faapipiina atu o lana faailoga aloaia i se konekarate po o se pepa aloaia, pe afai e i ai. Ae ese mai ai i se mea o i totonu o Mataupu o Faavae o le kamupani, o le leai o se faailoga aloaia e le aafia ai le mafai ona faamalosi o se noataga ua faaulufaleina i ai e tusa ai ma le faafuiaiupu (1).

(3) O le faafuiaiupu (1) e faaoga i se konekarate po o isi noatiaga:

(a) Pe o le konekarate po o le noataga sa faaulufaleina atu i ai i totonu o Samoa pe leai; ma

(b) Pe o le tulafono e pulea ai le konekarate po o le noataga o se tulafono a Samoa pe leai.

87. Loia-(1) I le noatia ma le fai fuafua i ana Mataupu o Faavae, e mafai e se kamupani, e ala i se pepa faaletulafono tusitusia ua faia e tusa ai ma le fuaiupu 86(1)(a), ona tofia se tagata e avea ma ana loia pe i le tulaga lautele po o le faasino i se mataupu ua faamaoti mai.

(2) O se gaoioiga a le loia e tusa ai ma se pepa faaletulafono e noatia ai le kamupani.

(3) O aiaiga o le Vaega XII o le Tulafono o Meatotino Faaletulafono 1952 e faaaogaina, faatasi ai ma fesuaiga talafeagai, e faasino i se pule a le loia ua faia e se kamupani i le tulaga lava e tasi e pei ai le kamupani o se tagata e moni ma e pei ai o le amataga o le faamaapeina po o, pe afai e leai se faamaapeina, o le aveesea mai le tusi resitala, o le kamupani e pei o le oti o se tagata i totonu o le uiga o lea Vaega.

88. Tulaga e aloaia ai feuaiga ma isi vaega-(1) I le noatia ma le fai fuafua i fuaiupu 90 ma le 91, o le aloaia o se galuega faatino ua ulufale atu i ai se kamupani e le aafia i:

- (a) Le le mafai ona tausisia o so o se aiaiga o lenei Tulafono e ese mai ai i le fuaiupu 86;
 - (b) Le le mafai ona tausisia Mataupu o Faavae a le kamupani;
 - (c) Le leai o se pule o lo o faaalua e ulufale atu ai i se galuega faatino i totonu o Mataupu o Faavae a le kamupani;
 - (d) O le le mafai e le kamupani po o ana faatonu ona tauaveina so o se laasaga e manaomia e Mataupu o Faavae a le kamupani e faataga ai le ulufale atu i le galuega faatino;
 - (e) Le mea moni e faapea o le galuega faatino e le mo le lelei o le kamupani;
 - (f) Le solia o se tiute e se faatonu e fesootai ma le ulufale atu i le galuega faatino.
- (2) O le faafuaiupu (1) e le faatapulaaina ai:
- (a) Le fuaiupu 76 (o lo o faasino i le poloaiga a le Faamasinoga e taofia ai faiga a le kamupani e faapea e solia ai ana Mataupu o Faavae); po o
 - (b) Le fuaiupu 77 (o lo o faasino i gaoioiga e afua mai i isi gaoioiga a faatonu ma tagata e umia sea); po o

- (c) Le fuaiupu 78 (o lo o faasino i gaoioiga a tagata e umia sea a se kamupani e faasaga i faatonu); poo
 - (d) Le fuaiupu 79 (o lo o faasino i gaoioiga a tagata e umia sea e faasaga i se kamupani); po o
 - (e) Le noataga ma noatiaga o faatonu o se kamupani e tusa ai ma so o se konekarate po o isi noataga, po o le faaliliuina atu o meatotino i po o e le kamupani.
- (3) I totonu o lenei fuaiupu ma fuaiupu 90 e oo i le 92, “o galuega faatino”:
- (a) E aofia ai so o se konekarate po o isi noatiaga ua ulufale atu i ai se kamupani, po o so o se faaliliuina atu o meatotino i po o e se kamupani;
 - (b) E le aofia ai -
 - (i) se tufatufaga i tagata e umia sea; po o
 - (ii) se faamagaloga ua tuuina atu i se faatonu e tusa ai ma le fuaiupu 73; po o
 - (iii) totogi po o isi faamanuiaga ua tuuina atu i se faatonu e tusa ai ma le fuaiupu 74.

89. Manatu e mafai ona faia e isi vaega-(1) E aunoa ma le faatapulaaina o le fuaiupu 88, ua le o se kamupani, po o se tagata ua tapaina i lalo po o le auala atu i se kamupani, po o se tagata o lo o faamalumu i se noataga a se kamupani, e mafai ona tuuina atu faasaga i se tagata o lo o feagai ma le kamupani po o e faasaga i se tagata ua ia mauaina meatotino, aia tatau, po o aia mai le kamupani e faapea:

- (a) O se tagata ua taua o se faatonu o le kamupani i totonu o se faasilasilaga aupito lata mai na taliaina e le Resitara i lalo o le fuaiupu 70 po o i le tala o le tupe faaletausaga aupito lata mai ua tuuina atu i le Resitara -
 - (i) e le o se faatonu o se kamupani; po o
 - (ii) e le i tofiaina i le taimi e tatau ai; po o
 - (iii) e le o i ai se faatagaga e faatino ai se pule o lo o i ai i se faatonu o se kamupani e tauavea ai pea pisinisi o le ituaiga o lo o tauaveina pea e le kamupani i tulaga masani e i ai le faatagaina e faatino ai;

- (b) O se tagata ua taofia mai e le kamupani e avea o se faatonu, tagata faigaluega po o se sooupu a le kamupani -
- (i) e le i tofiaina i le taimi e tatau ai; po o
 - (ii) e le o i ai le faatagata e faatino ai se pule e tatau i se faatonu, tagata faigaluega po o se sooupu a se kamupani o lo o tauavea pea pisinisi o le ituaiga o lo o tauaveina e le kamupani e masani ona i ai le pule e faatino ai;
- (c) O se tagata ua taoria e le kamupani e avea o se faatonu, tagata faigaluega po o se sooupu a le kamupani ua i ai le faatagata e faatino ai se pule e tatau i se faatonu, tagata faigaluega, po o se sooupu o se kamupani o lo o tauaveina pisinisi o le ituaiga o lo o tauaveina e le kamupani e masani ai ona i ai le pule e faatino ai;
- (d) O se pepa aloaia ua tuuina atu e fai ai ma sui o se kamupani e se faatonu, tagata faigaluega, po o se sooupu a le kamupani faatasi ai ma le faatagaga moni po o le faatagaga masani e tuuina atu ai le pepa aloaia e le aloaia po o e le faamaonia -
- ae vagana ai o le tagata e i ai, po o sa tatau ona i ai, e tusa ai o lona tofiga ma po o lona sootaga i le kamupani, se malamalamaga i mataupu o lo o faasino i ai i so o se parakalafa o le (a), (b), (c) po o (d), po o le a lava le tulaga e i ai, o lenei faafuaiupu.
- (2) O le faafuaiupu (1) e faaaoga e ui lava o se tagata o le ituaiga o lo o faasinomia i totonu o le parakalafa (a) e oo i le (d) o lea faafuaiupu ua faia se gaoioiga faasolitulafono po o le faia faasese o se pepa aloaia ua aliali mai e pei sa sainia i luga o le avea ma sui o le kamupani, vagana ai o le tagata o lo o feagai ma le kamupani po o ma se tagata o ia lea ua mauaina meatotino, aia tatau, po o aia mai le kamupani e i ai se malamalamaga moni i faiga faasolitulafono po o le faaseseina o pepa aloaia.
- (3) E le aafia se tagata i, po o le avea e faapea sa ia matauina po o le iloa o mea o aofia ai i totonu o Mataupu o

Faavae a le kamupani, po o so o se isi pepa aloaia faasino i, se kamupani ona o Mataupu o Faavae a le kamupani po o pepa aloaia ua:

- (a) Faamauina i luga o le tusi resitala a Samoa; po o
- (b) O lo o avanoa mo le asiasia e lea tagata i lalo o le Vaega IX.

90. Galuega faatino o lo o aafia ai faatonu-(1) O se galuega faatino ua faaulufaleina i ai e se kamupani o lo o aafia ai se faatonu i se faiga tuusao pe faaalatua e mafai ona faaleaogaina i le filifiliga a le kamupani, vagana ai:

- (a) O lenei Tulafono po o Mataupu o Faavae a le kamupani o lo o faataga manino ai le ulufale atu i le galuega faatino ae ese mai ai so o se aia; po o
 - (b) O le gaoioiga faapisinisi sa ulufale atu i ai i le faamaoniga a tagata e umia sea i lalo o le fuaiupu 47, ina ua uma ona faailoa atu le uiga ma le tele o aia a le faatonu i tagata uma e umia sea o i latou ia sa le i i ai se malamalamaga i ia mataupu; po o
 - (c) O le isi vaega i le galuega faatino o se tagata e ese mai ai i le faatonu po o se tagata e fesootai ma le faatonu, pe -
 - (i) o lea tagata sa le iloaina le aia a le faatonu; po o
 - (ii) sa mauaina e le kamupani le tau aoga talafeagai i lalo o le galuega faatino.
- (2) Mo faamoemoega o lenei fuaiupu ma le fuaiupu 91, o se tagata e fesootai ma se faatonu pe afai o le faatonu -
- (a) O se matua, fanau po o se toalua o lea tagata; po o
 - (b) O se faatonu, tagata faigaluega po o se tausi mavaega o lena tagata; po o
 - (c) E i ai sona aia faaletupe tele i le isi lena tagata.

91. Galuega faatino ua ulufale i ai faatonu e solia ai ni tiute – O se galuega faatino ua faaulufaleina i ai e se kamupani e mafua mai ona o se gaoioiga sa faia e se faatonu e solia ai le fuaiupu 59 po o le fuaiupu 61 e mafai ona faaleaogaina i le filifiliga a le kamupani pe afai:

- (a) O le isi vaega i le galuega faatino o le faatonu po o se tagata e fesootai ma le faatonu; po o
- (b) O le isi vaega i le galuega faatino o se tagata e i ai sona iloa i tulaga sa aafia ai na tulai mai ai le solia o le fuaiupu 59 po o le fuaiupu 60 po o le fuaiupu 61, ma o le kamupani sa le i mauaina aoga talafeagai i lalo o le galuega faatino.

92. Taunuuga o isi vaega – O le faataatiaeseina i tua o se galuega faatino i lalo o le fuaiupu 90 po o le fuaiupu 91 e le aafia ai le agavaa po o aia a se tagata i totonu po o i meatotino e faapea sa mauaina e lea tagata pe afai o ia meatotino sa mauaina:

- (a) Mai se tagata e ese mai ai i le kamupani; ma
- (b) Mo iloiloga taua; ma
- (c) E aunoa ma le iloa o tulaga sa tulai mai e agavaa ai le kamupani e faataatia le galuega faatino lea sa mau ai meatotino mai le kamupani.

Konekarate na faia muamua a o le i tuufaatasia faaletulafono

93. E mafai ona faamaonia konekarate e faia muamua ao le i tuufaatasia faaletulafono-(1) I totonu o lenei fuaiupu ma i totonu o fuaiupu 94 ma le 95 o le faaupuga “konekarate na faia muamua ao le i tuufaatasia faaletulafono” o lona uiga:

- (a) O se konekarate sa faapea sa faia e se kamupani ao le i tuufaatasia faaletulafono; po o
- (b) O se konekarate sa faia e se tagata e avea ai ma sui o se kamupani muamua atu ma i le manatu o le a faia lona tuufaatasiga faaletulafono.

(2) E ese mai ai i so o se tulafono, e mafai ona faamaonia i se konekarate sa faia muamua ao le i tuufaatasia faaletulafono i totonu o se vaitaimi e pei ona faamaoti mai i totonu o le konekarate, po o pe afai e leai se vaitaimi ua faamaoti mai, ona faia lea i se taimi talafeagai pe a uma le tuufaatasia faaletulafono o le kamupani i le igoa o po o i luga o le avea ma sui o, lea na faia ai.

(3) O se konekarate na faia muamua ao le i tuufaatasia faaletulafono le kamupani e faapea ua faamaonia ua aloaia ma e mafai ona faamalosia e peiseai o le kamupani sa avea ma vaega i le konekarate i le taimi sa faia ai.

(4) O se konekarate na faia muamua ao le i tuufaatasia faaletulafono e mafai ona faamaonia ese kamupani i le auala lava e tasi e pei o se konekarate e mafai ona faaulufaleina i ai e avea ai ma sui o se kamupani i lalo o le fuaiupu 86.

(5) E ese mai ai i so o se isi Tulafono, afai o se konekarate na faia muamua ao le i tuufaatasia faaletulafono e le i faamaonia e se kamupani po o ua faamaonia mai e le Faamasinoga i lalo o le fuaiupu 95, e le mafai e le kamupani ona faamalosia pe avea ni faamanuiaga e maua mai ai.

94. Faamaoniga e faatatau i konekarate e faia muamua ao le i tuufaatasia faaletulafono-(1) E ese mai ai i so o se tulafono po o pule a le tulafono, i totonu o se konekarate na faia muamua ao le i tuufaatasia faaletulafono, ae vagana ai e ese se faamoemoe ua faamatala manino mai i totonu o le konekarate, o lo o i ai se faamaoniga ua faatatauina ai ua faia e le tagata o ia lea sa ia faia le konekarate i le igoa o, po i luga o le avea ma sui o le, kamupani:

(a) E faapea o le kamupani o le a tuufaatasia faaletulafono i totonu o sea vaitaimi e pei ona o le a faamaoti mai i totonu o le konekarate, po o pe afai e leai se vaitaimi ua faamaoti mai ai; ona faia lea i totonu o se taimi talafeagai pe a uma ona faia le konekarate; ma

(b) E faapea o le a faamaonia e le kamupani le konekarate i totonu o sea vaitaimi e pei ona faamaoti mai i totonu o le konekarate, po o pe afai e leai se vaitaimi ua faamaoti mai ai, ona faia lea i totonu o se taimi talafeagai pe a uma le tuufaatasia faaletulafono o le kamupani.

(2) O le aofaiga o mea ua faaleagaina e ono toe faaola mai i se gaoioiga e solia ai se tuutuuga mo le toe faaolaina mai o lo o faaataata mai i le faafuaiupu (1), o le aofaiga lava lea e tasi o mea ua faaleagaina e faapea o le a toe faaola mai i se gaoioiga e

faasaga i le kamupani mo mea ua faaleagaina e solia ai e le kamupani so o se noataga e le i faatinoina i lalo o le konekarate pe afai ua uma ona faamaonia le konekarate.

(3) Afai, ina ua uma lona tuufaatasia faaletulafono o se kamupani, ua ulufale atu i se konekarate i tuutuuga lava e tasi e pei, po o le suitulaga ai mo, o se konekarate na faia muamua ao le i tuufaatasia faaletulafono (e le o le konekarate ua faamaonia e le kamupani i lalo o le fuaiupu 93), o le noataga o se tagata i lalo o le faafuaiupu (1) (e aofia so o se noataga i lalo o se poloaiga ua faia e le Faamasinoga mo le totogi o mea ua faaleagaina) ua faamatuu ese atu ae vagana ai o se faamoemoe e ese mai ai ua faamatala manino i totonu o le konekarate na faia muamua ao le i tuufaatasia faaletulafono.

95. O le le mafai ona faamaonia-(1) O se vaega i se konekarate na faia muamua ao le i tuufaatasia faaletulafono e faapea e le i faamaonia e le kamupani ina ua uma lona tuufaatasia faaletulafono e mafai ona talosaga i le Faamasinoga mo se poloaiga:

- (a) E faatonu ai le kamupani e faafoi atu i lea vaega meatotino o so o se ituaiga na maua mai e le kamupani mai lea vaega e tusa o le konekarate; po o
- (b) Mo so o se isi faamama avega e manuia ai lea vaega e faasino i lea meatotino.

(2) E mafai e le Faamasinoga, pe afai ua manatu faapea e amiotonu ma tulaga tutusa e faia lea, ona faia se poloaiga po o le tuuina atu o so o se faamama avega ua ia manatu ua talafeagai ma e mafai ona ia faia tusa lava po o sea poloaiga sa faia i lalo o le fuaiupu 94(2).

VAEGA IX FAAMAUMAUGA A LE KAMUPANI

Noatiaga e tausia ai faamaumauga

96. Faamaumauga a kamupani-(1) I le noatia ma le fai fuafua i le fuaiupu 98, e tatau i se kamupani ona tausia pepa aloaia ua taua i lalo i lona ofisa faamauina:

- (a) O Mataupu o Faavae a le kamupani;
 - (b) Faamaumauga o mataupu o fonotaga uma ma iugafono a tagata e umia sea i totonu o le fitu (7) tausaga ua tuanai;
 - (c) Faamaumauga o mataupu o fonotaga uma ma iugafono a faatonu ma komiti o faatonu i totonu o le fitu (7) tausaga ua tuanai;
 - (d) Igoa atoa ma tuatusi o faatonu o lo o i ai i le taimi nei;
 - (e) Ata o fesootaiga tusitusia uma i tagata uma e umia sea po o tagata uma e umia le vasega lava e tasi o sea i le gasologa o le fitu (7) tausaga talu ai, e aofia ai lipoti faaletausaga sa faia i lalo o le fuaiupu 52;
 - (f) Ata o faamatalaga tau tupe uma ma vaega o faamatalaga o tupe e manaomia ina ia faamaeaina i lalo o le fuaiupu 111 mo le fitu (7) vaitaimi faaletupe talu ai a le kamupani;
 - (g) O faamaumauga tau tupe e manaomia e le fuaiupu 110 mo le vaitaimi faaletupe o lo o i ai nei ma le fitu (7) vaitaimi faaletupe talu ai a le kamupani;
 - (h) Tusi resitala o sea;
- (2) O faasinomaga i parakalafa (b), (c), ma le (e), o le faafuaiupu (1) i le fitu (7) tausaga ma faasinomaga i parakalafa (f) ma le (g) o lea faafuaiupu i le fitu (7) vaitaimi faaletupe e aofia ai vaitaimi itiiti ifo e pei ona mafai ona faamaonia e le Resitara e ala i se faasilasilaga tusitusia i le kamupani.
- (3) Afai ua le mafai e le kamupani ona tausisia le faafuaiupu (1):
- (a) Ua faia e le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga atu i le 194(2);
 - (b) Ua faia e faatonu taitasi uma o le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga atu i le fuaiupu 195(2).

97. Faiga o faamaumauga-(1) O faamaumauga a se kamupani e tatau ona tausia:

- (a) I se faiga tusitusia; po o
 - (b) I se faiga po o i se auala e faapea e mafai ai e pepa aloaia ma faamatalaga o lo o fausia ai faamaumauga ina ia vave avanoa e ulufale i ai ma ia mafai ona faaaogaina mo faasinomaga, ma ia mafai ona liliuina i se faiga tusitusia.
- (2) E tatau i faatonu ona faamautinoa ua i ai ni fuafuaga talafeagai e:
- (a) Puipuia ai faamaumauga mai i le mafai ona faaseseina;
 - (b) Mafai ona iloa ai so o se taumafaiga e faasese ia faamaumauga.
- (3) Afai ua le mafai e faatonu ona tausisia le faafuaiupu (2), o faatonu taitasi uma ua faia se solitulafono ma ua noatia i luga o se moliaga ua faamaonia faaetulafono i le faasalaga ua faatulaga mai i totonu o le fuaiupu 195(2).

98. Isi nofoaga o faamaumauga-(1) O faamaumauga ua faaisnomia i totonu o parakalafa (a) i le (g) o le fuaiupu 96(1) e mafai ona teuina i se nofoaga i totonu o Samoa e ese mai ai i le ofisa faamauina o le kamupani, pe afai e faapea o le faasilasilaga o lena nofoaga ua tuuina atu i le Resitara e tusa ai ma le faafuaiupu (7).

(2) O le tusi resitala o sea e mafai, pe afai ua faatagaina manino e Mataupu o Faavae, ona vaevaeina i ni tusi resitala se lua (2) po o le sili atu ua teuina i ni nofoaga eseese.

(3) O le tusi resitala autu e tatau ona teuina i totonu o Samoa. So o se isi tusi resitala o sea e mafai ona teuina i se nofoaga i fafo atu o Samoa.

(4) Afai o se tusi resitala o sea ua vaevaeina ini tusi resitala se lua (2) po o le sili atu ua teuina i ni nofoaga eseese:

- (a) Faasilasilaga o le nofoaga o lo o teuina ai tusi resitala taitasi e tatau ona momoli atu i le Resitara ina ia talafeagai ai ma le faafuaiupu (7) i totonu o le 10 aso faigaluega ina ua uma ona vaevae le tusi resitala o sea po o so o se isi nofoaga o lo o teu ai se tusi resitala ua fesui; ma
- (b) O se ata o tusi resitala taitasi e tatau ona tausia i le nofoaga lava e tasi ma le tusi resitala autu; ma

- (c) Pe afai e faaulufaleina se mataupu i totonu o se tusi resitala e ese mai na i lo le tusi resitala autu, e tatau ona faaulufaleina foi lea mataupu tutusa i totonu o le 10 aso faigaluega i le ata o lena tusi resitala o lo o tausia faatasi ma le tusi resitala autu.
- (5) I totonu o lenei fuaiupu, “tusi resitala autu”, e faasino i se kamupani, o lona uiga:
- (a) Pe afai e le i vaevaeina i le lua po o le sili atu le tusi resitala, o le tusi resitala o sea;
- (b) Pe afai ua vaevaeina i le lua po o le sili atu le tusi resitala, o le tusi resitala ua faamatalaina o le tusi resitala autu i le faasilasilaga lata mai nei sa auina atu i le Resitara i lalo o lenei fuaiupu.
- (6) E mafai e se kamupani ona ia le tausia ana faamaumauga o faamatalaga o tupe i totonu o Samoa, i luga o le tulaga pe afai ua le tausia faamaumauga i totonu o Samoa:
- (a) E tatau i le kamupani ona faamautinoa e faapea o faamatalaga o tupe ma tala o faagaoioiga o le kamupani e faapea -
- (i) e faailoa atu ai i le sao talafeagai le tulaga faaletupe o le kamupani i vaitaimi vasai e le itiiti ifo i le ono masina; ma
- (ii) o le a mafai ona faia e tusa ai ma lenei Tulafono ia faamatalaga tau tupe a le kamupani ma so o se isi pepa aloaia e manaomia e lenei Tulafono -
- o le a auina atu i, ma tausia i, se nofoaga i totonu o Samoa; ma
- (b) Faasilasilaga o le nofoa e faapea -
- (i) o faamaumauga o faamatalaga o tupe; ma
- (ii) o faamatalaga o tupe ma tala o gaoioiga faaletupe o lo o manaomia i lalo o le parakalafa
- (a) -
- o lo o tausia, e tatau ona tuuina atu i le Resitara e tusa ai ma le faafuaiupu (7).
- (7) Pe afai o nisi o faamaumauga e le o tausia i le nofoaga faamauina o le kamupani, po o le nofoaga o lo o teuina ai ua suia, e tatau i le kamupani ona faamautinoa e faapea i totonu o

le 10 aso faigaluega talu ona tausia faamaumauga i se isi mea po o ua siitia, po o le a lava le tulaga e i ai, ia tuuina atu se faasilasilaga i le Resitara i nofoaga o lo o tausia ai faamaumauga.

(8) Pe afai ua le mafai e se kamupani ona tausisia le faafuaiupu (3) po o le faafuaiupu (4) po o le faafuaiupu (6) po o le faafuaiupu (7):

- (a) Ua faia e le kamupani se solitulafono ma ua noatia i luga o le moliaga ua faamaonia faaletulafono i le faasalaga ua faatulaga mai i le fuaiupu 194(2); ma
- (b) O faatonu taitasi uma o le kamupani ua ia faia se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i le fuaiupu 195(2).

Asiasia o faamaumauga

99. Asiasia o faamaumauga e faatonu-(1) I le noatia ma le fai fuafua i le faafuaiupu (2), o faatonu taitasi uma o se kamupani e avanoa, i luga o le tuuina atu o faasilasilaga talafeagai, e asiasia ia faamaumauga a le kamupani:

- (a) I se faiga tusitusia; ma
- (b) E aunoa ma se tau; ma
- (c) I se taimi talafeagai e faamaoti mai e le faatonu.

(2) E ono mafai e le Faamasinoga, i luga o se tusi talosaga a le kamupani, pe afai ua faamalieina ia e faapea:

- (a) O le a le tusa ai ma aia o le kamupani mo se faatonu na te asiasia ai faamaumauga; po o
- (b) O le asiasiga o lo o fuafuaina e mo se faamoemoega e faapea e le fesootai ma tiute o le faatonu -

e faatonuina e faapea o faamaumauga e le manaomia ona faaavanoa mo le asiasia po o le faatapulaa le asiasiga o ia faamaumauga i se isi lava auala ua manatu o ia ua talafeagai ai.

100. Asiasia o faamaumauga e tagata e umia sea-(1) E tatau i se kamupani ona tausia faamaumauga o lo o taua i lalo ina ia avanoa mo le asiasia i le agaga ua faatonuina i le fuaiupu

102 e se tagata e umia sea o le kamupani, po o e se tagata ua faatagaina i se tusitusiga e se tagata e umia sea mo lea faamoemoe, o ia lea ua ia tuuina atu se faasilasilaga tusitusia i le kamupani o le faamoemoe e asiasia ai:

- (a) Faamaumauga o mataupu o fonotaga ma iugafono a tagata e umia sea;
 - (b) O ata o fesootaiga tusitusia i tagata uma e umia sea po o latou e umia vasega o sea i le faagasolo ai o le fitu tausaga faatoa tuana'i atu, e aofia ai ma lipoti faaletausaga ma faamatalaga o tupe;
 - (c) O faamaumauga ia e tatau ona avanoa mo le asiasia e tagata lautele i lalo o le fuaiupu 101.
- (2) Pe afai o se kamupani ua le mafai ona tausisia le faafu'aiupu (1):
- (a) Ua faia e le kamupani se solitulafono ma ua noatia i luga o le moliaga ua faamaonia faaletulafono i le faasalaga e pei ona faatulaga mai i le fuaiupu 194(2); ma
 - (b) O faatonu taitasi uma o le kamupani ua ia faia se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i le fuaiupu 195(2).

101. Asiasia o faamaumauga e tagata lautele-(1) E tatau i se kamupani ona tausia ia faamaumauga ua taua i lalo ia avanoa mo le asiasia i le auala ua faatonu mai i le fuaiupu 102 e so o se tagata o ia lea ua tuuina atu i le kamupani faasilasilaga tusitusia o le faamoemoe e asiasia ai:

- (a) Le pepa faamaonia o le tuufaatasia faaletulafono po o le faamauina o le kamupani;
- (b) Ia Mataupu o Faavae o le kamupani, pe afai e ese mai latou mai Mataupu o Faavae ua avea ma taiala;
- (c) O le tusi resitala o sea;
- (d) Faamatalaga tonu o igoa atoa ma tuatusi nofomau o faatonu;
- (e) Faamatalaga tonu o le ofisa faamauina o le kamupani ma lona tuatusi falemeli, pe afai e ese mai i le ofisa faamauina;

- (f) Faamatalaga tonu o so o se isi nofoaga e ese mai i le ofisa faamauina lea o lo o tausia ai faamaumauga e tusa ai ma le fuaiupu 98.
- (2) Pe afai o se kamupani ua le mafai ona tausisia le faafuaiupu (1):
- (a) Ua faia e lea kamupani se solitulafono ua noatia i luga o le moliaga ua faamaonia faaletulafono i le faasalaga e pei ona faatulaga mai i le fuaiupu 194(2); ma
- (b) Ua faia e faatonu taitasi uma se solitulafono ua noatia i luga o le moliaga ua faamaonia faaletulafono i le faasalaga e pei ona faatulaga mai i le fuaiupu 195(2).

102. Ala e faia ai asiasiga o faamaumauga a le kamupani-(1) O pepa aloaia e mafai ona ono asiasia i lalo o le fuaiupu 100 po o le fuaiupu 101 e tataua ona avanoa mo le asiasia i le nofoaga lea o lo o tausia ai faamaumauga a le kamupani i le va o itula o le iva i le taeao ma le lima i le afiafi i totonu o aso faigaluega taitasi ao faagasolo le vaitaimi o le asiasiga.

(2) I totonu o lenei fuaiupu, o le faaupuga “vaitaimi o le asiasiga” o lona uiga o le vaitaimi e amata i le aso faigaluega lona tolu i le tuana'i atu o le aso o lea sa tuuina atu ai le faasilasilaga o le faamoemoe e asiasia e tuuina atu i le kamupani e le tagata po o le tagata e umia sea e faasino i ai ma faaiuina i le aso faigaluega lona valu i le tuana'i atu o le aso sa tuuina atu ai.

(3) E ono mafai ona manaomia e se tagata se ata o le, po o se mea e sii mai, i se pepa aloaia o lo o avanoa mo le asiasia e ia i lalo o le fuaiupu 100 po o le fuaiupu 101 ina ia auina atu ia te ia:

- (a) I totonu o le lima aso faigaluega ina ua uma ona faia o lana talosaga tusitusia mo le ata po o se vaega sii mai; ma
- (b) Pe afai ua uma ona ia totogia se tau fuapauina talafeagai mo le faia o ata ma galuega e pei ona faatonuina e le kamupani.

(4) Pe afai e le mafai e se kamupani ona tuuina atu se ata o, po o se vaega e sii mai, se pepa aloaia ina ia tausisia ai se talosaga i lalo o le faafuaiupu (3):

- (a) Ua faia e lea kamupani se solitulafono ma ua noatia i luga o se moliaga pe a faamaonia faaletulafono i le faasalaga e pei ona faatulaga mai i le fuaiupu 194(2); ma
- (b) Ua faia e faatonu taitasi uma se solitulafono ma ua noatia i luga o se moliaga pe a faamaonia faaletulafono i le faasalaga e pei ona faatulaga mai i le fuaiupu 195(1).

VAEGA X
PEPA ALOAIA E TATAU ONA
AUINA ATU I LE RESITARA

103. Faamatalaga o tupe maua faaletausaga-(1) E tatau i faatonu o se kamupani ona faamautinoa e faapea ua auina atu i le Resitara i tausaga taitasi, mo le faamauina, i totonu o le masina o lo o tuuina atu i le kamupani mo lea faamoemoe, o se faamatalaga o tupe maua faaletausaga:

- (a) I le faiga ua faatonuina po o i le faiga ua faatagaina e le Resitara mo le faaaogaina e le kamupani e tusa ai ma le faafuaiupu (8), po o ia latalata i ai e pei ona faaavanoa e tulaga e tulai mai;
- (b) O lo o i ai faamatalaga faatonuina; ma
- (c) E aumai faatasi ma le totogifuapauina faaletausaga ua faatonuina.

(2) O le faamatalaga o tupe maua faaletausaga e tatau ona tuuina i ai le aso i totonu o le masina o le faagasologa o le taimi e manaomia ai le faamatalaga o tupe maua ina ia tuuina atu i le Resitara, ma o le faamatalaga o lo o manaomia ina ia tuuina i ai i totonu e tatau ona tuufaatasia i le aso lava lea.

(3) E tatau i le faamatalaga o tupe maua faaletausaga ona sainia e se faatonu o le kamupani po o se loia po o se tausi tusi mo tagata lautele ua faatagaina mo lea faamoemoe.

(4) I luga o le faamauina o se kamupani i lalo o le Vaega II po o le toe faamauina i lalo o le Vaega XX, e tatau i le Resitara ona tuuina atu i le kamupani se masina mo faamoemoega o lenei fuaiupu.

(5) E mafai e le Resitara, e ala i se faasilasilaga tusitusia i se kamupani, ona fesui ai le masina e tuuina atu i le kamupani i lalo o le faafuuiupu (4).

(6) E ese mai ai i le faafuuiupu (1):

(a) E mafai e se kamupani ona le faia se faamatalaga o tupe maua faaletausaga i totonu o le tausaga o le kalena talu lona tuufaatasia faaletulafono;

(b) E mafai e se lala, i le i ai o le faatagaga tusitusia a le Resitara, ona fai se faamatalaga o tupe maua i le faagasolo o le masina sa tuu atu i lona kamupani umia na i lo i le faagasolo o le masina sa tuu atu ia te ia.

(7) Mo faamoemoega o lenei fuaiupu, “faatonuina” o lona uiga o le faatonuina e tulafono faatonutonu e faia i lalo o lenei Tulafono po o e le Resitara i se faasilasilaga faalauaitele. E mafai ona faatonuina faiga ese o faamatalaga o tupe maua e faatatau i vasega eseese o kamupani.

(8) E mafai e le Resitara ona, i luga o se tusi talosaga a so o se tagata, faataga le faaoga, e se kamupani po o ni kamupani e pei ona faamaoti mai e le Resitara, o se faiga o le faamatalaga o tupe maua faaletausaga e ese mai ai lea sa faatonuina, ma e mafai i so o se taimi ona soloia, atoa po o na o se vaega, o so o sea faatagaga.

(9) E mafai e le Resitara ona avatu i se kamupani se faamatalaga o tupe maua faaletausaga o lo o faatulaga ai i le faiga ua faatonuina faamatalaga e pei ona aliali mai i luga o le tusi resitala a Samoa:

(a) Mo le faatagaina e tusa ai ma le faafuuiupu (3) pe afai o faamatalaga o lo o faatulaga mai ai i le faiga o lo o i ai i le taimi nei i le taimi o se aso i le masina o lea o lo o faia ai i totonu le faamatalaga o tupe maua o lo o manaomia ina ia faia; po o

(b) Mo sea faasaoga e ono manaomia, ma o le faatagaina o le faamatalaga ua faasao e tusa ai ma le faafuuiupu (3).

(10) Pe afai o lo o i totonu o le faamatalaga faaletausaga o tupe maua:

- (a) Se tuatusi o le ofisa faamauina o le kamupani; po o
- (b) Se tuatusi falemeli o le kamupani;

e ese mai i le tuatusi faamauina o le ofisa po o le tuatusi falemeli o le kamupani o lo o faaulufaleina i le tusi resitala a Samoa, e mafai e le Resitara ona suia le tusi resitala a Samoa ina ia tusa ai ma lea vaega.

(11) Pe afai ua le mafai e faatonu o le kamupani ona tausia le faafuaiupu (1) ma le faafuaiupu (2), o faatonu taitasi uma o le kamupani ua latou faia se solitulafono ma ua noatia i se moliaga ua faamaonia faaletulafono i le faasalaga ua faatulaga atu i le fuaiupu 195(2).

104. Isi pepa aloaia e ao ona auina atu i le Resitara – E faaopoopo atu i le faamatalaga o tupe faaletausaga o lo o manaomia i lalo o le fuaiupu 103, e tataua i se kamupani ona auina atu pepa aloaia nei i le Resitara i lalo o lenei Tulafono:

- (a) Faasilasilaga o le faaaogaina o Mataupu o Faavae fou o se kamupani, po o le suiga o Mataupu o Faavae o se kamupani, i lalo o le fuaiupu 14;
- (b) Faasilasilaga o le tuuina atu o sea e le kamupani, i lalo o le fuaiupu 20;
- (c) Faasilasilaga o le mauaina e le kamupani o ana lava sea, i lalo o le fuaiupu 25;
- (d) Faasilasilaga o le toe faaolaina mai o se sea, i lalo o le fuaiupu 29;
- (e) Faasilasilaga o se suiga i faatonu o le kamupani, po o se suiga i le igoa po o tuatusi nofomau o se faatonu, i lalo o le fuaiupu 70;
- (f) Faasilasilaga o le faia o se poloaiga i lalo o le fuaiupu 81 e suia ai po o le faaopoopoina i Mataupu o Faavae o se kamupani;
- (g) Faasilasilaga o so o se isi nofoaga e ese mai ai le nofoaga faamauina o le kamupani o lea e teuina ai faamaumauga, po o se isi suiga i le nofoaga o lo o teuina ai faamaumauga, i lalo o le fuaiupu 98;

- (h) Faasilasilaga o se suiga i le ofisa faamauina o le kamupani, i lalo o le fuaiupu 108;
- (i) Pepa aloaia e faatalosagaina e le Resitara i lalo o le fuaiupu 187.

VAEGA XI
PEPA ALOAIA E AO ONA AUINA ATU I TAGATA
E UMIA SEA

105. Lipoti faaletausaga e auina atu i tagata e umia sea – O lipoti faaletausaga e tatau ona auina atu i tagata e umia sea e tusa ai ma aiaiga o le fuaiupu 52.

106. Isi pepa aloaia e ao ona auina atu i tagata e umia sea – I le faaopoopo atu i so o se isi lipoti faaletausaga e manaomia i lalo o le fuaiupu 52, e tatau i se kamupani ona auina atu pepa aloaia nei i tagata e umia sea i lalo o lenei Tulafono:

- (a) Faasilasilaga o so o se toe faatauina mai o sea o lo o faaaoaga i ai le fuaiupu 25(4);
- (b) Faasilasilaga o le iugafono tusitusia ua faatagaina i lalo o le fuaiupu 48;
- (c) Faamatalaga tau tupe e manaomia ina ia auina atu i lalo o le fuaiupu 111;
- (d) Se faamatalaga tusitusia e se suetusi i lalo o le fuaiupu 114(1)(a);
- (e) O se lipoti a se suetusi i lalo o le fuaiupu 116.

VAEGA XII
OFISA FAAMAUINA

107. Ofisa faamauina-(1) O se kamupani e tatau ona i ai se ofisa faamauina i totonu o Samoa.

(2) I le noatia ma le fai fuafua i le fuaiupu 108, o le ofisa faamauina o se kamupani i se taimi faapitoa o le nofoaga lea ua faamatalaina mai e avea o lona ofisa faamauina i luga o le tusi resitala Samoa i lea taimi.

(3) O le faamatalaga o le ofisa faamauina o le kamupani e tatau ona:

- (a) Taua ai le tuatusi o le ofisa faamauina; ma

- (b) Pe afai o le ofisa faamauina o lo o i totonu o ofisa o so o se kamupani o tausii tusi faakonekarate, o loia o mataupu lautele ma loia o faamasinoga, po o so o se isi tagata, ia taua ai -
 - (i) e faapea o le ofisa faamauina o le kamupani o lo o i totonu o ofisa o lea kamupani po o tagata; ma
 - (ii) faamatalaga patino o le nofoaga i totonu o so o se fale o ia ofisa; po o
- (c) Pe afai o le ofisa faamauina e le o i le ofisa o so o se kamupani po o tagata ae o lo o faatu i totonu o se fale o lo o nofoia e tagata e ese mai ai i lo le kamupani, ia taua faamatalaga patino o lona nofoaga i le fale.

108. Suiga o le ofisa faamauina-(1) I le noatia ma le fai fuafua i Mataupu o Faavae a le kamupani ma i le faafuaiupu (3), e mafai e faatonu o se kamupani ona sui le ofisa faamauina o le kamupani i so o se taimi.

(2) E tatau ona tuuina atu i le Resitara mo le faamauina se faasilasilaga o le suiga i le faiga ua faatonuina.

(3) O le suiga i le ofisa faamauina e amata faamamalu mai i le mulimuli mai o:

- (a) O le aso e lima o aso faigaluega ina ua tuana'i le taliaina e le Resitara le faasilasilaga:
- (b) So o se aso o lo o faamaoti i le faasilasilaga e avea o le aso e amata faamamalu ai le suiga.

109. Manaoga e suia ai le ofisa faamauina-(1) I le noatia ma le fai fuafua i lenei fuaiupu, e tatau i se kamupani ona suia lona ofisa faamauina pe afai ua manaomia le faia e le Resitara.

(2) E mafai e le Resitara ona manaomia se kamupani e suia lona ofisa faamauina e ala i se faasilasilaga tusitusia e auina atu i le kamupani i lona tuatusi o le falemeli.

(3) E tatau i le faasilasilaga ona :

- (a) Taua ai e faapea o le kamupani ua manaomia e suia lona ofisa faamauina i le aso ua taua i le faasilasilaga, ia le o se aso e muamua mai na i le 20 aso faigaluega ina ua tuanai le aso o le faasilasilaga;
 - (b) Taua ai mafuaaga mo le manaomia o le suiga;
 - (c) Taua ai e i ai aia tatau a le kamupani e talosaga toe iloilo ai i le Faamasinoga i lalo o le fuaiupu 192;
 - (d) Ia tuu i ai le aso ma sainia e le Resitara.
- (4) E tatau ona auina atu i faatonu taitasi o le kamupani ni ata o le faasilasilaga.
- (5) E tatau i le kamupani ona suia lona ofisa faamauina:
- (a) I le aso ua taua i le faasilasilaga; po o
 - (b) Pe afai e talosaga toe iloilo i le Faamasinoga ma o lea talosaga toe iloilo ua teena, i totonu o le lima aso faigaluega i le tuanai ai o le faaiuga a le Faamasinoga.
- (6) Afai e le usitaia e le kamupani le tausiona o lenei fuaiupu:
- (a) Ua faia e le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i le fuaiupu 194(1); ma
 - (b) Ua faia e faatonu taitasi o le kamupani se solitulafono ma ua noatia i luga o se moliaga ua faamaonia faaletulafono i le faasalaga ua faatulaga mai i le fuaiupu 195(1).

VAEGA XIII TAUSIGA O TUSI MA LE SUEINA

110. Faamaumauga o faamatalaga o tupe e ao ona tausia-(1) E tatau i faatonu o se kamupani ona taulamua i le tausia o faamaumauga o faamatalaga o tupe, ma:

- (a) Faamauina sao ai ma faamatalaina galuega faatino a le kamupani; ma
- (b) Mafai ai i so o se taimi ona fuafuaina i se tulaga sao atoatoa le tulaga tau tupe a le kamupani; ma

- (c) Mafai ai e faatonu ona faamautinoa o faamatalaga o tupe a le kamupani ina ia tausisia le fuaiupu 111; ma
 - (d) Mafai ai ona vave sueina faasuetusi faamatalaga o tupe maua ma tupe alu a le kamupani.
- (2) E aunoa ma le faatapulaaina ai o le faafuaiupu (1), o faamaumauga tau tupe e tatau ona aofia ai:
- (a) Faamaumauga o tupe maua ma tupe na faaalu i aso taitasi ma mataupu e faasino i ai;
 - (b) Se faamaumauga o meatotino ma noataga a le kamupani;
 - (c) Afai o le kamupani e aafia i fefaatauaiga tau oloa -
 - (i) se faamaumauga o oloa na faatau mai ma faatau atu, ma pepa o aitalafu e talafeagai ai;
 - (ii) se faamaumauga o oloa o lo o umia i le faaiuga o le tausaga faaletupe faatasi ai ma faamaumauga o so o se suegaoloa a o faagasolo le tausaga;
 - (d) Afai e aofia i pisinisi a le kamupani le tuuina atu o auaunaga, e tatau ona i ai se faamaumauga o auaunaga tuuina atu faatasi ma pepa o aitalafu e talafeagai ai.
- (3) Afai o le kamupani e faatauina atu oloa po o le tuuina atu o ni auaunaga e totogiina i tinoitupe i se tulaga masani o le tauaveina o pisinisi:
- (a) E le tau teuina ni pepa o aitalafu e faasino i galuega faatino taitasi o le faatauina o oloa mo le faamoemoe o le faafuaiupu (2); ma
 - (b) O se faamaumauga o le aofai o tupe maua i aso taitasi e tusa ma le faatauina o oloa po o le tuuina atu o auaunaga, po o le a lava le tulaga e i ai, ua lava e tausisia ai le faafuaiupu (2) e faasino i na galuega faatino.
- (4) O faamaumauga o faamatalaga o tupe e tatau ona faamauina:
- (a) I se faiga ua faatagaina i lalo o le fuaiupu 97; ma
 - (b) I le ofisa faamauina o le kamupani, po o so o se isi nofoaga ua faatagaina i lalo o le fuaiupu 98.

(5) Afai ua le tausisia e faatonu o se kamupani manaoga o lenei fuaiupu, o faatonu uma o le kamupani ua faia se solitulafono ma ua noatia i se moliaga ua faamaonia faaetulafono i se faasalaga ua faataoto mai i le fuaiupu 195(2).

111. E ao ona saunia faamatalaga o tupe maua ma tupe alu-(1) E tatau ona faamautinoaina e faatonu o kamupani uma le:

- (a) Maea saunia i totonu o le fa masina ina ua tuanai le aso na faapaleni ai tupe a le kamupani, po o i totonu o so o se vaitaimi faaopoopo e faaaogaina i lalo o le faafuaiupu (3), faamatalaga o tupe maua ma tupe alu o lo o tausisia i le faafuaiupu (2) e faasino i le kamupani ma lena aso e faapaleni ai tupe; ma
 - (b) Ia tuuina atu i tagata e umia sea faamatalaga o tupe maua ma tupe alu i totonu o le 20 aso faigaluega e tatau ona faamaea ai ia faamatalaga o tupe maua ma tupe alu i lalo o le parakalafa (a). O lenei manaoga e mafai ona faamalieina i le tuuina atu lea o faamatalaga o tupe maua ma tupe alu i totonu o se lipoti faaletausagea i tagata e umia sea, e tusa ai ma le fuaiupu 52.
- (2) O faamatalaga tau tupe a se kamupani:
- (a) E tatau ona tuuina mai ai se vaaiga moni ma talafeagai o mataupu e faasino i ai; ma
 - (b) E tatau ona tausisia ai so o se tulafono faatonutonu e faasino i le faatulagaina po o mataupu i faamatalaga tau tupe ua faia i lalo o lenei Tulafono; ma
 - (c) E tatau ona tuuina i ai le aso ma sainia e ni faatonu se toalua o le kamupani e aveia ai ma sui o faatonu, po o, pe afai e na o le tasi le faatonu o se kamupani, e faia e lea lava faatonu.
- (3) E ono mafai ona faaopoopoina le vaitaimi e mafai ai e se kamupani tumaoti ona tausisia tulaga manaomia o le faafuaiupu (1)(a) i luga o se iugafono faapitoa i se vaitaimi e le sili atu i le fitu (7) masina.
- (4) O le vaitaimi i le va:

- (a) O le aso na tuufaatasia faaletulafono ai se kamupani ma le aso muamua na faapaleni ai tupe a se kamupani; po o
 - (b) So o se aso o aso e lua e faapaleni ai tupe a se kamupani,
- e le tatau ona sili atu na i lo le 15 masina.

(5) I totonu o lenei Tulafono, o le faaupuga “faamatalaga o tupe maua ma tupe alu”, e faasino i se vaega ma se aso e faapaleni ai tupe a se kamupani, o lona uiga:

- (a) Se faamatalaga o le tulaga tau tupe mo le vaega mai i le aso e faapaleni ai tupe a le kamupani; ma
 - (b) I se tulaga o -
 - (i) se kamupani o lo o fefaatauai mo tupe mama, o se faamatalaga o gaioioiga tau tupe mo le kamupani e faasino i le vaitaimi o tausiga o tusi e faaiuina i le aso e faapaleni ai tupe a le kamupani; ma
 - (ii) se kamupani e le o fefaatauai mo tupe mama, o se faamatalaga o tupe maua ma tupe alu a le kamupani e faasino i le vaitaimi o tausiga o tusi e faaiuina i le aso e faapaleni ai tupe a le kamupani; ma
 - (c) Pe afai e manaomia e tulafono faatonutonu e faia i lalo o lenei Tulafono, se faamatalaga o tinoitupe fetafeai mo le kamupani e faasino i le vaitaimi o tausiga o tusi e faaiuina i le aso e faapaleni ai tupe a le kamupani; ma
 - (d) O nisi faamatalaga tau tupe e faasino i le kamupani po o isi vaega kamupani o lo o avea ai ma kamupani autu e pei ona manaomia e tulafono faatonutonu e faia i lalo o lenei Tulafono -
- faatasi ai ma so o se tusitusiga po o pepa aloaia o lo o aumai ai faamatalaga e faasino i le faamatalaga o le tulaga tau tupe ma isi faamatalaga.

(6) O tulafono faatonutonu e faasino i le faatulagaina po o mea o lo o aofia i faamatalaga tau tupe:

- (a) E ono mafai ona faatonuina ai ni tulaga manaomia e ese mai ai, e tusa ai o vasega eseese o kamupani;

(b) E ono mafai ona manaomia le tausisia o tulaga ausia ua tuuina mai po o ua lomina e se faalapotopotoga po o faalapotopotoga ua faasinomia faatasi ai pe o le leai foi o ni suiga.

(7) Afai ua le tausisia e faatonu o se kamupani le faafuaiupu (1), o faatonu uma o le kamupani ua faia se solitulafono ma ua noatia i se moliaga ua faamaonia faaletulafono i le faasalaga ua faatulaga mai i le faafuaiupu 195(2).

112. Tofiga o se suetusi-(1) O se kamupani o lo o faasino i ai lenei fuaiupu e tatau ona tofia se suetusi:

- (a) E umia le tofiga e avea ai o se suetusi seia oo ina faamuta lona umia o le tofiga i lalo o le faafuaiupu (3); ma
 - (b) E sueina faamatalaga tau tupe a le kamupani.
- (2) E tatau i se kamupani ona tofia se suetusi:
- (a) I totonu o le 30 aso faiglauega mai i le aso na uluai faaaogaina ai lenei fuaiupu e faasino i le kamupani;
 - (b) I totonu o le 30 aso faigaluega talu ona tulai mai se avanoa i le tofiga o le suetusi.
- (3) E faamuta le umia e se suetusi o lona tofiga pe afai e:
- (a) Faamavae e ala i le tuuina atu o se faasilasilaga tusitusia o lana faamavaega i le ofisa faamauina o le kamupani i le le itiiti ifo na i lo le 20 aso faigaluega ae le i oo i le aso e amata faamamaluina ai sea faasilasilaga; po o
 - (b) Ua suia e avea o se suetusi i se iugafono masani i le tofia lea o se isi tagata e suitulaga i ai, i le maea tuuina atu lea o se faasilasilaga i le suetusi e tusa ai ma le fuaiupu 114(2); po o
 - (c) Ua faaleaogaina e avea ma suetusi a le kamupani i lalo o le fuaiupu 113; po o
 - (d) Ua maliu; po o
 - (e) Ia faamaonia e faapea ua gasegase faalemafau i lalo o le Tulafono o le Soifua Maloloina o le Mafaufau 1961; po o

- (f) Ua faamuta le umia o le tofiga i lalo o le faafuaiupu (5).
- (4) E faaoga leni fuaiupu i se kamupani e tusa ai o se vaitaimi faaletupe pe afai:
- (a) O lo o faamauiina e avea o se kamupani a le Malo (mo tagata lautele) i soo se taimi a o faagasolo lena vaitaimi o tausiga o tupe; po o
 - (b) E manaomia e Mataupu o Faavae o le kamupani le tofia o se suetusi e faatatau i lena vaitaimi o tausiga o tusi; po o
 - (c) O se tagata e umia sea po o tagata e umia sea o lo o umia ni sea a tuufaatasi o lo o i ai le aia tatau e mauaina ai le sili atu na i lo le 20% o tufatufaga ua faia e le kamupani, na te tuuina atu se faasilasilaga tusitusia i le kamupani a o le i muta le vaitaimi o tausiga o tusi o lo o manaomia le sueina o faamatalaga tau tupe a le kamupani mo lena vaitaimi.
- (5) Afai e faaoga leni fuaiupu i se kamupani e tusa ai o se vaitaimi faaletupe, ae le faaogaina e tusa ai o ni vaitaimi o faaletupe e mulimuli ane ai:
- (a) O faamatalaga tau tupe a le kamupani mo le vaitaimi faaletupe e tusa ai ma le tulaga e faaoga e le o faasino i ai leni fuaiupu, e tatau ona sueina e tusa ai ma leni fuaiupu;
 - (b) E mafai ona tuuina atu e faatonu ni faasilasilaga i tagata uma o lo o umia sea i totonu o le fa masina o le amatalia o se vaitaimi faaletupe e sosoo ai e faapea ua le toe faaogaina i ai leni fuaiupu i le kamupani, ma o le a faamuta le umia o le tofiga o le suetusi seia vagana ua tuuina mai e tagata e umia sea se faasilasilaga i lalo o le faafuaiupu (4)(c) i se aso ua faasinomia i le faasilasilaga, e le tatau ona itiiti ifo nai lo le 30 aso faigaluega mai le aso na tuuina atu ai le faasilasilaga;

- (c) Afai sa tuuina atu se faasilasilaga i lalo o le parakalafa (b), ma e le i mauaina e le kamupani se faasilasilaga e tusa ai ma le faafuaiupu (4)(c) i le aso na faamaoti mai i le faasilasilaga, o le a le toe umia e le suetusi lona tofiga i se aso e mulimuli mai i le -
- (i) aso na faamaoti mai i le faasilasilaga; poo
 - (ii) le aso na maea ai le sueina o faamatalaga tau tupe mo le vaitaimi o tausiga o tusi ua tuanai.
- (6) Afai:
- (a) O lenei fuaiupu e faasino i se kamupani; ma
 - (b) Ua faatamala pe ua le tofia e le kamupani se suetusi e tusa ai ma le faafuaiupu (2) -

e mafai e le Resitara i se talosaga a so o se tagata e umia sea ona tofia se suetusi. Afai e tofia e le Resitara se suetusi, e mafai e le Resitara ona faatulaga totogifuapauina e totogiina atu e le kamupani i le suetusi. So o se totogifuapauina ua fuafuaina e mafai ona toe faaola mai, e faapei sa aiaia i se maliega i le va o le kamupani ma le suetusi.

113. Agavaa o le suetusi-(1) E le tatau ona tofia se tagata e avea ma suetusi o se kamupani pe galue e avea o se suetusi vagana:

- (a) Ua agavaa le tagata e galue faatausi tusi mo tagata lautele; po o
- (b) Pe afai o le sueina o tusi o le a faia i fafo atu o Samoa, e agavaa le tagata e galue e avea ma suetusi i le atunuu, nuu po o le itumalo o le a faataunuuina ai le sueina o tusi, ma -
 - (i) o le tagata o se sui, sui auai po o se sui agavaa o se faalapotopotoga o tausi tusi ua faavaeina i fafo atu o Samoa ma ua faatagaina mo le taimi e manaomia ai mo faamoemoega o lenei fuaiupu e le Resitara e ala i se faasilasilaga faalauaitele; po o
 - (ii) ua faamaonia lea tagata mo le taimi e manaomia ai mo faamoemoega o lenei fuaiupu e le Resitara e ala i se faasilasilaga faalauaitele.

(2) E leai se isi o tagata e pei ona o le a taua e mafai ona tofia e avea ma suetusi o se kamupani:

- (a) O se faatonu po o se failautusi po o se tagata faigaluega a le kamupani, po o se isi lava tagata o lo o nafa ma le faamaumauina o faamaumauga o tausiga o tusi a le kamupani;
- (b) O se tagata o ia lea o se paaga, po o e faafaigaluegaina e se tagata o lo o taua i le parakalafa (a);
- (c) O se tagata e faamaapeina aseta po o e pulea po o se tagata e faataapeina meatotino a le kamupani;
- (d) O se faalapopotoga ua faamauina faaletulafono;
- (e) O se tagata e le mafai ona tofia pe avea ma suetusi o se kamupani e tusa ai o le parakalafa (a) po o le parakalafa (b) po o le parakalafa (c).

114. Faamavaega a le suetusi po o le aveesea-(1) Afai e faamavae se suetusi mai lona tofiga, e ao i faatonu, pe afai e talosagaina e lea suetusi ona:

- (a) Tufatufaina atu i tagata uma e umia sea se faamatalaga tusitusia e tofogi e le kamupani, mafuaaga mo le faamavaega; po o
- (b) Faatagaina le suetusi po o sona sui e faamatala mafuaaga mo le faamavaega i se fonotaga a tagata e umia sea.

(2) E le tatau i se kamupani ona tofia se suetusi fou e suitulaga i se suetusi o lo o agavaa e umia le tofiga, seia vagana:

- (a) Ua tuuina atu i le suetusi se faasilasilaga tusitusia o le talosaga mo lea itu i le le itiiti ifo nai lo le 20 aso faigaluega; ma
- (b) Ua tuuina atu i le suetusi ni avanoa talafeagai e faaalua ai ni folasaga i tagata e umia sea i le tofiga o se isi tagata e ala i se tusi po o e le suetusi po o sona sui e saunoa i le fonotaga a tagata e umia sea (po o le fea lava o nei mea e filifilia e le suetusi).

(3) E agavaa le suetusi e tofogi atu i ai totogifuapauina talafeagai ma tupe alu e le kamupani mo le faia o folasaga i tagata e umia sea ua faasinomia i ai i le faafuaiupu (1) po o le faafuaiupu (2).

115. Ia aloese le suetusi mai aia feteenai – E tatau i se suetusi o se kamupani ona faamautinoaina, i le tauaveina o tiute o le suetusi i lalo o lenei Vaega, e le o aafia ana faaiuga fai ona o so o se sootaga ma po o aia i le kamupani po o so o se isi kamupani e fesootai i ai.

116. Lipoti a le suetusi – E tatau i le suetusi o se kamupani, o lo o faasino i ai le fuaiupu 112, ona faia se lipoti i tagata e umia sea i faamatalaga tau tupe ua ia sueina o lo o taua ai:

- (a) Galuega ua faia e le suetusi; ma
- (b) Le aotelega ma tapulaa o le sueina o tusi; ma
- (c) Le i ai o so o se sootaga (e ese mai ai na i lo le avea o se suetusi) a le suetusi ma, po o so o se aia a le suetusi e i ai i le kamupani po o se isi kamupani e fesootai i ai; ma
- (d) Pe na maua uma e le suetusi faamatalaga ma faamalamalamaga na ia manaomia; ma
- (e) Pe mata i le silafia o le suetusi, i le tulaga aupito i manino mai i ana suesuega, sa faamauina lelei e le kamupani ni faamaumauga o tausiga o tusi; ma
- (f) Pe mata i le silafia o le suetusi ma i le amanaia o so o se faamatalaga po o faamalamalamaga e ono tatau ona faapoopo atu e le kamupani, o faamatalaga tau tupe o lo o -
 - (i) tuina mai ai se ata moni ma talafeagai o mataupu e pei ona faasino i ai; ma
 - (ii) tausisia so o se tulafono faatonutonu talafeagai e faia i lalo o lenei Tulafono,

ma, afai e leai, o itu e le i tuina mai ai se faapupulaga pe tausisia ai ia tulaga manaomia, po o le a lava le tulaga e talafeagai ai.

117. Avanoa i faamatalaga-(1) E tatau i faatonu uma ona faamautinoa e avanoa se suetusi a le kamupani i faamaumauga o faamatalaga o tupe ma isi pepa aloaia a le kamupani i taimi uma.

(2) E agavaa le suetusi o se kamupani ona manaomia le tuuina mai e se faatonu po o se tagata faigaluega o le kamupani se faamatalaga ma faamalamalama e pei ona ia manatu ua talafeagai mo le faatinoina o ona tiute faa-suetusi.

(3) Afai e le usitaia e faatonu o se kamupani le faafuaiupu (1), o faatonu uma o le kamupani ua faia se solitulafono ma ua noatia i se moliaga ua faamaonia faaletulafono i se faasalaga ua faatulaga mai i le fuaiupu 195(2).

(4) O se faatonu po o se tagata faigaluega e le usitaia le faafuaiupu (2) ua ia faia se solitulafono ma ua noatia i se moliaga ua faamaonia faaletulafono i se faasalaga ua faatulaga mai i le fuaiupu 195(2).

(5) O se puipuiga mo se tagata faigaluega ua molia i se solitulafono faasaga i le faafuaiupu (4) pe afai na te faamaonia e faapea:

- (a) E le i ai ia te ia faamatalaga manaomia po o pe i lalo foi o lana puleaga; po o
- (b) Ona o le tulaga o lo o ia umia, po o tiute ua atofaina mo ia, ua le mafai ai ona tuuina atu faamatalaga manaomia -
po o le a lava le tulaga e ono i ai.

118. Auai o le suetusi i fonotaga a tagata e umia sea-(1)
E tatau i faatonu o se kamupani ona faamautinoaina, o le suetusi o le kamupani:

- (a) Ua faatagaina e auai i fonotaga a tagata e umia sea a le kamupani; ma
- (b) Mauaina faasilasilaga ma fesootaiga o lo o agavaa le tagata e umia sea na te maua e faasino i fonotaga ma iugafono a tagata e umia sea; ma
- (c) E ono mafai ona saunoa i fonotaga e auai atu i ai a tagata e umia sea i so o se vaega o mataupu o le fonotaga e aafia ai o ia i le avea ai ma suetusi.

(2) Afai e le usitaia e faatonu o se kamupani le faafuaiupu (1), o faatonu uma o le kamupani ua faia se solitulafono ma ua noatia i se moliaga ua faamaonia faaletulafono i se faasalaga ua faatulaga mai i totonu o le fuaiupu 195(2).

VAEGA XIV TUUFAATASIGA

119. Tuufaatasiga – E mafai ona tuufaatasia ni kamupani se lua pe sili atu, ma faaauau ai e avea o se kamupani e tasi, e tusa ai ma lenei Vaega.

120. Faasilasilaga o so o se tuufaatasiga ua faatu mai – E ao i faatonu o kamupani ua tuufaatasia ona, i le le itiiti ifo i le 20 aso faigaluega a o lei oo i le aso ua fuafuaina e faamamaluina ai le tuufaatasiga:

(a) Ona ave se ata o le talosaga mo le tuufaatasiga i tagata uma o lo o nofo aitalafu ai le kamupani; ma

(b) Tuuina atu se faasilasilaga faalauaitete o le tuufaatasiga ua faamoemoeina, e aofia ai se faamatalaga faapea -

(i) e avanoa le suesueina o ata o le fuafuaga mo le tuufaatasiga e so o se tagata e umia sea po o le tagata o lo o nofo aitalafu ai le kamupani ua tuufaatasia po o so o se isi tagata o lo o noatia ai le kamupani ua tuufaatasia i le ofisa faamauiina o le kamupani o kamupani ua tuufaatasi ma i so o se isi nofoaga e pei ona faasinomia a o faagasolo itula faigaluega masani; ma

(ii) o se tagata e umia sea po o se tagata o lo o nofo aitalafu ai se kamupani ua tuufaatasia po o so o se tagata o ia lea o lo o noatia ai le kamupani ua tuufaatasia, e agavaa e ave i ai e aunoa ma se tau e faaeeina atu i ai se ata o le talosaga mo le tuufaatasia i luga o se talosaga i se kamupani ua tuufaatasia.

121. Faamauiina o le talosaga i le tuufaatasiga – Mo le faamoemoe o le faataunuaina o le tuufaatasia e tatau ona tuuina atu i le Resitara pepa aloaia ua taua i lalo mo le faamauiina:

(a) Se talosaga mo le tuufaatasia ua faamaonia e tusa ai ma le Faamatalaga Lona Lima;

- (b) Se tusi faamaonia ua sainia e faatonu o kamupani taitasi ua tuufaatasia e taua mai ai e faapea o le tuufaatasiga ua maea ona faamaonia e tusa ai ma lenei Tulafono ma Mataupu o Faavae a le kamupani; ma
- (c) Se pepa aloaia ua faia i se faiga faatonuina ua sainia e tagata taitoatasi ua taua o latou igoa i totonu o le talosaga mo le tuufaatasia e avea o se faatonu o le kamupani ua tuufaatasia o lo o i ai i totonu lana maliega e avea ai o se faatonu.

122. Tusi faamaonia o le tuufaatasiga-(1) I le taimi lava lea ina ua tuanai le mauaina o pepa aloaia e manaomia i lalo o le fuaiupu 121, e ao i le Resitara ona tuuina atu se tusi faamaonia o le tuufaatasiga i le faiga ua faatonuina.

(2) Afai o se talosaga o le tuufaatasia o lo o faamaoti ai se aso ua faamoemoe o le a faamamaluina ai le tuufaatasiga, ma o lena aso e tutusa ma le, po o e mulimuli ane na i lo le aso e faapea na mauaina ai e le Resitara pepa aloaia, o le tusi faamaonia o le tuufaatasiga e tatau ona faamatalaina ina ia faamamaluina i le aso ua faamaoti mai i totonu o le talosaga o le tuufaatasiga.

123. Taunuuga o le tusi faamaonia o le tuufaatasiga – O le aso o lo o faailoa i totonu o le tusi faamaonia o le tuufaatasiga:

- (a) Ua faataunuu ai le tuufaatasiga; ma
- (b) I le noatia ma le fai fuafua i le fuaiupu 10, o le kamupani ua tuufaatasia o lo o i ai lona igoa e pei ona faamaoti mai i le talosaga mo le tuufaatasiga; ma
- (c) O le kamupani ua tuufaatasia e agavaa i meatotino uma, aia tatau, pule, ma tulaga taualoa o kamupani taitasi ua tuufaatasia; ma
- (d) O le kamupani tuufaatasi ua noatia ma fai fuafua i noataga uma ma noatiaga fai o kamupani taitasi ua tuufaatasi; ma

- (e) O tualumaga o lo o loma e, po o e faasaga i, se kamupani tuufaatasi e mafai ona faaauau e, po o e faasaga i, le kamupani tuufaatasi; ma
- (f) O se moliaga ua faamaonia faaletulafono, faaiuga, poloaiga, po o se faaiuga a se faamasinoga mo, po o e faasaga i, se kamupani tuufaatasi e ono mafai ona faamamaluina e, po o e faasaga i, le kamupani tuufaatasi; ma
- (g) So o se aiaiga o le talosaga mo le tuufaatasia o lo o faapea ona aiaia mo le faaliliuina o sea po o aia tatau a tagata e umia sea i totonu o kamupani tuufaatasi e faamamaluina e tusa ai ma a latou faaiuga.

124. Tusi Resitala-(1) I le faamamaluina o se tuufaatasiga, e le mafai e le Resitara o Fanua po o so o se isi tagata o lo o gafa ma le teuina o so o se tusi po o tusi resitala ona avea ma ona tiute patino, i luga o le mafuaaga e tasi faapea ua faamamaluina le tuufaatasiga, ona suia le igoa o se kamupani ua tuufaatasi i se igoa o se kamupani ua maea ona tuufaatasia ma o lo o i totonu o ia tusi po o tusi resitala po o i totonu o so o se pepa aloaia.

(2) O le tuuina atu i le Resitara o Fanua po o so o se isi tagata o so o se pepa faaletulafono (pe le o aofia ai se pepa faaletulafono ua faaliliuina atu pe leai) e le kamupani tuufaatasi:

- (a) Faataunuaina po o faamoemoe e faataunuaina e le kamupani tuufaatasi; ma
- (b) E faasino i so o se meatotino o lo o umia i le taimi lava lena a o lumanai le tuufaatasia e se kamupani tuufaatasi; ma
- (c) Faailoa mai e faapea o lena meatotino ua avea o se meatotino a le kamupani tuufaatasi e tusa ai ma malosiaga o lenei Vaega -

i le le i ai o se molimau e ese mai ai ua lava molimau e avea ai ma faamaoniga faapea o le meatotino ua avea ma meatotino a le kamupani tuufaatasi.

(3) E aunoa ma le faatapulaaina ai o le faafuaiupu (1) po o le faafuaiupu (2), afai o so o se faamalumaluga ua tuuina mai e

so o se tagata po o so o se aia tatau po o le aia i se meatotino a so o se tagata, e tusa ai o lenei Vaega, ua avea o le meatotino a le kamupani tuufaatasi, o lena tagata, i le tuuina mai o se tusi faamaonia ua sainia e avea ai ma sui o le kamupani tuufaatasi, ia taua mai ai e faapea o lena faamalumaluga po o so o se aia tatau po o aia ua, avea ai ma meatotino a le kamupani tuufaatasi, e tusa ai ma lenei Vaega, e ese mai ai i so o se isi tulafono po o pulega o tulafono po o aiaiga o so o se pepa faaletulafono e tatau, ona faamauina le kamupani tuufaatasi e avea o se o lo o umia lena faamalumaluga po o e avea o se tagata e agavaa i ia aia tatau po o aia, po o lea lava le tulaga e i ai.

(4) Ae vagana ai ona o lo o aiaia manino i totonu o lenei fuaiupu, e leai se mea i totonu o lenei Vaega e afua mai i aiaiga o le Tulafono o le Faamauina o Fanua 1992/1993.

125. Pule a le Faamasinoga e faasino i le tuufaatasiga-

(1) Afai ua faamalieina le Faamasinoga e faapea o le faamamaluina o se talosaga mo le tuufaatasia o le a tulai ai se faiga faaituau i se tagata e umia sea po o se tagata o lo o nofo aitalafu ai se kamupani tuufaatasi po o se tagata o lo o noatia ai se kamupani tuufaatasi, e ono mafai, i luga o se talosaga, ua faia i so o se taimi a o lumanai le aso e faamamaluina ai le tuufaatasia, mai lena tagata, ona faia so o se poloaiga e manatu o ia ua talafeagai e faasino i le talosaga, ma e mafai, e aunoa ma le faatapulaaina o le tulaga faalauaitele o lenei fuaiupu, ona faia se poloaiga:

- (a) E faatonuina ai e faapea o le faamamaluina e le tatau ona tuuina atu i le talosaga;
- (b) Toe faaleleia o le talosaga i se auala e pei ona ono faamaoti mai i totonu o le poloaiga;
- (c) Faatonuina le kamupani po o ana fatonu e toe iloilo le talosaga po o so o sona vaega.

(2) E ono mafai ona faia se poloaiga i lalo o le faafuuiupu (1) i luga o ia tuutuuga ma aiaiga e finagalo le Faamasinoga e talafeagai.

VAEGA XV
MALIEGA FETUUNAI MA TAGATA O LO O NOFO
AITALAFU AI LE KAMUPANI

126. Faamatalaina o uiga o upu – I lenei Vaega, ae vagana e ese mai ai se tulaga e manaomia e le faaupuga -

“Maliega fetuunai” o lona uiga o se maliega fetuunai i le va o le kamupani ma tagata o lo o nofo aitalafu ai le kamupani, e aofia se maliega fetuunai:

- (a) Ua soloia uma ai po o se vaega o se aitalafu a le kamupani; po o
- (b) Fesuiaiga o aia tatau a tagata o lo o nofo aitalafu ai le kamupani po o tuutuuga o se aitalafu; po o
- (c) E faasino i se suiga o Mataupu o Faavae a le kamupani e aafia ai tulaga e ono aliae mai o le gafatia lea e le kamupani ona totogi se aitalafu:

“Tagata o lo o nofo aitalafu ai” e aofia ai –

- (a) Se tagata o ia lea, i le tulai mai o se faamaapeina o se kamupani, e agavaa e totogi atu i ai se aitalafu o lo o aitalafu ai le kamupani; ma
- (b) Se tagata o lo o nofo aitalafu ai le kamupani ua faamaonia.

“Tagata talosaga” o lona uiga o se tagata o lo o faasinomia i le fuaiupu 127 o ia lea ua talosagaina se maliega fetuunai e tusa ai ma lenei Vaega.

127. Talosaga mo le maliega fetuunai-(1) So o se tagata o le a taua i lalo e ono mafai ona talosagaina se maliega fetuunai i lalo o lenei Vaega pe afai o lena tagata e i ai se mafuaaga e talitonu ai e faapea o se kamupani ua po o o le a le mafai ona totogi ana aitalafu i taimi e tatau ona totogiina ai i le faagasologa masani o le pisinisi:

- (a) O faatonu o le kamupani;
- (b) O se tagata ua tofia e faamaapeina po o e mauaina se vaega tele o aseta ma le tauaveina o le kamupani;
- (c) O se tagata e faamaapeina aseta po o se pule o le kamupani;
- (d) I le faatagaga a le Faamasinoga, so o se tagata o lo o nofo aitalafu ai le kamupani po o se tagata o lo o umia sea a le kamupani.

(2) Afai ua tuuina atu e le Faamasinoga se faatagaga i le tagata o loo nofo aitalafu ai le kamupani po o se tagata o lo o umia sea i lalo o le faafuaiupu (1)(d), e mafai e le Faamasinoga ona faia se poloaiga e faatonu ai le kamupani ina ia tuuina atu i tagata o loo nofo aitalafu ai le kamupani po o tagata o lo o umia sea, se lisi o tuatusi e faailoa ai aofaiga o loo nofo aitalafu ai ia i latou taitoatasi po o nisi faamatalaga e ono mafai ona faamaoti mai ina ia mafai ai e le tagata o loo nofo aitalafu ai le kamupani po o le tagata o lo o umia sea ona talosagaina se maliega fetuunai.

128. Faasilasilaga o le maliega fetuunai ua faatuina mai-(1) O le o lo o talosaga e tatau ona tuufaatasia, e faasino i vasega taitasi o tagata o loo nofo aitalafu ai le kamupani, se lisi o tagata o loo nofo aitalafu ai e iloa e le o loo talosaga o ia lea o le a aafia i le talosaga mo se maliega fetuunai e faatulaga mai ai:

- (a) Le aofaiga o lo o nofo aitalafu ai po o se aofaiga ua fuafuaina o lo o nofo aitalafu ai ia i latou taitoatasi; ma
- (b) Le aofai o palota e agavaa ai i latou taitoatasi e faia i luga o so o se iugafono e faamaonia ai le maliega fetuunai.

(2) E tatau i le o lo o talosaga ona tuuina atu i tagata taitoatasi o lo o manino le nofo aitalafu ai o le kamupani, o le kamupani, so o se tagata e faamaapeina meatotino po o le tagata e faamaapeina le kamupani, ma auina atu i le Resitara mo le faamauina:

- (a) Se faasilasilaga e tusa ai ma le Faamatalaga Lona Ono o le faamoemoe e faia ai se fonotaga a tagata o loo nofo aitalafu ai, po o so o se vasega o tagata e toalua pe sili atu o lo o nofo aitalafu ai, mo le faamoemoe o le palotaina o se iugafono; ma
- (b) Se faamatalaga -
 - (i) e aofia ai igoa ma tuatusi o le o lo o talosaga faatasi ma le malosiaga o loo faapea ona galue ai le o loo talosaga; ma

(ii) e aofia ai le tuatusi ma le numera o le telefoni e faatoai i ai ni fesili a o faagaoslo itula masani o pisinisi; ma

(iii) faatulaga mai ai tuutuuga o le maliega fetuunai ua faatuina mai, ma mafuaaga o le faia; ma

(iv) faataatia ni taunuuga tatau e ono aliai mai mo tagata o loo nofo aitalafu ai le kamupani i luga o le maliega fetuunai ua faamaonia; ma

(v) faataatia le tele o so o se aia a se faatonu i le maliega fetuunai ua faatu mai; ma

(vi) faamalamalamaina e faapea o le maliega fetuunai ua faatu mai ma so o se teuteuga i lea maliega fetuunai i se fonotaga a tagata o lo o nofo aitalafu ai le kamupani po o so o se vasega o tagata o lo o nofo aitalafu ai le kamupani, o le a noatia ai tagata uma o lo o nofo aitalafu ai le kamupani, po o tagata o lo o nofo aitalafu ai le kamupani i le vasega lena, pe afai ua faamaonia e tusa ai ma le fuaiupu 129; ma

(vii) aofia ai faamatalaga auiliili o so o se taualumaga ua fuafuaina e avea o se vaega o le maliega fetuunai mo le suia o le maliega fetuunai pe a maea ona faamaonia; ma

(c) Se ata o le lisi po o lisi o tagata o lo o nofo aitalafu ai le kamupani o lo o faasinomia i totonu o le faafuaiupu (1).

129. Taunuuga o le maliega fetuunai-(1) O se maliega fetuunai, e aofia ai so o se teuteuga ua talosagaina i se fonotaga, ua faamaonia e tagata o lo o nofo aitalafu ai le kamupani, po o se vasega o tagata o lo o nofo aitalafu ai le kamupani, pe afai, i se fonotaga a tagata o loo nofo aitalafu ai le kamupani po o lena vasega o tagata o loo nofo aitalafu ai le kamupani ua faia e tusa ai ma le Faamatalaga Ono, o le maliega fetuunai e aofia ai so o se teuteuga, ua faaaogaina e tusa ai ma le fuaiupu 5 o lena Faamatalaga.

(2) O se maliega fetuunai, e aofia ai so o se teuteuga ua faamaonia e tagata o loo nofo aitalafu ai le kamupani po o se vasega o lo o nofo aitalafu ai le kamupani e tusa ai ma lenei Vaega ua noatia ai le kamupani ma –

- (a) Tagata uma o loo nofo aitalafu ai le kamupani; po o
- (b) Pe afai e sili atu na i lo le tasi le vasega o tagata o lo o nofo aitalafu ai le kamupani, o luga o tagata uma o loo nofo aitalafu ai le kamupani o lena vasega -

o i latou ia sa tuuina atu i ai le faasilasilaga o le talosaga ma tuuina atu i lalo o le fuaiupu 128.

(3) Afai o se iugafono e talosagaina ai se maliega fetuunai, e aofia ai so o se teuteuga ua tuuina atu i ai le fesili mo le palotaina e le sili atu na i lo le tasi le vasega o tagata o lo o nofo aitalafu ai le kamupani, o le a avea, seia vagana se tulaga e ese mai ai ua faaalua manino i totonu o le iugafono, faapea o le faamaonia o le maliega fetuunai, e aofia ai so o se teuteuga, e vasega taitasi e i ai tuutuuga i luga o le faamaonia o le maliega fetuunai, e aofia ai so o se teuteuga, a isi uma vasega taitasi o lo o palotaina le iugafono.

(4) E tatau i le o lo o talosaga ona tuuina atu se faasilasilaga tusitusia o le faaiuga o le palota i tagata uma o lo o nofo aitalafu ai le kamupani na te silafia, le kamupani, so o se tagata e faamaapeina meatotino po o se tagata e faamaapeina le kamupani, ma le Resitara.

130. Eseelega o le maliega fetuunai-(1) O se maliega fetuunai ua faamaonia i lalo o le fuaiupu 129 e mafai ona fesui ai pe faamutaina i le:

- (a) E tusa ai ma so o se taualumaga mo le fesui ai po o le faamutaina ua tuufaatasia i le maliega fetuunai ua faamaonia; po o
- (b) E ala i le faamaoniga o se talosaga mo fesui ai po o le faamutaina o le maliega fetuunai e tusa ai ma lenei Vaega e faapea, mo lena faamoemoe, e faaoga faatasi ma suiga e pei ona talafeagi ai e faapei ai o sea talosaga o se talosaga o se maliega fetuunai.

(2) O aiaiga o lenei Vaega e faaaogaina i so o se maliega fetuunai ua suia e tusa ai ma lenei fuaiupu.

131. Pule a le Faamasinoga-(1) I luga o le tusi talosaga a le o lo o talosaga po o le kamupani, e mafai e le Faamasinoga ona:

- (a) Tuuina atu faatonuga e faasino i se manaoga tau tualumaga ua faataoto mai e lenei Vaega, po o le faataatia po o le fesui ai so o se manaoga, pe afai ua faamalieina e faapea e amiotonu le faia loa; po o
- (b) Poloia e faapea, ao faagasolo le vaitaimi ua faamaoti mai i le poloaiga, e le amataina i le aso e muamua mai i le aso o lo o tuuina atu ai le faasilasilaga o le maliega fetuunai ua talosagaina ma faaiuina i le le sili atu nai lo le 10 aso faigaluega pe a tuana i le aso sa tuuina atu ai le faasilasilaga o le iuga o le palota sa faia i ai -
 - (i) tualumaga e faasino i se aitalafu o lo o nofo aitalafu ai le kamupani e tatau ona faataatiaese; po o
 - (ii) o se tagata o lo o nofo aitalafu ai le kamupani ua faamaamulu mai le faia o so o se faiga e faamalosia ai le totogiina o se aitalafu o loo nofo aitalafu ai le kamupani.

(2) E leai se aiaiga i totonu o le faafuuiupu (1)(b) e aafia ai le aia tatau o se tagata ua faamaonia o lo o nofo aitalafu ai le kamupani a o faagasolo lena vaitaimi na te avea ai le, faaaogaina, po o e ese mai ai le faafoeina o, meatotino a le kamupani o lo o i ai le pule a lena tagata o lo o nofo aitalafu ai le kamupani.

(3) Afai ua faamalieina le Faamasinoga, i luga o le talosaga a se tagata o lo o nofo aitalafu ai le kamupani o ia lea sa agavaa e palota i luga o se maliega fetuunai e faapea:

- (a) E le lava aso na tuuina atu ai le faasilasilaga o le fonotaga po o mataupu sa manaomia ina ia faasilasilaina i lalo o le fuaiupu 128 sa tuuina atu i lena tagata o lo o nofo aitalafu ai le kamupani; ma

- (b) Sa i ai nisi faaletonu i tulaga o le mauaina o le faamaoniga o le maliega fetuunai; po o
- (c) I le tulaga o le tagata o lo o nofo aitalafu ai le kamupani o ia lea sa palota faasaga i le maliega fetuunai, e faapea o le maliega fetuunai ua avea o se faufauga le tonu mo lena tagata o lo o nofo aitalafu ai le kamupani, po o i le vasega o tagata o lo o nofo aitalafu ai le kamupani o lo o aafia ai lena tagata o lo o nofo aitalafu ai le kamupani - e mafai e le Faamasinoga ona poloaia e faapea o lena tagata o lo o nofo aitalafu ai le kamupani e le o noatia e le maliega fetuunai po o le faia o se isi poloaiga ua manatu o ia e talafeagai ai.

(4) O se talosaga i lalo o le faafuuiupu (3) e tataua ona faia ae le i silia le 10 aso faigaluega ina ua tuanai le aso sa tuuina atu ai le faasilasilaga o le iuga o le palota i le tagata o lo o nofo aitalafu ai le kamupani.

132. Taunuuga o le maliega fetuunai i le faamaapeina o le kamupani-(1) I le faamaonia o se maliega fetuunai i lalo o le fuaiupu 129, e mafai e le Faamasinoga, i luga o le talosaga a:

- (a) Le kamupani; po o
- (b) Se tasi ua tofia e mauaina meatotino a le kamupani; po o
- (c) I le faatagaga a le Faamasinoga, so o se tagata o lo o nofo aitalafu ai le kamupani po o se tagata o lo o umia sea o le kamupani - e faia sea poloaiga e pei ona finagalo le Faamasinoga e talafeagai e tusa ai ma e taimi e faamamaluina ai, pe afai e i ai, i le avea lea o le maliega fetuunai, pe afai e faamaapeina le kamupani, ona faaauau le faamamaluina ma ia noatia ai le tagata e faamaapeina le kamupani.

(2) Afai ua faamaonia se maliega fetuunai e mulimuli ane ua tuuai le kamupani i le tulaga e faamaapeina ai, e mafai e le Faamasinoga i luga o le talosaga a:

- (a) Le e faamaapeina le kamupani; po o
- (b) Le ua tofia e faataapeina meatotino a le kamupani; po o

(c) I le faatagaga a le Faamasinoga, so o se tagata o lo o nofo aitalafu ai le kamupani po o tagata o lo o umia sea o le kamupani -
e faia se poloaiga e finagalo le Faamasinoga e talafeagai e tusa ai ma le taimi e faamamaluina ai, pe afai e i ai , o le faaauau lea o le faamamaluina o le maliega fetuunai ma o le a noatia ai le faamaapeina le kamupani.

133. Tau o le maliega fetuunai – Ae vagana ai ua poloaia e le Faamasinoga, o tau faatupulaia i le faatulagaina ma le faafoeina o se fonotaga a tagata o lo o nofo aitalafu ai le kamupani mo le faamoemoe o le palotaina o se talosaga maliega fetuunai:

- (a) E tatau ona totogiina e le kamupani; po o
- (b) Pe afai sa faatupulaia e se tagata e faataapeina o meatotino po o e se e pulea po o se e faamaapeina le kamupani, o ni tau o le faataapeina o meatotino po o le pulea po o le faamaapeina; po o
- (c) Pe afai sa faatupulaia e so o se isi tagata, o se aitalafu ua tatau ona totogiina atu i lena tagata e le kamupani.

VAEGA XVI FAAMAONIGA O FAATULAGAGA MA ISI E LE FAAMASINOGA

134. Faamatalaina o uiga o upu – I totonu o lenei fuaiupu, ae vagana e ese mai ai le uiga o lo o manaomia e le mataupu -

“Faatulagaga” e aofia ai le toe faatulagaina o sea o tupe faavae a se kamupani e ala i le tuufaatasia o sea o vasega eseese, po o i le vaevaeina o sea i ni sea o vasega eseese, po o i le faia o ia auala uma e lua:

“Kamupani” o lona uiga -

- (a) O se kamupani o lo o i totonu o le uiga o le fuaiupu 2;
 - (b) Se kamupani mai fafo ua faapea ona faamauina i totonu o le tusi resitala a kamupani mai fafo;
- “O le tagata o lo o nofo aitalafu ai le kamupani” e aofia ai-

- (a) Le tagata o ia lea, i le faamaapeina o le kamupani, o le a agavaa e talosaga e faapea o lo o i ai se aitalafu ua tataua ona totoigiina e le kamupani i lea tagata; ma
- (b) Se tagata ua faamaonia o lo o nofo aitalafu ai le kamupani.

135. Faamaoniga o faatulagaga, tuufaatasiga, ma maliega fetuunai-(1) I le noatia ma le fai fuafua i le faafuaiupu (2), ae i le ese mai ai na i so o se isi aiaiga po o Mataupu o Faavae o se kamupani, e mafai e le Faamasinoga, i luga o le talosaga a se kamupani po o so o se tagata e umia sea po o se tagata o lo o nofo aitalafu ai le kamupani, ona poloaiina e faapea o se faatulagaga po o le tuufaatasiga po o se maliega fetuunai ua noatia ai le kamupani ma isi tagata po o vasega o tagata e pei ona mafai ona faamaoti mai e le Faamasinoga. O lea poloaiga e ono mafai ona faia i luga o ni tuutuuga ma aiaiga e finagalo le Faamasinoga ua talafeagai ai.

(2) O se faatulagaga po o le tuufaatasiga po o se maliega fetuunai e ono mafai ona faamaonia i lalo o lenei Vaega pe a fai e le mafai ona faatino i faiga masani mo faatulagaga, tuufaatasiga po o maliega fetuunai ina ia faamamaluina ai i lalo o le Vaega XIV po o le Vaega XV po o vaega uma e lua. Mo le aveesea o ni tulaga masalosalo, e le faapea e le mafai ona faatino se faatulagaga, tuufaatasiga po o se maliega fetuunai ina ia faamamaluina i lalo o le Vaega XIV po o le Vaega XV ise mafuaaga e faapea o le maliega fetuunai e le i, po o e i ai se tulaga e le mafai ai, ona faamaonia e tusa ai ma taualumaga ua faataoto mai i totonu o ia Vaega.

(3) A o lumanai le faia o se poloaiga i lalo o le faafuaiupu (1), e mafai e le Faamasinoga, i luga o le talosaga a le kamupani po o so o se tagata umia sea po o se tagata o lo o nofo aitalafu ai le kamupani po o nisi tagata ua finagalo le Faamasinoga e i ai lo latou aia, po o i lana lava faatatau, le faia o se tasi poloaiga po o poloaiga ua taua i lalo:

- (a) O se poloaiga e faapea o se faasilasilaga o le talosaga, faatasi ai ma ia faamatalaga e faasino i ai ua finagalo le Faamasinoga e talafeagai ai, ia tuuina atu i se faiga ma i se auala ma tuuina atu i

ia tagata po o vasega o tagata ua faamaoti mai e le Faamasinoga;

- (b) O se poloaiga ua faatonuina ai le faia o se fonotaga po o ni fonotaga a tagata e umia sea po o so o se vasega o tagata e umia sea po o tagata o lo o nofo aitalafu ai le kamupani po o so o se vasega o tagata o lo o nofo aitalafu ai le kamupani e iloilo ma, pe a finagalo e talafeagai, ia faamaonia, i se faiga ua faamaoti mai e le Faamasinoga, le faatulagaga ua talosagaina po o le tuufaatasiga po o le maliega fetuunai ma, mo lona faamoemoe, e mafai e le Faamasinoga ona fuafua tagata e umia sea po o tagata o lo o nofo aitalafu ai le kamupani e faia ai se vasega o tagata e umia sea po o tagata o lo o nofo aitalafu ai le kamupani;
 - (c) Se poloaiga e manaomia ai se lipoti i le talosaga mo le faatulagaga po o le tuufaatasiga po o le maliega fetuunai ina ia saunia mo le Faamasinoga e se tagata ua faamaoti mai e le Faamasinoga ma, pe afai e finagalo le Faamasinoga e talafeagai ai, ia tuuina atu i tagata e umia sea po o so o se vasega o tagata e umia sea po o tagata o lo o nofo aitalafu ai le kamupani po o so o se vasega o tagata o lo o nofo aitalafu ai le kamupani po o so o se isi tagata o ia lea o loo silafia e le Faamasinoga o lo o i ai lona aia;
 - (d) O se poloaiga e uiga i le totogiina o tau faatupulaia i le saunia o so o sea lipoti;
 - (e) O se poloaiga e faamaoti ai tagata o i latou ia e agavaa e auai ma faaali o latou taofi i le talosaga e faamaonia ai le faatulagaga po o le tuufaatasiga po o le maliega fetuunai.
- (4) I le faia o se poloaiga i lalo o le faafuaiupu (3), e tataua ona silafia e le Faamasinoga taualumaga mo le iloilo ina o tuufaatasiga i lalo o le Vaega XIV ma mo le iloilo o maliega fetuunai i lalo o le Vaega XV.

(5) O se poloaiga ua faia i lalo o lenei fuaiupu e faamamaluina i le, ma mai le aso ua faamaoti mai i totonu o le poloaiga.

(6) I totonu o le 10 aso faigaluega talu ona faia e le Faamasinoga le poloaiga i lalo o lenei fuaiupu e tataui i le kamupani ona faamautinoaina le tuuina atu i le Resitara o se ata o le poloaiga mo le faamauiina.

(7) Afai ua le usitaia e se kamupani le faafuaiupu (4), o faatonu uma o le kamupani ua faia se solitulafono ma ua noatia i se moliaga ua faamaonia faaletulafono i se faasalaga ua faatulaga mai i le fuaiupu 195(2).

136. E mafai e le Faamasinoga ona faia o poloaiga faaopoopo-(1) E aunoa ma le faatapulaaina ai o le fuaiupu 135, e mafai e le Faamasinoga, mo le faamoemoe o le faamamaluina o so o se faatulagaga po o le tuufaatasiga po o se maliega fetuunai, po o e ala i so o se isi poloaiga e mulimuli ane ai, e aiaia mo, ma faatonu ai tuutuuga ma aiaiga e faasino i:

- (a) Le faaliliuina po o le faaee atu o meatotino moni po o tau le tagata lava ia, aseta, aia tataui, pule, aia, noataga, konekarate ma noatiaga;
- (b) Le tuuina atu o sea, faamalumaluga, po o faiga faavae o so o se ituaiga;
- (c) Le faaauauina o taualumaga faaletulafono;
- (d) Le faamaapeina o so o se kamupani;
- (e) Faia o aiaiga mo tagata sa palota e faasaga i le faatulagaga po o le tuufaatasiga po o le maliega fetuunai i so o se fonotaga ua taloina e tusa ai ma so o se poloaiga ua faia i lalo o le fuaiupu 135(2)(b) po o ia lea sa tulai i luma o le Faamasinoga e tetee i le talosaga e faamaonia ai le faatulagaga po o le tuufaatasiga po o le maliega fetuunai;
- (f) Isi mataupu e faapei ona talafeagai ai po o e manaomia e faamamaluina ai le faatulagaga po o le tuufaatasiga po o le maliega fetuunai.

(2) I totonu o le 10 aso faigaluega talu ona faia e le Faamasinoga se poloaiga i lalo o lenei fuaiupu, e tatau i le kamupani ona tuuina atu se ata o le poloaiga i le Resitara mo le faamauina.

(3) Afai e le tausisia e le kamupani le faafuaiupu (2), o faatonu uma o le kamupani ua faia se solitulafono ma ua noatia i se moliaga ua faamaonia faaetulafono i se faasalaga ua faatulaga mai i le fuaiupu 195(2).

137. Faaogaina o le fuaiupu 132 – O aiaiga o le fuaiupu 132 e faaoga faatasi ma ni suiga e pei ona talafeagai ai e faasino i so o se maliega fetuunai ua faamaonia i lalo o le fuaiupu 135.

VAEGA XVII AVEESEA MAI LE TUSI RESITALA

138. Aveesea mai le tusi resitala – E aveesea se kamupani mai le tusi resitala a Samoa pe afai e sainia e le Resitara se faasilasilaga ua taua mai ai e faapea o le kamupani ua aveesea mai le tusi resitala a Samoa ua faamauina i lalo o lenei Tulafono.

139. Mafuaaga mo le aveesea mai le tusi resitala-(1) I le noatia ma le fai fuafua i lenei fuaiupu, o le Resitara e tatau ona aveesea se kamupani mai le tusi resitala a Samoa pe afai:

- (a) Ua faamalieina le Resitara e faapea -
 - (i) o le kamupani ua faamuta le tauaveina o pisinisi; ma
 - (ii) e leai se isi mafuaaga mo le kamupani e faaauau ai lona i ai pea; po o
- (b) O le kamupani ua faamaapeina; ma
 - (i) e leai se tagata e faamaapeina o lo o galue e fai ma sui; po o
 - (ii) o pepa aloaia ua faatonuina o lo o faamaonia ai e faapea ua maea ona faamaapeina o le kamupani e le i tuuina atu pe tufaina atu i le Resitara i totonu o le ono masina ina ua tuana'i le faamaapeina; po o

- (c) Ua lafoina po o ua tufaina atu i le Resitara se talosaga i totonu o le pepa faatonuina ua faia e -
- (i) se tagata umia sea ua faatagaina e faia se talosaga i luga o se iugafono faapaitoa a tagata e umia sea e agavaa e palota ma palotaina i luga o se fesili; po o
 - (ii) se faatonu po o so o se isi tagata, pe afai e manaomia pe faatagaina e Mataupu o Faavae o le kamupani - e faapea ia aveesea le kamupani mai le tusi resitala a Samoa i luga o so o se mafuaaga ua faamaoti mai i totonu o le faafuaiupu (2); po o
- (d) Ua tuuina atu pe tufaina atu e le e faamaapeina le kamupani i le Resitara pepa aloaia ua faatonuina ua faamaonia ai le maea o le faamaapeina o le kamupani.
- (2) O se talosaga e aveesea ai se kamupani mai le tusi resitala a Samoa i lalo o le faafuaiupu (1)(c) e mafai ona faia i luga o mafuaaga:
- (a) E faapea o le kamupani ua faamuta le tauaveina o ana pisinisi, ua faamatuu ese atu atoa ana noataga i tagata o lo o nofo aitalafu ai, ma ua faasoaso atu ana meatotino faasili e tusa ai ma Mataupu o Faavae a le Kamupani ma lenei Tulafono; po o
 - (b) E faapea o le kamupani e leai ni meatotino faasili ina ua maea le totogiina atoa po o se vaega o ana aitalafu, ma e leai se tagata o lo o nofo aitalafu ai le kamupani ua talosaga i le Faamasinoga mo se poloaiga e faamaapeina ai le kamupani.
- (3) O se talosaga e aveeseina ai se kamupani mai le tusi resitala a Samoa i lalo o le faafuaiupu (1)(c) e tatau ona faapipii mai ai ma se faasilasilaga tusitusia a le Komesina o Lafoga e taua mai ai e leai sona tetee i le aveeseina o le kamupani mai tusi resitala a Samoa.
- (4) Faatoa alagatau i le Resitara ona aveesea se kamupani mai le tusi resitala i lalo o le faafuaiupu (1)(a) pe afai:
- (a) O le Resitara ua ia tausisia le fuaiupu 140; ma

- (b) E le o faamalieina le Resitara e faapea o lo o faaauau le tauaveina o pisinisi a le kamupani po o e leai se mafuaaga e faaauau ai le i ai pea o le kamupani; ma
 - (c) O le Resitara -
 - (i) ua faamalieina e faapea e leai se tagata sa tetee i le aveeseina i lalo o le fuaiupu 142; po o
 - (ii) pe afai ua taulimaina se tetee i le aveesea o le kamupani o lo o tausiona ai le fuaiupu 143.
- (5) Faatoa alagatai i le Resitara ona aveesea se kamupani mai le tusi resitala a Samoa i lalo o parakalafa (b), (c), po o le (d) o le faafuaiupu (1) pe afai:
- (a) Ua faamalieina le Resitara ua tuuina atu se faasilasilaga e tusa ai ma le fuaiupu 141; ma
 - (b) O le Resitara -
 - (i) ua faamalieina e faapea e leai se tagata sa tetee i le aveesea i lalo o le fuaiupu 142; po o
 - (ii) ua tausiona le fuaiupu 143 pe afai ua taulimaina se tetee i le aveeseina.

140. Faasilasilaga o le faamoemoe e aveesea ai pe afai ua faamuta le tauaveina o pisinisi e le kamupani-(1) A o le i aveeseina se kamupani mai le tusi resitala a Samoa i lalo o le fuaiupu 139(1)(a), e tatai i le Resitara ona:

- (a) Tuuina atu se faasilasilaga i le kamupani e tusa ai ma le faafuaiupu (2); ma
 - (b) Tuuina atu se faasilasilaga o mataupu ua faataoto mai i le faafuaiupu (3) i so o se tagata ua agavaa i se tau faaee atu ua faamauina e faasino i meatotino a le kamupani; ma
 - (c) Tuuina atu se faasilasilaga faalautitele o mataupu ua faataoto mai i le faafuaiupu (3).
- (2) O le faasilasilaga o le a tuuina atu i lalo o le faafuaiupu (1)(a) e tatai ona:
- (a) Taua ai le fuaiupu o loo i ai i lalo, ma mafuaaga ua faamoemoe e aveesea ai le kamupani mai le tusi resitala a Samoa; ma
 - (b) Faamatalaina e faapea, ae vagana ai -

(i) ia oo atu i le aso ua faamaoti mai i totonu o le faasilasilaga, e faapea e le tatau ona itiiti ifo nai lo le 20 aso faigaluega ina ua tuanai le aso o le faasilasilaga, ia faamalieina e le kamupani le Resitara e ala i se faasilasilaga tusitusia e faapea o lo o ia tauaveina pea pisinisi po o e i ai se isi mafuaaga mo le faaauau pea o le pisinisi; po o

(ii) e le i faagaoioia le aveeseina e le Resitara o le kamupani mai le tusi resitala e tusa ai ma le fuaiupu 143 -

o le a aveesea le kamupani mai le tusi resitala a Samoa.

(3) O le faasilasilaga o le a tuuina atu i lalo o le parakalafa (b) ma le parakalafa (c) o le faafuaiupu (1) e tatau ona faamaoti mai ai:

(a) Le igoa o le kamupani; ma

(b) Le fuaiupu o lo o i ai i lalo, ma mafuaaga e faapea, ua faamoemoe e aveese ai le kamupani mai le tusi resitala a Samoa; ma

(c) Le aso e tatau ona tuuina atu ai i le Resitara se tetee i le aveesea i lalo o le fuaiupu 142 e le tatau ona itiiti ifo na i lo le 20 aso faigaluega ina ua tuanai le aso o le faasilasilaga.

141. Faasilasilaga o le faamoemoe e aveesea ai i isi tulaga-(1) Afai o le a aveesea se kamupani mai le tusi resitala i lalo o le fuaiupu 139(1)(b), e tatau i le Resitara ona tuuina atu se faasilasilaga faalauaitele o mataupu ua faataoto mai i le faafuaiupu (4).

(2) Afai o le a aveesea se kamupani mai le tusi resitala i lalo o le fuaiupu 139(1)(c) po o le (d), o le o loo talosaga, poo le tagata e faamaapeina le kamupani, po o le a lava le tulaga o i ai, e tatau ona tuuina atu se faasilasilaga faalauaitele o mataupu ua faataoto mai i le faafuaiupu (4).

(3) Afai o le a aveesea se kamupani mai le tusi resitala i lalo o le fuaiupu 139(1)(b), o le Resitara, po o, pe afai o le a aveesea mai le tusi resitala i lalo o le fuaiupu 139(1)(c), o le o loo talosaga, po o le a lava le tulaga o loo i ai, e tatau foi ona ia tuuina atu se faasilasilaga o mataupu ua faataoto mai i le faafuaiupu (4) i le:

- (a) Kamupani; ma
- (b) Se tagata e agavaa i se tau faaee atu e faasino i meatotino a le kamupani.
- (4) O le faasilasilaga o le a tuuina atu i lalo o lenei fuaiupu e tatau ona faamaoti mai ai:
 - (a) Le igoa o le kamupani; ma
 - (b) Le fuaiupu o loo i ai i lalo, ma mafuaaga e faapea, ua faamoemoe e aveesea ai le kamupani mai le tusi resitala a Samoa; ma
 - (c) Le aso e tatau ona tuuina atu ai i le Resitara se tetee i le aveesea i lalo o le fuaiupu 142 ma e tatau ona le itiiti ifo nai lo le 20 aso faigaluega pe a tuanai le aso o le faasilasilaga.

142. Tetee i le aveesea mai le tusi resitala-(1) I le tuuina atu o se faasilasilaga mo se faamoemoe e aveese ai se kamupani mai le tusi resitala a Samoa, e mafai e so o se tagata ona tuuina atu i le Resitara, a o le i tuanai le aso ua faamaoti mai i le faasilasilaga, se tetee i le aveesea i luga o so o se mafuaaga se tasi po o le sili atu o mafuaaga ua taua i lalo:

- (a) E faapea o le kamupani o loo tauaveina pea pisinisi po o o loo i ai isi mafuaaga mo le faaauau o le pisinisi; po o
 - (b) E faapea o le kamupani o se itu i se taualumaga faaletulafono; po o
 - (c) E faapea o le kamupani ua i le tulaga e faataape ai meatotino pe faamaape po o tulaga uma ia; po o
 - (d) E faapea o le tagata o ia lea o loo nofo aitalafu ai le kamupani, po o se tagata e umia sea, po o se tagata o i ai sana talosaga e le i totogiina faasaga i le kamupani; po o
 - (e) E faapea o le tagata o loo talitonu e faapea o loo aloaia pea, ma mafaufau e tulituliloa, se tagi e avee ai ma sui o le kamupani i lalo o le Vaega VII; po o
 - (f) E faapea, mo so o se isi lava mafuaaga, e le amiotonu ma talafeagai le aveese o se kamupani mai le tusi resitala a Samoa.
- (2) Mo le faamoemoe o le faafuaiupu (1)(d):

- (a) O se talosaga mo se tau'i a se tagata o loo nofo aitalafu ai le kamupani e faasaga i le kamupani ua le o se talosaga mo se tau'i e le i totogiina pe afai -
- (i) o le talosaga mo se tau'i ua maea ona totogi atoa; po o
 - (ii) o le talosaga mo se tau'i ua totogiina se vaega i lalo o se maliega fetuunai na faia i lalo o le Vaega XV po o ua faia e ese mai ai i se maliega talafeagai a le tagata o lo o nofo aitalafu;
 - (iii) o le talosaga mo se tau'i ua totogiina atoa po o na totogiina se vaega e le e faataapeina meatotino po o se tagata e faamaapeina le kamupani a o faagasolo le faamatuuese atu ma le faamaapeina; po o
 - (iv) ua logoina le tagata o lo o nofo aitalafu ai le kamupani e se tagata e faataapeina meatotino po o se tagata e faamaapeina le kamupani e faapea o meatotino a le kamupani e le gafatia le totogiina ai o le tagata o lo o nofo aitalafu ai le kamupani; ma
- (b) O se talosaga mo se tau'i a se tagata umia sea po o so o se isi tagata e faasaga i le kamupani ua le o se talosaga mo tau'i e le i totogiina pe afai -
- (i) ua maea ona totogi atu i le tagata e umia sea po o lena tagata e tusa ai ma se aia tatau i lalo o Mataupu o Faavae a le kamupani i le mauaina po o le vaevaeina o meatotino faasili a le kamupani; po o
 - (ii) ua logoina le tagata e umia sea po o lena tagata e faataapeina meatotino ma le e faamaapeina e faapea e leai ni meatotino faasili a le kamupani.

143. Tiute o le Resitara pe afai e mauaina se tetee-(1)

Afai o se tetee i le aveesea o se kamupani mai le tusi resitala ua faia i luga o se mafuaaga ua faamaoti mai i totonu o le fuaiupu 142(1)(a), (b) po o (c), e le tatau i le Resitara ona faaauau le aveeseina seia vagana ua faamalieina le Resitara e faapea:

- (a) Ua faai i tua le tetee; po o
- (b) So o se faamatlaga moni o lo o faavae ai le tetee e le sao po o e le o toe sao; po o
- (c) O le tetee e le taua pe faatupu faalavelave.

(2) Afai o se tetee i le aveesea o se kamupani mai le tusi resitala a Samoa ua faia i luga o se mafuaaga ua faamaoti mai i totonu o le fuaiupu 142(1)(d), (e), po o (f), e tatau i le Resitara ona tuuina atu se faasilasilaga i le tagata o lo o tetee e faapea, seia vagana se faasilasilaga o se talosaga i le Faamasinoga a lena tagata mo se poloaiga:

- (a) E faapea ia faamaapeina le kamupani; po o
- (b) I lalo o le fuaiupu 144, e faapea, i luga o so o se mafuaaga ua faamaoti mai i totonu o le fuaiupu 142, o le a le aveesea le kamupani mai le tusi resitala a Samoa -

ua tuuina atu i le Resitara e le silia le 20 aso faigaluega pe a tuana'i le aso o le faasilasilaga, o le Resitara e faamoemoe e faaauau le aveeseina.

(3) Afai:

- (a) O le faasilasilaga o sea talosaga i le Faamasinoga e le i tuuina atu i le Resitara; po o
- (b) Ua faai i tua le talosaga; po o
- (c) I le fofogaina o lea talosaga, na teena e le Faamasinoga le tuuina atu o se poloaiga e faamaape ai le kamupani po o se poloaiga e faapea o le kamupani e le aveesea mai le tusi resitala a Samoa -

o le a tatau loa i le Resitara ona faagasolo le aveeseina.

(4) O tagata uma e faia lea ituaiga talosaga e tatau ona tuuina atu i le Resitara se faasilasilaga tusitusia o le faaiuga a le Faamasinoga i totonu o le lima aso faigaluega talu ona tuuina mai le faaiuga.

(5) O le Resitara e tatau ona tuuina atu:

- (a) Se ata o se tetee i lalo o le fuaiupu 142; ma
- (b) Se ata o se faasilasilaga na avatu e po o ua tuuina atu i le Resitara i lalo o lenei fuaiupu; ma
- (c) Afai ua aveesea le kamupani mai le tusi resitala a Samoa, o le faasilasilaga o le aveeseina -

i se tagata sa lafoina pe tuuina atu i le Resitara se talosaga e faapea o le kamupani e ao ona aveesea mai le tusi resitala a Samoa i lalo o le fuaiupu 139(1)(c) po o, ao galue e fai ma sui o le tagata e faamaapeina le kamupani, lafoina pe tuuina atu i le Resitara pepa aloaia ua faasinomia i le fuaiupu 139(1)(d).

144. Pule a le Faamasinoga-(1) O se tagata o ia lea sa tuuina atu se faasilasilaga e tetee ai i le aveesea o se kamupani mai le tusi resitala Samoa i luga o se mafuaaga ua faamaoti mai i totonu o le fuaiupu 142(1)(d), (e) po o (f) e mafai ona talosaga i le Faamasinoga mo se poloaiga e faapea ia aua nei aveesea le kamupani mai le tusi resitala i luga o so o se mafuaaga ua faataoto mai i totonu o lena faafuaiupu.

(2) I luga o se talosag mo se poloaiga i lalo o le faafuaiupu (1), e mafai e le Faamasinoga, pe afai ua faamalieina e faapea o le kamupani e le tatau ona aveeseina mai le tusi resitala i luga o so o se isi o mafuaaga, ona faia se poloaiga e faapea e le aveeseina le kamupani mai le tusi resitala.

145. Aveesea mai le tusi resitala o meatotino a le kamupani-(1) O meatotino e faapea, i le taimi lava lea ao lumanai le aveeseina o se kamupani mai le tusi resitala Samoa, e le i tufatufaina po o e le i tuueseina atu, ua faaee atu i le Malo faatasi ai ma le taunuuga o le aveesea o le kamupani mai le tusi resitala.

(2) Mo le faamoemoe o lenei fuaiupu, o meatotino a le kamupani sa i ai muamua e aofia ai meatotino sa lisi ma isi uma aitalafu ua tuuina atu i ai po o umia faamavaega mo le kamupani sa i ai muamua, ae peitai e le aofia ai meatotino o lo o umia faa-tausi mavaega e le kamupani sa i ai muamua mo so o se isi lava tagata.

(3) E tatau i le Failautusi o Tupe, amata atu nei i lona silafia ai o le tuuina atu o meatotino, ona tuuina atu se faasilasilaga faalauaitetele o le tuuina atu, i le faataatia mai o le igoa o le kamupani sa i ai muamua faatasi ma auiliiliga o meatotino.

(4) Afai o meatotino ua tuuina atu i le Malo i lalo o lenei fuaiupu, o se tagata o ia lea sa ono agavaa e mauaina uma meatotino po o se vaega o meatotino, po o tupe mai le faatauina,

pe a faapea sa i lima o le kamupani i le taimi lava lea ao lumanai le aveeseina o le kamupani mai le tusi resitala Samoa, po o so o se isi tagata sa talosaga mo se tau i e ala mai i lenei tagata, e ono mafai ona talosaga i le Faamasinoga mo se poloaiga:

- (a) E tuuina uma atu ai meatotino po o se vaega o meatotino i lenei tagata; po o
 - (b) Mo se totogi i lenei tagata e le Malo mo tau i se aofaiga e le sili atu i le tau faatulagaina o le meatotino.
- (5) I luga o se talosaga ua faia i lalo o le faafuaiupu (4), e mafai e le Faamasinoga ona:
- (a) Iloiloina so o se fesili e aafia ai le tau faatulagaina o meatotino, agavaa o so o se tagata talosaga i le meatotino po o i tau, ma le vaevaeina o meatotino po o tau i le va o le lua po o le sili atu tagata talosaga; po o
 - (b) Poloaiina e faapea o le fofogaina o talosaga e lua po o le sili atu ia faamausaliina; po o
 - (c) Poloaiina e faapea o se talosaga ia faia e avea o se talosaga mo tagata uma, po o mo sui uma o se vasega o ni tagata, o lo o i ai lo latou aia i le meatotino; po o
 - (d) Faia se poloaiga faaopoopo.
- (6) Tupe mo tau ua poloaiina ina ia totogi i lalo o le faafuaiupu (4) e tatau ona totogiina mai i faaputugatupe a le Matagaluega o Tupe e aunoa ma nisi vaegatupe faatatauina na i lo lenei fuaiupu.

146. Tuuese atu o meatotino e le Malo-(1) E mafai e le Failautusi o Tupe, i se faasilasilaga tusitusia, ona tuuese atu le igoa o le Malo i meatotino ua faaeeina atu i le Malo i lalo o le fuaiupu 145 pe afai o le meatotino o se meatotino e tasi.

(2) E tatau i le Failautusi ona amata atu nei ona tuuina atu se faasilasilaga faalauaitele o le tuuese atu o meatotino e tele lavelave o i ai.

(3) O meatotino e faapea ua tuuese atu i lalo o lenei fuaiupu ua avea e faapea e le i faaeeina atu i le Malo i lalo o le fuaiupu 145.

(4) I le noatia ma le fai fuafua i so o se poloaiga a le Faamasinoga, e le agavaa le Failautusi o Tupe e tuuese atu se meatotino seia vagana:

(a) Ua tuuese atu le meatotino i totonu o le 12 masina ina ua tuanai le faaeeina atu o le meatotino i le Malo ma logoina loa le Failautusi; po o

(b) Afai o so o se tagata e tuuina atu se faasilasilaga tusitusia i le Failautusi e manaomia ai le Failautusi e filifili, a o lumanai le tapunia ai le aso e pei ona taua i totonu o le faasilasilaga, ua le o se aso e faapea e itiiti ifo nai le 60 aso faigaluega pe a tuanai le aso e faapea na mauaina ai le faasilasilaga e le Failautusi pe tuuese atu meatotino, pe leai o meatotino e tuuese atu ao lumanai le tapunia o lena aso -

po o le fea lava e tulai mai muamua.

(5) O se faamatalaga i se faasilasilaga e tuuese atu ai se meatotino i lalo o lenei fuaiupu e faapea o le faaeeina atu o le meatotino i le Malo sa faatoa silafia e le Failautusi o Tupe i se aso na faamaoti mai, ma i le leai ai o se molimau tetee, ua avea ma faamaoniga o le faamatalaga na taua.

(6) O le tuuese atu o meatotino i lalo o lenei fuaiupu:

(a) Ua faamutaina i le aso ma amata mai i le aso na tuueseai ai aia tatau, aia tuusao, ma noataga a le Malo e faasino i meatotino ua tuueseina;

(b) E le talia, seia vagana lava ua talafeagai ai ona faamaamulu mai le Malo mai i se noataga, aafia ai aia tatau po o noataga o so o se isi tagata.

(7) O se tagata ua puapuagatia i le gau po o i mea ua faaleagaina ona o le tuuina ese atu i lalo o lenei fuaiupu, e mafai:

(a) Ona tagi e avea o se tagata o lo o nofo aitalafu ai le kamupani mo se tau aofai o le gau po o mea ua faaleagaina, i le amanaia lea o le faamamaluina o so o se poloaiga na faia e le Faamasinoga i lalo o le parakalafa (b);

(b) Talosaga i le Faamasinoga mo se poloaiga e tuuina atu ai pe auina atu le pule faataga o le meatotino ua tuuese atu i lena tagata.

(8) E mafai e le Faamasinoga ona faia se poloaiga i lalo o le faafuaiupu (7)(b) pe afai ua faamalieina e faapea ua alagatatau ona tuu atu le pule faataga i meatotino i le o lo o talosaga.

(9) Mo faamoemoega o lenei fuaiupu, “meatotino e tele lavelave o i ai” o lona uiga -

- (a) O se konekarate e le maua ai se tupe mama; po o
- (b) Meatotino a le kamupani ua le mafai ona faatau atu, pe e le o i se tulaga e mafai ai ona faatau atu pe e ono tulai mai ai se noataga e totogi atu i ai ni tupe pe faatinoina se gaoioiga e tele lavelave o i ai.

147. Noataga o faatonu, tagata e umia sea, ma isi ia faamauina – O le aveesea o se kamupani mai le tusi resitala a Samoa e le aafia ai noataga o so o se faatonu sa i ai po o se tagata e umia sea a le kamupani po o so o se isi tagata e tusa ai i le tulaga o so o se gaoioiga po o mea ua le faia e faapea sa tulai mai ao lumanai le aveeseina o le kamupani mai le tusi resitala ma e faapea o lena noataga e faaauau ma e ono mafai ona faamalosia e faapei ai e le i aveeseina le kamupani mai le tusi resitala.

148. Faamaapeina o le kamupani ua aveesea mai le tusi resitala a Samoa-(1) E ese mai ai i le tulaga moni e faapea o lena kamupani ua maea ona aveeseina mai le tusi resitala Samoa, e ono mafai e le Faamasinoga ona tofia se tagata e faamaapeina le kamupani e faapei o lo o faaauau pea le aloaia o le kamupani.

(2) Afai o se tagata e faamaapeina le kamupani ua tofia e tusa ai ma le faafuaiupu (1):

- (a) O le tulafono e faasino i le faamaapeina o se kamupani o le a faaaogaina faatasi ma ni suiga e pei ona talafeagai ai;
- (b) O aiaiga o le fuaiupu 151 e faaaoga, faatasi ma nisi suiga e ono talafeagai ai, i meatotino a le kamupani ua faaeeina atu i le Malo i lalo o le fuaiupu 145 e faapei ai ua toe faaofiina le kamupani i totonu o le tusi resitala Samoa.

149. E mafai e le Resitara ona toe faaofi le kamupani i le tusi resitala a Samoa-(1) I le noatia ma le fai fuafua i lenei fuaiupu, e tatau i le Resitara, i luga o le talosaga a se tagata o lo o faasinomia i totonu o le faafuaiupu (2), ma e ono mafai, i luga o lona manatu, ona toe faaofiina se kamupani e faapea sa aveesea mai le tusi resitala Samoa i le tusi resitala pe afai ua faamalieina e faapea, i le taimi sa aveesea ai le kamupani mai le tusi resitala:

- (a) O le kamupani sa tauaveina pea pisinisi po o isi mafuaaga o loo aloaia mo le kamupani e faaauau ai lona aloaia; po o
 - (b) O le kamupani sa avea o se tasi o vaega i taualumaga faaletulafono; po o
 - (c) O le kamupani sa i le tulaga e faataapeina ai, pe sa faamaapeina pe pulea.
- (2) So o se tagata o ia lea, i le taimi sa aveesea mai ai le kamupani mai le tusi resitala Samoa, o se:
- (a) Tagata e umia sea po o faatonu o le kamupani; po o
 - (b) Tagata o loo nofo aitalafu ai le kamupani; po o
 - (c) Tagata e gafa ma le pulega, tagata e faamaapeina, po o se tagata e faataapeina meatotino a le kamupani -

e ono mafai ona faia se talosaga i lalo o le faafuaiupu (1).

(3) Ao lumanai le toe faaofiina e le Resitara o le kamupani i le tusi resitala Samoa i lalo o lenei fuaiupu:

- (a) I le tulaga o se kamupani e faapea sa aveeseina mai le tusi resitala Samoa i lalo o le parakalafa (a) po o parakalafa (b) o le fuaiupu 139(1), e tatau i le Resitara ona tuuina atu se faasilasilaga faalauaitete e faatulaga mai ai -
 - (i) le igoa o le kamupani; ma
 - (ii) le igoa ma le tuatusi o le o lo o talosaga; ma
 - (iii) o le fuaiupu o lo o i ai i lalo, ma le mafuaaga e faapea, na faia ai le talosaga po o ua fuafuaina e le Resitara e faia, po o le a lava le tulaga e i ai; ma

(iv) le aso e tatau ona tuuina atu i le Resitara se tetee i le toe faaofiina o le kamupani i le tusi resitala ia le itiiti ifo i le 20 aso faigaluega pe a tuanai le aso o le faasilasilaga.

(b) I le tulaga o se kamupani e faapea sa aveesea mai le tusi resitala Samoa i lalo o le parakalafa (c) po o le parakalafa (d) o le fuaiupu 139(1), o le tagata sa faia le talosaga i lalo o le faafuaiupu (1) e tatau ona tuuina atu se faasilasilaga faalauaitele e faatulaga mai ai -

(i) le igoa o le kamupani; ma

(ii) le igoa o le tagata ma le tuatusi; ma

(iii) le fuaiupu o loo i ai i lalo, ma mafuaaga e faapea, ua faia ai le talosaga; ma

(iv) le aso e tuuina atu ai i le Resitara o se tetee i le toe faaofiina o le kamupani i le tusi resitala ia le itiiti ifo nai le 20 aso faigaluega pe a tuanai le aso o le faasilasilaga.

(4) E le tatau i le Resitara ona toe faaofiina se kamupani i le tusi resitala Samoa pe afai e faapea o le Resitara ua ia taulimaina se tetee i le toe faaofiina i totonu o le vaitaimi ua taua i totonu o le faasilasilaga.

(5) Ao lumanai le toe faaofiina e le Resitara o se kamupani i le tusi resitala Samoa i lalo o lenei fuaiupu, e ono manaomia e le Resitara so o se aiaiga o lenei Tulafono po o so o se tulafono faatonutonu ua faia i lalo o lenei Tulafono po o se isi lava Tulafono, e faapea o ni aiaiga e le i tausisia e le kamupani ae le i aveesea mai le tusi resitala, e ao ona tausisia.

(6) E mafai e le Faamasinoga, i luga o se talosaga a le Resitara poo le o loo talosaga, ona tuuina atu sea faatonuga poo le faia o sea poloaiga e ono talafeagai po o e manaomia mo le faamoemoe o le tuuina o se kamupani e faapea ua toe faaofiina i le tusi resitala Samoa i lalo o lenei fuaiupu ma so o se isi tagata e tau lalata i lea tulaga e faapei ai e le i aveesea le kamupani mai le tusi resitala.

(7) E leai se mea i totonu o lenei fuaiupu e faatapulaa ai pe aafia ai le fuaiupu 150.

150. E mafai e le Faamasinoga ona toe faaofi le kamupani i le tusi resitala a Samoa-(1) E mafai e le Faamasinoga, i luga o se talosaga a se tagata ua faasinomia i lenei faafuaiupu (2), ona poloaiina le toe faaofiina o se kamupani ua aveesea mai i le tusi resitala a Samoa pe afai ua faamalieina e faapea:

- (a) I le taimi sa aveesea mai ai le kamupani i le tusi resitala -
 - (i) sa faaaau le tauaveina o pisinisi a le kamupani po o isi mafuaaga o loo i ai mo le kamupani e faaaau ai lona aloaia; po o
 - (ii) o le kamupani sa auai i taualumaga faale-tulafono; po o
 - (iii) o le kamupani sa i le tulaga e faataapeina ai, pe faamaapeina po o tulaga tau pulega; po o
 - (iv) o le o loo talosaga o se tagata sa nofo aitalafu ai le kamupani, po o se tagata e umia sea, po o se tagata o ia lea sa i ai sana talosaga mo se tau faasaga i le kamupani e le i totogiina; po o
 - (v) ua talitonu le o loo talosaga e faapea o se aia e tagi ai o loo i ai, poo faamoemoe e tulituliloa se aia e tagi ai, e avee ai ma sui o le kamupani i lalo o le Vaega XVII; po o
 - (b) Mo so o se isi mafuaaga e amiotonu ma alagata ai le toe faaofiina o le kamupani i le tusi resitala Samoa.
- (2) E ono mafai e tagata o le a taua i lalo ona faia se talosaga i lalo o le faafuaiupu (1):
- (a) So o se tagata o ia lea, i le taimi sa aveesea ai le kamupani mai le tusi resitala Samoa -
 - (i) o se tagata e umia sea po o se faatonu o le kamupani; po o
 - (ii) o se tagata sa nofo aitalafu ai le kamupani; po o
 - (iii) sa auai i so o se taualumaga faale-tulafono e faasaga i le kamupani; po o
 - (iv) sa i ai sana talosaga mo se tau faasaga i le kamupani e le i totogiina; po o

(v) sa pulea, po o le tagata e faamaapeina, po o se tagata e faataapeina meatotino a le kamupani.

(b) O le Resitara;

(c) I le faatagaga a le Faamasinoga, so o se isi lava tagata.

(3) Ao lumanai le faia e le Faamasinoga o se poloaiga e toe faaofiina ai se kamupani i le tusi resitala Samoa i lalo o lenei fuaiupu, e ono manaomia so o se aiaiga po o so o se tulafono faatonutonu ua faia i lalo o lenei Tulafono, e faapea o ni aiaiga e le i tausiona e le kamupani ae lei aveesea mai le tusi resitala, e ao ona tausiona.

(4) E ono mafai e le Faamasinoga ona tuuina atu ia faatonuga po o le faia o ia poloaiga e ono talafeagai po o manaomia mo le faamoemoe o le tuuina o le kamupani ma so o se isi tagata e taulalata i le tulaga lava lea e tasi e faapei ai e le i aveesea le kamupani mai le tusi resitala Samoa.

151. Toe faaofiga i le tusi resitala-(1) O se kamupani ua toe faaofiina i le tusi resitala Samoa pe afai o se faasilasilaga ua sainia e le Resitara ua taua mai ai e faapea o le kamupani ua toe faaofiina i le tusi resitala Samoa ua faamauina i lalo o lenei Tulafono.

(2) O se kamupani e faapea ua toe faaofiina i le tusi resitala a Samoa ua avea e faapea sa faaauauina lona i ai pea e faapei e le i aveeseina mai le tusi resitala.

152. Faaceina atu o meatotino i le kamupani-(1) I le noatia ma le fai fuafua i lenei fuaiupu, o meatotino a se kamupani e faapea, i le taimi na toe faaofiina ai le kamupani i le tusi resitala Samoa ua faaceina atu i le Malo e tusa ai ma le fuaiupu 145, ua faaceina atu i le kamupani i luga o le toe faaofiina i le tusi resitala Samoa e faapei ai e le i aveesea le kamupani mai le tusi resitala.

(2) E leai se mea i totonu o le faafuaiupu (1) e faaoga i so o se meatotino ua faeina atu i le Malo e tusa ai ma le fuaiupu 145 pe afai ua faia e le Faamasinoga se poloaiga mo le totogiina o tau i so o se tagata e tusa ai ma le fuaiupu 145(4)(b) e faasino i lena meatotino.

(3) E leai se mea i totonu o le faafuaiupu (1) e faaoga i fanua po o so o se esetete po o aia i fanua e faapea sa faaeeina atu i le Malo e tusa ai ma le fuaiupu 145 pe afai o le faaliliuina atu i le Malo o le fanua po o lena esetete po o aia i fanua ua faamauina i lalo o le Tulafono o le Faamauina o Fanua 1992/1993.

(4) I le faaliliuina atu i le Malo o fanua po o so o se esetete po o aia i fanua e faapea sa faaeeina atu i le Malo e tusa ai ma le fuaiupu 145 ua faamauina i lalo o le Tulafono le Faamauina o Fanua 1992/1993, e ono mafai e le Faamasinoga, i luga o le talosaga a le kamupani, ona faia se poloaiga:

(a) Mo le faaliliuina atu o fanua po o le esetete po o aia i le kamupani; po o

(b) Mo le totogiina e le Malo i le kamupani o tau -

(i) o se aofaiga e le sili atu na i le tau faatulagaina o le fanua po o le esetete po o aia e tusa ai o le aso o le faamauina o le faaliliuina; po o

(ii) pe afai o le fanua po o le esetete po o aia ua faatauina atu po o faakonekarate mo le faatauina atu, i se aofaiga e tutusa ma le aofaiga faaiu e mauaina po o e mauaina mai le faatauina atu.

(5) I luga o se talosaga i lalo o le faafuaiupu (4), e ono mafai e le Faamasinoga ona fuafuaina so o se fesili e aafia ai le tau faatulagaina o le fanua po o le esetete po o aia.

(6) O tau i ua poloaiina e totogi i lalo o le faafuaiupu (4) e tatau ona totogiina mai faaputugatupe a le Matagaluega o Tupe e aunoa ma nisi tupe faatatauina na i lo lenei fuaiupu.

VAEGA XVIII KAMUPANI MAI FAFO

153. Uiga o le “tauaveina pea o pisinisi” - Mo le faamoemoe o lenei Vaega,:

(a) O se faamatalaga e faasino i se kamupani mai fafo o lo o tauaveina se pisinisi i totonu o Samoa e aofia ai se faasinoga i se kamupani mai fafo –

(i) ua faavaeina po o faaaogaina se ofisa e faaliliu ai sea po o se ofisa faamauina ai sea i totonu o Samoa; po o

(ii) le puleaina, faafoeina, po o le tagofia o meatotino i totonu o Samoa e avea ai o se sooupu, po o se sui mo le tagata lava ia, po o se tausī mavaega, ma pe o auala mai i ana tagata faigaluega po o se sooupu po o i so o se isi lava auala:

(b) O se kamupani mai fafo e le o faaauauina ni pisinisi i totonu o Samoa ona ose mafuaaga i totonu o Samoa -

(i) ua ia po o ua avea ma vaega i taualumaga faaletulafono po o ua foia se taualumaga faaletulafono po o se tagi po o se feeseeseaiga; po o

(ii) e faia ni fonotaga a ana faatonu po o tagata e umia sea po o tauaveina isi mataupu e aafia ai ana mataupu tau lotoifale; po o

(iii) tausīa se teugatupe i le faletupe; po o

(iv) faataunuina se faatautui o meatotino e ala i se konekarate tutoatasi; po o

(v) le vaavaaia po o le tuuina atu o se poloaiga ua avea o se konekarate e noatia ai pe afai lava o lenei poloaiga e talia i fafo atu o Samoa; po o

(vi) le faatupuina o se molimau i se aitalafu po o le faatupuina o se tau faatupulaia i luga o meatotino; po o

(vii) ia faamalumalu po o le aoina so o sana aitalafu po o le faamalosia o ana aia tatau e faasino i faamalumaluga e faasino i na aitalafu; po o

(viii) le faafoeina o se galuega faatino e ese mai ua maea i totonu o se vaitaimi 30 aso faigaluega, e le o se tasi o le aofaiga o galuega faatino tali tutusa e faifai pea mai lea taimi i lea taimi; po o

(ix) le teu faafaigaluegaina o ana faaputugatupe po o le umia o meatotino.

154. Igoa e tatau ona tausisia ai le fuaiupu 10-(1) E le tatau i se kamupani mai fafo ona tauaveina ni pisinisi i totonu o Samoa i po o ina ua tuanai le faamamaluina o lenei Tulafono i lalo ose igoa e faapea e le mafai ona faamauina i lalo o le fuaiupu 7(2).

(2) O le faafuaiupu (1) e le faaaogaina i se kamupani mai fafo e faapea, i le taimi lava lea ao lumanai le faamamaluina o lenei Tulafono, o lo o faamauina i lalo o le Vaega XII o le Tulafono o Kamupani 1955.

(3) Afai o se kamupani mai fafo ua solia lenei fuaiupu:

(a) Ua faia e le kamupani se solitulafono ma e noatia i se moliaga ua faamaonia faaletulafono i se faasalaga ua faatulaga mai i le fuaiupu 194(2); ma

(b) O faatonu uma o le kamupani ua faia se solitulafono ma ua noatia i se moliaga ua faamaonia faaletulafono i se faasalaga ua faatulaga mai i le fuaiupu 195(2).

155. Kamupani mai fafo ia faamauina i lalo o lenei Tulafono-(1) O se kamupani mai fafo e faapea, i luga po o ina ua tuanai le faamamaluina o lenei Tulafono, e amata ona tauaveina pisinisi i totonu o Samoa e tatau ona talosaga mo le faamauina i lalo o lenei Vaega e tusa ai male fuaiupu 157 i totonu o le 10 aso faigaluega e amataina ai le tauaveina o pisinisi.

(2) I le noatia ma le fai fuafua i le faafuaiupu (3), o se kamupani mai fafo e faapea, i le taimi lava lena a o lumanai le faamamaluina o lenei Tulafono, sa tauaveina pisinisi i totonu o Samoa ma, i le amataga o lenei Tulafono, o lo o faaauau ai pea le tauaveina o pisinisi i totonu o Samoa, e tatau ona talosaga mo le faamauina i lalo o lenei Vaega e tusa ai ma le fuaiupu 157 i totonu o le 10 aso faigaluega talu le faamamaluina o lenei Tulafono.

(3) O se kamupani mai fafo faamauina i lalo o le Vaega XII o le Tulafono o Kamupani 1955 i le taimi lava lena ao lumanai le aso e faamamaluina ai lenei Tulafono ua, ma mai lea aso ua avea e faapea o le a faamauina i lalo o lenei Vaega ae le o i lalo o le Vaega XII o le Tulafono o Kamupani 1955.

(4) O se kamupani mai fafo e faapea ua faamauina i lalo o lenei Vaega, i lalo o le fafuaiupu (3), e tatau, i totonu o le 20 aso faigaluega mai i le aso na amata faamamaluina ai lenei Tulafono, ona tuuina atu i le Resitara mo le faamauina, se faasilasilaga i pepa faatonuina e taua ai le:

- (a) Tuatusi atoa o le nofoaga autu o le pisinisi i Samoa a le kamupani mai fafo;
- (b) Le tuatusi o le pusameli i Samoa a le kamupani mai fafo;
- (c) Le igoa atoa o se tagata e toatasi pe sili atu e nofomau i Samoa pe o se faalapotopotoga ua tuufaatasia faaletulafono i Samoa e taliaina le tautua i Samoa e ala i pepa e avea ai ma sui o kamupani mai fafo; ma
- (d) Le tuatusi o le pusameli ma le nuu po o le tuatusi o le pisinisi a tagata taitasi o lo o faasinomia i le parakalafa (c).

(5) O se kamupani mai fafo na te suia lona igoa e tatau ona tuuina atu po o le auina atu i le Resitara se faasilasilaga i totonu o le faiga faatonuina mo le suiga o le igoa i totonu o le 10 aso faigaluega o le suia o le igoa.

(6) Pe afai o se kamupani mai fafo ua le mafai ona tausia lenei fuaiupu:

- (a) Ua faia e le kamupani mai fafo se solitulafono ma ua noatia ise moliaga ua faamaonia faaletulafono i se faasalaga ua faatulaga mai i totonu o le fuaiupu 194(2); ma
- (b) O faatonu uma o le kamupani i fafo ua faia se solitulafono ma ua noatia i se moliaga ua faamaonia faaletulafono i se faasalaga ua faatulaga mai i totonu o le fuaiupu 195(2).

156. Tulaga e aloaia ai galuega faatino e le o aafia - O le le usitaia e se kamupani mai fafo ona tausisia le fuaiupu 154 po o le fuaiupu 155 e le aafia ai le aloaia po o le tulaga e ono faamalosia ai so o se galuega faatino ua faia e le kamupani mai fafo.

157. Tusi talosaga mo le faamauina-(1) O se tusi talosaga mo le faamauina o se kamupani mai fafo i lalo o lenei Vaega e tatau ona auina atu i le Resitara ma e tatau ona:

- (a) Faia i pepa ua faatonuina; ma
 - (b) Ia sainia e po o e aveia ai ma sui o le kamupani mai fafo.
- (2) E aunoa ma le faatapulaaina ai o le faafuiauupu (1), e tatau i le tagata o lo o talosaga ona:
- (a) Taua le igoa o le kamupani mai fafo; ma
 - (b) Taua le igoa atoa ma le tuatusi nofomau o faatonu o le kamupani mai fafo i le aso o le talosaga; ma
 - (c) Taua le tuatusi atoa o le nofoaga o le pisinisi i totonu o Samoa o le kamupani i fafo po o, pe afai o le kamupani i fafo e sili atu nai le 1 le nofoaga o pisinisi i totonu o Samoa, le tuatusi atoa o le nofoaga autu o le pisinisi i totonu o Samoa o le kamupani i fafo; ma
 - (d) Taua le tuatusi o le pusameli o le kamupani mai fafo i Samoa; ma
 - (e) Ua faapipii mai ai molimau o le tuufaatasia faaletulafono o le kamupani mai fafo ma, afai e le o i le gagana Peretania, ia aumai se faaliliuga faamaonia o lena pepa aloaia; ma
 - (f) Taua le igoa atoa male tuatusi o se tagata e toatasi po o le sili atu o lo o nonofo ai tagata po o na faavae ai faaletulafono i totonu o Samoa o i latou ia ua faatagaina e talia auaunaga i totonu o Samoa o pepa aloaia e aveia ai ma sui o le kamupani mai fafo.

158. Faamauina o kamupani mai fafo-(1) Afai ua mauaina e le Resitara se talosaga ua maea lelei ona faia mo le faamauina i lalo o lenei Vaega mo se kamupani mai fafo, e tatau

i le Resitara i le taimi lava lea ona faamauina le talosaga i le tusi resitala o Kamupani mai fafo.

(2) Afai o se kamupani mai fafo ua faapea o le a faamauina i lalo o lenei Vaega e tusa ai ma le fuaiupu 155(3), e tatau i le Resitara, i le taimi lava lea ina ua tuanai le faamamaluina o lenei Tulafono, ona faaliliu atu le faamauina o le kamupani mai fafo i le tusi resitala mai fafo.

(3) Afai ua mauaina e le Resitara se faasilasilaga o se suiga o le igoa o se kamupani mai fafo e tusa ai ma le fuaiupu 155(5), e tatau i le Resitara ona faamauina le suiga o le igoa i le tusi resitala o kamupani mai fafo.

159. Faaaogaina o le igoa e le kamupani mai fafo-(1) O kamupani uma mai fafo e faapea o lo o tauaveina pisinisi i totonu o Samoa e tatau ona mautinoa e faapea o lona igoa atoa, ma le igoa atoa o le atunuu sa faamau ai faaletulafono, o lo o taua manino i totonu o:

- (a) Fesootaiga tusitusia sa lafoina mai e, po o e avea ai ma sui o le kamupani; ma
- (b) Pepa aloaia ua tuuina atu po o ua sainia e, po o e avea ai ma sui o le kamupani e avea ma molimau po o ua faatupuina ai se noataga faaletulafono a le kamupani.

(2) Mo le faamoemoe o le faafuaiupu (1), ose faapuupuuga aloaia lautele o se upu po o ni upu e ono mafai ona faaaogaina i se igoa o se kamupani mai fafo pe afai e le taufaasese le faia o lea tulaga.

160. Isi faamatalaga e ao ona tuuina mai e kamupani mai fafo-(1) O se kamupani mai fafo e faapea o lo o tauaveina pisinisi i totonu o Samoa e tatau ona mautinoa e faapea, i totonu o le 20 aso faigaluega talu le suiga, ua tuuina atu se faasilasilaga i se faiga ua faatonuina i le Resitara o –

- (a) Se suiga i faatonu po o i igoa po o tuatusi nofomau o faatonu o le kamupani mai fafo; po o
- (b) Se suiga i le tuatusi o le nofoaga o le pisinisi po o le nofoaga autu o le pisinisi o le kamupani mai fafo; po o

- (c) Se suiga i le tuatusi pusameli o le kamupani mai fafo i Samoa; po o
 - (d) Se suiga i soo se tagata po o se tuatusi o le pusameli po o le nuu o so o se tagata ua faatagaina e talia le tuuina atu i totonu o Samoa o pepa aloaia e avea ai ma sui o le kamupani mai fafo.
- (2) E tatau i se kamupani mai fafo, i totonu o le 20 aso faigaluega i le manaomia e le Resitara le faia, ona auina atu i le Resitara:
- (a) Se ata faamaonia o pepa aloaia faaletulafono o lo o faavae ai po o faamatalaina ai lona faavae; po o
 - (b) Se ata faamaonia o so o se suiga i lona pepa aloaia faaletulafono talu mai le taimi mulimuli na tuuina atu ai se ata o lona pepa aloaia faaletulafono i le Resitara; ma
 - (c) Afai o pepa aloaia talafeagai e le o i le gagana Peretania, ia tuuina mai se faaliliuga faamaonia o na pepa aloaia.

E tatau i le Resitara ona manaomia le auina mai o ia pepa aloaia e le kamupani mai fafo i lalo o lenei faafuaiupu pe afai e talosagaina le faia ese tagata o lo o nofo aitalafu ai le kamupani o lona kamupani mai fafo i totonu o Samoa, seia vagana ai ua manatu le Resitara e faapea o le talosaga e le logomalie, ma e fai ma toatuga.

(3) Afai o se kamupani mai fafo ua le usitaia le tausisia o le faafuaiupu (1) po o le faafuaiupu (2):

- (a) Ua faia e le kamupani mai fafo se solitulafono ma ua noatia i se moliaga ua faamaonia faaletulafono ise faasalaga ua faatulaga mai i totonu o le fuaiupu 194(2); ma
- (b) O faatonu uma o le kamupani mai fafo ua faia se solitulafono ma ua noatia i se moliaga ua faamaonia faaletulafono i se faasalaga ua faatulaga mai i totonu o le fuaiupu 195(2).

161. Faamatalaga o tupe maua faaletausaga a kamupani mai fafo-(1) O kamupani uma mai fafo e faapea o lo o tauaveina pisinisi i totonu o Samoa e tatau ona mautinoa e mauaina e le Resitara i tausaga taitasi, ao faagasolo le masina ua

atofaina i le kamupani mai fafo mo le faamoemoe o lenei fuaiupu, se faamatalaga o tupe maua faaletausaga i totonu o le faiga ua faatonuina e faamaonia ai e faapea o faamatalaga o i le tusi resitala o kamupani mai fafo e faasino i le kamupani mai fafo ua faasinomia i totonu o le faamatalaga o tupe maua e sao i le aso lava o le faamatalaga o tupe maua.

(2) O le faamatalaga o tupe maua faaletausaga e tatau ona faia i se aso i totonu o le masina e faapea o lo o manaomia ai le faamatalaga o tupe maua mo le mauaina e le Resitara.

(3) I le faamauiina o se kamupani mai fafo i lalo o lenei Vaega, e tatau i le Resitara ona atofaina se masina i le kamupani mo le faamoemoe o lenei fuaiupu.

(4) E mafai e le Resitara, e ala i se faasilasilaga tusia i se kamupani mai fafo, ona suia le masina ua atofaina i le kamupani i lalo o le faafuaiupu (3).

(5) E ese mai ai i le faafuaiupu (1), o se kamupani mai fafo, e le faapea o se kamupani mai fafo o le a faamauiina i lalo o lenei Vaega, e le manaomia le faia o se faamatalaga o tupe maua faaletausaga i totonu o le tausaga faakalena o lona faamauiina i lalo o lenei Vaega.

(6) Afai o se kamupani mai fafo ua le usitaia le tausisia o le faafuaiupu (1) po o le faafuaiupu (2):

(a) Ua faia e le kamupani se solitulafono ma ua noatia i se moliaga ua faamaonia faaletulafono i se faasalaga ua faatulaga mai i totonu o le fuaiupu 194(2); ma

(b) O faatonu uma o kamupani mai fafo ua faia se solitulafono ma ua noatia i se moliaga ua faamaonia faaletulafono i se faasalaga ua faatulaga mai i totonu o le fuaiupu 195(2).

162. Kamupani mai fafo ua faamuta le tauaveina o pisinisi i totonu o Samoa-(1) O se kamupani mai fafo faamauiina i lalo o lenei Vaega e faapea ua faamoemoe e le toe tauaveina pisinisi i totonu o Samoa e tatau ona:

(a) Tuuina atu se faasilasilaga faalauaitetele mo lona faamoemoe; ma

(b) Tuuina atu se faasilasilaga i le Resitara i totonu o le faiga ua faatonuina e taua ai le aso e faapea o le a faamuta ai le tauaveina o pisinisi i totonu o Samoa.

(2) E tatau i le Resitara ona aveese se kamupani mai fafo mai le tusi resitala o kamupani mai fafo i se taimi vave talafeagai pe a tuanai:

(a) Le aso ua faamaoti mai i totonu o le faasilasilaga sa tuuina mai e tusa ai ma le faafuaiupu (1)(b); po o

(b) Le mauaina o se faasilasilaga tusia e tuuina atu e le tagata e faamaapeina e faapei ua maea ona faamaapeina meatotino i totonu o Samoa a le kamupani mai fafo.

163. Faamaapeina o meatotino i totonu o Samoa-(1) E mafai ona faia se talosaga i le Faamasinoga mo le faamaapeina o meatotino i totonu o Samoa a se kamupani mai fafo e tusa ai ma le Tulafono e faasino i le faamaapeina o kamupani. O lena Tulafono e faaoga faatasi ma ni suiga talafeagai i se talosaga e faia i lalo o lenei fuaiupu, ma i le faafoeina o le faamaapeina o meatotino i Samoa a se kamupani mai fafo.

(2) E mafai ona faia se talosaga i lalo o le faafuaiupu (1) tusa lava po o le kamupani mai fafo ua pe leai foi:

(a) Ua faamauina i lalo o lenei Vaega; po o

(b) Ua tuuina atu se faasilasilaga faalauaitetele o se faamoemoe e faamuta ai le tauaveina o pisinisi i totonu o Samoa e tusa ai male fuaiupu 162(1)(a); po o

(c) Ua tuuina atu se faasilasilaga i le Resitara mo le aso e faapea o le a faamuta ai le tauaveina o pisinisi i totonu o Samoa e tusa ai ma le fuaiupu 162(1)(b); po o

(d) Ua soloia, po o ua faamuata le aloaia e avea ai o se kamupani, i lalo po o e tusa ma tulafono o soo se isi atunuu.

164. Loia a kamupani mai fafo-(1) O le Vaega XII o le Tulafono o Meatotino 1952 e faaoga, faatasi ma teuteuga e tatau ai, e faasino i le pule a se loia ua faatinoina e kamupani

mai fafo ua faamauina i lalo o lenei vaega i le tulaga lava lea e tasi e pei ai le kamupani e faapei o se tagata ma e avea ai foi le amataga o le faamaapeina faaletulafono o le kamupani e faapei o se oti o se tagata i totonu o le uiga o le Vaega XII o lena Tulafono.

(2) O se tautinoga ua faamaonia i po o faapipii atu i se pepa aloaia faaletulafono o lo o tofia ai, po o e foliga mai e tofia ai, se loia a se kamupani mai fafo, ua faia po o e foliga mai o le a faia e se tasi o faatonu i luma o se tagata ua faatagaina i lalo o le fuaiupu 22 o le Tulafono o Tautoga, Faamatalaga Tauto ma Tautinoga 1963 e faia se tautinoga mo le faaaogaina i totonu o Samoa, atunuu o lo o aafia ai, i le taunuuga e faapea:

- (a) O le kamupani ua faatuina faaletulafono i lalo o le igoa ua taua i le pepa e tusa ai ma le tulafono o le atunuu e faapea sa faatuina ai faaletulafono, le igoa e faapea o lo o ua taua i totonu o le tautinoga; ma
 - (b) O le pepa faaletulafono ua uma ona faatinoina, ma pule ua foliga mai ua faaee atu i le loia ua faatagaina ina ia faaee atu i lalo o le faavae a le kamupani, po o i lalo o le Tulafono po o pepa faaletulafono o lo o faapea na faatuina ai faaletulafono le kamupani po o e ala i se i si pepa faaletulafono ua faavae ai po o faamatalaina ai le faavae o le kamupani; ma
 - (c) O le tagata ua faia le tautinoga o se faatonu o le kamupani –
- o se molimau maumaututu lea o na faamatalaga moni.

VAEGA XIX FAALILIUINA ATU O LE FAAMAUINA

Faamauina o kamupani mai fafo e avea o ni kamupani i lalo o lenei Tulafono

165. E mafai e kamupani mai fafo ona faamauina e pei o kamupani i lalo o lenei Tulafono – I le noatia ma le fai fuafua i lenei Vaega, e mafai e se kamupani mai fafo ona faamauina e avea o se kamupani i lalo o lenei Tulafono.

166. Tusi talosaga mo le faamauina—(1) O se tusi talosaga a se kamupani mai fafo ina ia faamauina e avea o se kamupani i lalo o lenei Tulafono e tatau ona faia i le faiga ua faatonuina ma ia faapipii mai faatasi ma:

- (a) Se ata faamaonia o lana tusi faamaonia o le tuufaatasia faaletulafono po o isi pepa aloaia e fai ma molimau o lona tuufaatasia faaletulafono; ma
 - (b) Se ata faamaonia o pepa aloaia e faamatala ai lona faavae; ma
 - (c) Molimau e ono taliaina e le Resitara e faapea o le kamupani e le o puipuia mai le faamauina e avea ose kamupani i lalo o lenei Tulafono e ala i le fuaiupu 167 po o le fuaiupu 168; ma
 - (d) O pepa aloaia ma faamatalga e faapea o lo o manaomia e faamauina ai se kamupani i lalo o le Vaega II; ma
 - (e) So o se isi pepa aloaia ma faamatalaga e ono manaomia e le Resitara.
- (2) E mafai e le Resitara ona faatonuina e faapea o se pepa aloaia ua auina atu i le Resitara po o faamauina i lalo o le Vaega XVIII e le manaomia le faapipii mai i le tusi talosaga.

167. E tatau ona faatagaina kamupani mai fafo ina ia faamauina—(1) E le tatau i se kamupani mai fafo ona faamauina e avea o se kamupani i lalo o lenei Tulafono seia vagana ai:

- (a) Ua faatagaina le kamupani e faaliliu atu lona tuufaatasia faaletulafono i lalo o le tulafono a le atunuu sa faapea ona faamauina ai faaletulafono; ma
- (b) Ua tausisia e le kamupani manaoga o lona tulafono e faasino i le faaliliu atu o lona tuufaatasia faaletulafono; ma
- (c) Pe afai o lona tulafono e le manaomia tagata e umia sea o le kamupani, po o se vaega maoti o i latou, e malilie i le faaliliu atu o lona tuufaatasia faaletulafono, o le faaliliuina atu sa malilie i ai se vaega e le itiiti ifo i le 75 pasene o ana tagata e umia sea ua agavaa e palota ma le faia e ia o lana

lava palota po o le tofia o se sui e palota mo ia i se fono faapea e le itiiti ifo i le 21 aso o le faasilasilaga ua tuuina atu e faamaoti mai ai le faamoemoe e faaliliu ai le tuufaatasia faaletulafono o le kamupani.

168. Kamupani mai fafo e faapea e le mafai ona faamauina-(1) E le tatau ona faamauina se kamupani mai fafo e avea o se kamupani i lalo o lenei Tulafono pe afai –

- (a) O le kamupani ua faamaapeina; po o
- (b) Ua tofia se tagata e mauaina po o se pule, e ala i le faamasinoga pe leai, e faasino i meatotino a le kamupani; po o
- (c) Ua ulufale atu le kamupani i se maliega fetuunai po o se fetuunaiga ma se tagata o lo o nofo aitalafu ai le kamupani o lo o faapea ona faamalosia; po o
- (d) Ua faia se talosaga i se faamasinoga, pe i totonu o Samoa po o i se isi atunuu, -
 - (i) ia faamaapeina le kamupani po o le tapunia loa; po o
 - (ii) mo le faamaonia o se fetuunaiga po o se feutanaiga i le va o le kamupani ma le tagata o lo o nofo aitalalafu ai le kamupani -

ma e lei faia i ai se fuafuaga.

169. Faamauina-(1) I le taimi lava e mauaina ai e le Resitara se talosaga ua maea lelei ona faia mo le faamauina o se kamupani i fafo e avea o se kamupani i lalo o lenei Tulafono, e tatau i le Resitara ona:

- (a) Faaulufale le kamupani i le tusi resitala a Samoa; ma
- (b) Tuuina atu se tusi faamaonia o le faamauina i totonu o le faiga ua faatonuina.

(2) O se tusi faamaonia o le faamauina ose kamupani ua tuuina atu i lalo o lenei fuaiupu o le molimau maumaututu lea e faapea:

- (a) O manaoga uma e faasino i le faamauina ua faapea ona tausisia; ma

(b) I luga ma mai le aso o le faamauina ua taua i totonu o le tusi faamaonia, ua faamauina ai le kamupani i lalo o lenei Tulafono.

(3) Afai o se talosaga mo le faamauina a se kamupani mai fafo e avea ose kamupani i lalo o lenei Tulafono ua faamaoti mai ai se aso e faapea ua faamoemoe e aloaia ai le faamauina, ma o lena aso e tutusa ma, po o i se aso mulimuli ane, i le aso e faapea na mauaina ai e le Resitara pepa aloaia, o le tusi faamaonia o le faamauina e tatau ona faamatala manino mai ai le aso e aloaia ai e pei ona faamaoti mai i totonu o le talosaga.

170. Taunuuga o le faamauina-(1) O le faamauina o se kamupani mai fafo i lalo o lenei Tulafono e le:

- (a) Faia ai se itutino fou faaletulafono; po o
- (b) E faaituau ai po o e aafia ai le iloagofie o le faalapotopotoga ua faamauina faaletulafono ua faia e le kamupani po o lona faaauauina e avea ose itutino faaletulafono; po o
- (c) E aafia ai meatotino, aia tatau po o matafaioi totino a le kamupani; po o
- (d) E aafia ai taualumaga o le po o e faasaga i le kamupani.

(2) O taualumaga e faapea sa tatau ona amatalia po o e faaauauina e po o e faasaga i le kamupani mai fafo ao lumanai le faamauina i lalo o lenei Tulafono e mafai ona amataina pe faaauauina e po o e faasaga i le kamupani ina ua tuanai le faamauina.

***Faaliliuina atu o le Faamauina o Kamupani i isi
Pulega faaletulafono***

171. E mafai e kamupani ona faaliliu atu le tuufaatasia faaletulafono - I le noatia ma le faifuafua i lenei Vaega, e mafai ona aveesea mai se kamupani mai le tusi resitala a Samoa e fesootai ma e avea o se kamupani ua faatuina faaletulafono i lalo o le tulafono o lo o faamalosi i, po o i so o se vaega o, se isi atunuu.

172. Tusi talosaga e faaliliu atu ai le tuufaatasia faaletulafono – O se tusi talosaga a se kamupani mo le aveesea mai le tusi resitala a Samoa e fesootai ma le avee ma kamupani faatuina faaletulafono i lalo o le tulafono o lo o faamalosia i po o i soo se vaega o, se isi atunuu, e tatau ona i totonu o se faiga ua faatonuina ma e tatau ona aumai faatasi ma –

- (a) Molimau e ono taliaina e le Resitara e faapea o fuaiupu 173 ma le 174 ua faapea ona tausisia faatasi; ma
- (b) Molimau e ono taliaina e le Resitara e faapea o le aveesea o le kamupani mai le tusi resitala a Samoa e le puipuia e le fuaiupu 175; ma
- (c) Se faasilasilaga tusia mai le Komesina o Lafoga e faapea e leai se tetee a le Komesina i le Kamupani ua aveesea mai le tusi resitala a Samoa; ma
- (d) Molimau e ono taliaina e le Resitara e faapea o le kamupani ua faatuina faaletulafono i lalo o lena tulafono, po o o le a faatuina faaletulafono i lalo o lena tulafono e le silia le aso mai le aso o le a aveesea mai ai i le tusi resitala a Samoa; ma
- (e) So o se isi pepa aloaia po o faamatalaga e ono manaomia e le Resitara.

173. Faamaoniga a tagata e umia sea – E le tatau i se kamupani ona talosaga ina ia aveesea mai le tusi resitala a Samoa i lalo o le fuaiupu 172 seia vagana ua faamaonia le faia o le talosaga e ala i se iugafono faapitoa.

174. Ia tuuina atu e kamupani faasilasilaga faalauaitele-

(1) E le tatau i se kamupani ona talosaga ina ia aveesea mai le tusi resitala a Samoa i lalo o le fuaiupu 172 seia vagana:

- (a) Ua tuuina atu e le kamupani se faasilasilaga faalauaitele -
 - (i) e taua ai e faapea ua faamoemoe, pe a tuanai le aso ua faamaoti mai i totonu o le faasilasilaga faalauaitele, e le tatau ona itiiti ifo

na i le 20 aso faigaluega pe a tuanai le aso o le faasilasilaga e talosaga ai i lalo o le fuaiupu 172 mo le kamupani ina ia aveesea mai le tusi resitala a Samoa e fesootai i le kamupani ua faamauina faaletulafono i lalo ole tulafono o lo o faamalasia i, po o i totonu o so o se vaega o, se isi atunuu; ma

(ii) faamaoti mai le atunuu po o vaega o le atunuu i lalo o le tulafono e faapea ua fuafuaina e le kamupani o le a faamauina faaletulafono; ma

(b) O le talosaga e faia ina ua tuanai lena aso.

(2) Afai ua faamalieina le Faamasinoga e faapea o le faatuina mai o le aveesea o le kamupani mai le tusi resitala a Samoa i lalo o lenei Vaega o le a le tatau ai ona faaituau ai se tagata e umia sea po o se tagata o lo o nofo aitalafu ai le kamupani po o se tagata o ia lea o lo o i ai se noatiaga o le kamupani, e mafai e ia i luga o le talosaga a lena tagata, ona faia i so o se taimi ao lumanai le aso e faataunuu ai le aveesea, ona faia so o se poloaiga ua taua i lalo:

(a) Se poloaiga e taofia ai mo se vaitaimi le aveesea o le kamupani mai le tusi resitala a Samoa i lalo o lenei Vaega;

(b) Se poloaiga e faamaoti mai ai tuutuuga e faapea e tatau ona faafetaiaia e le kamupani ao lumanai le aveesea mai le tusi resitala a Samoa i lalo o lenei Vaega;

(c) Afai o se poloaiga e faia i lalo o le parakalafa (a) po o le parakalafa (b), o poloaiga ua tuuina atu ai ni faamama avega faatupulaia po o ni fesoasoani e manatu le faamasinoga ua talafeagai ai.

175. Kamupani e faapea e le mafai ona faaliliu atu le tuufaatasia faaletulafono - E le tatau ona aveesea se kamupani mai le tusi resitala Samoa i lalo o le fuaiupu 176 pe afai:

(a) O le kamupani o lo o i le tulaga faafoe po o ua faamaape, po o se talosaga ua faia i le Faamasinoga e faamaape ai le kamupani; po o

- (b) Se tagata e mauaina po o se pule ua tofia, pe tofia e le faamasinoga pe leai foi, e faasino i so o se meatotino a le kamupani; po o
- (c) Ua ulufale atu le kamupani i se fetuunaiga ma tagata o lo o nofo aitalafu ai le kamupani po o se vasega o tagata o lo o nofo aitalafu ai le kamupani i lalo o le Vaega XV po o se fetuunaiga ua faatuina mai i lalo o lena Vaega e faasino i le kamupani; po o
- (d) Ua faamaonia e le Faamasinoga se maliega fetuunai i lalo o le Vaega XVI e faasino i le kamupani po o se talosaga ua faia i le Faamasinoga e faamaonia ai se maliega fetuutuunai i lalo o lena Vaega; po o
- (e) O se poloaiga e taofia ai mo se vaitaimi le aveesea mai le tusi resitala ua faia i lalo o le fuaiupu 174, po o so o se tuutuuga ua faamaoti mai i totonu o se poloaiga ua faia i lalo o le fuaiupu 174 e faapea e le o mafai ona faamalieina e le kamupani.

176. Aveesea mai le tusi resitala-(1) O le taimi lava e maua ai e le Resitara se talosaga ua maea ona saunia lelei i lalo o le fuaiupu 172 e aveese ai se kamupani mai le tusi resitala a Samoa, e tataui le Resitara ona tuuina i totonu o le tusi resitala se faasilasilaga e sainia e le Resitara e faapea o le kamupani ua uma ona aveesea mai le tusi resitala e tusa ai ma lena Vaega.

(2) Afai o se talosaga mo le aveesea o se kamupani mai le tusi resitala a Samoa i lalo o lena Vaega ua faamaoti mai ai se aso ua faamoemoe e aloaia ai le aveeseina, ma o lena aso e tutusa ma, po o e mulimuli ane ai, o le aso e faapea ua mauaina ai e le Resitara le talosaga, o le faasilasilaga o le aveeseina e tataui ona faamatala ai le faamamaluina i le aso ua faamaoti mai i totonu o le talosaga.

177. Taunuuga o le aveesea mai le tusi resitala-(1) O le aveesea o se kamupani mai le tusi resitala Samoa i lalo o le fuaiupu 176 e le:

- (a) Faaituau po o e aafia ai le tulaga iloagofie o le faalapotopotoga sa faamauina faaletulafono faapea sa faavaeina i lalo o lenei Tulafono po o lona faaauauina e aveia ai ose tagata ua aloaia faaletulafono;
 - (b) Aafia ai meatotino, aia tatau, po o noatiaga o lona faalapotopotoga; po o
 - (c) Aafia ai taualumaga ua faia e po o e faasaga i lona faalapotopotoga.
- (2) O taualumaga e faapea sa tatau ona amataina po o le faaauauina e po o e faasaga i se kamupani ao lumanai le aveesea o le kamupani mai le tusi resitala Samoa i lalo o le fuaiupu 176 e mafai ona amataina po o e faaauauina e po o e faasaga i le faalapotopotoga ua faaauauina le i ai pea ina ua tuanai le aveesea o le kamupani mai le tusi resitala.

VAEGA XX
TOE FAAMAUINA O KAMUPANI SA I LALO
O LE TULAFONO O KAMUPANI 1955

178. Vaitaimi mo le toe faamauina-(1) E mafai e le Resitara ona tuuina atu se faasilasilaga i se kamupani o lo o i ai aloaia pea i totonu o se pepa faatonuina e manaomia ai lona kamupani o lo o i ai pea e toe faamauina i lalo o lenei Tulafono ia le silia le aso o lo o faamaoti mai i totonu o le faasilasilaga, lea e tatau ona le itiiti ifo i le 60 aso faigaluega pe a tuanai le aso ua auina atu ai le faasilasilaga i le kamupani. E tatau foi i le Resitara ona tuuina atu se faasilasilaga faalauaitele o so o se faasilasilaga faapea.

(2) O se kamupani o lo o i ai pea:

- (a) E tatau ona toe faamauina i lalo o lenei Tulafono e tusa ai ma le fuaiupu 180 e le silia le aso ua faamaoti mai i totonu o le faasilasilaga ua tuuina atu i lalo o le faafuiauupu (1), po o so o se aso e mulimuli ane ai ua faataoto mai e le Resitara i lalo o le faafuiauupu (3);
- (b) E mafai, i le maliega a le Resitara, ona toe faamauina i lalo o lenei Tulafono ao le i auina atu i ai se faasilasilaga i lalo o le faafuiauupu (1).

(3) I le noatia ma le fai fuafua i le faafuaiupu (4), e mafai e le Resitara, i luga o se talosaga a se kamupani ua tuuina atu i ai se faasilasilaga i lalo o le faafuaiupu (1), po o so o se faatonu po o se tagata umia sea o lena kamupani, ona faaumiumi le aso ua faamaoti mai i totonu o le faasilasilaga pe afai ua manatu le Resitara e faapea ua talafeagai le talosaga i tulaga ua tulai mai. O se talosaga i lalo o lenei faafuaiupu e mafai ona faia ao lumanai po o ina ua tuanai le aso ua faamaoti mai i totonu o le faasilasilaga.

(4) E tatau i le Resitara ona manaomia kamupani uma o lo o i ai pea ina ia toe faamauina i lalo o lenei Tulafono ia le silia le aso faaii o le vaitaimi o fesuiaiga.

(5) O se kamupani o lo o i ai pea e le usitaia le toe faamauina i totonu o le taimi ua faamaoti mai i le faafuaiupu (2) e mafai ona toe faamauina i so o se taimi mulimuli ane po o ao lumanai le aso faaii o le vaitaimi o fesuiaiga, peitai:

(a) O le fuaiupu 182(1) o le a le faaogaina i lena kamupani; ma

(b) O le aofaiga o le tupe e totogiina atu e lea kamupani ile taimi o le toe faamauina i lalo o le fuaiupu 180(3)(b) e aofia ai faasalaga uma o lo o nofo aitalafu ai lena kamupani i lalo o le Tulafono 1955.

(6) I totonu o lenei Vaega, “vaitaimi o fesuiaiga” o lona uiga o le vaitaimi mai le aso e faapea ua faamamaluina ai lenei Tulafono e oo i le aso e lua i ai tausaga ina ua tuanai le faamamaluina o lenei Tulafono, po o se aso mulimuli ane e ono faatonuina e tulafono faatonutonu ua faia i lalo o lenei Tulafono.

179. Mataupu o Faavae a kamupani ua toe faamauina-

(1) I le noatia ma le fai fuafua i faafuaiupu (2) ma le (3), i luga o le toe faamauina:

(a) O faamatalaga faatulafonoina o se kamupani o lo o i ai pea ua ave a se vaega o mataupu o faavae a le kamupani. I le tulaga o so o se feeseeseaiga i le va o faamatalaga faatulafonoina ma mataupu o faavae a se kamupani o lo o i ai pea, o le a tumau pea le aloaia o faamatalaga faatulafonoina;

- (b) O mataupu o faavae a se kamupani o lo o i ai pea (tuufaatasia faaletulafono o ana faamatalaga faatulafonoina, e tusa ai ma le parakalafa (a) ua faaaauau pea e avea o Mataupu o Faavae a le kamupani mo faamoemoega o lenei Tulafono. I le tulaga e faapea o mataupu o faavae a lea kamupani o lo o i ai pea ua faaaogaina uma po o so o se tulafono ua faatulaga mai i totonu o le Faasologa A o le Faamatalaga Muamua i le Tulafono o Kamupani 1955, o na tulafono ua avea e faapea ua tuufaatasia faaletulafono i totonu o Mataupu o Faavae a le kamupani e faapei ua faatulaga atoa mai i totonu o na Mataupu o Faavae;
- (c) O sea uma ua tuuina atu e le kamupani o lo o i ai nei ao lumanai le toe faamauina ua avea e faapea ua faaliliuina i sea e leai se tau tutusa. O lenei faaliliuga e le aafia ai aia tatau ma noatiaga o lo o faapipii i sea, ma aemaise e le aafia ai -
- (i) ni agavaa o le o lo o umia sea e tusa ai ma le tufatufaga, palotaina, le toe faaola o so o se sea e ono mafai ona toe faaola mai, po o le tufatufaina o meatotino faasili a le kamupani i le taimi e faamaape ai faaletulafono;
- (ii) so o se noataga e le i totogiina a se o lo o umia sea e faasino i sea. E ese mai ai so o se mea i totonu o Mataupu o Faavae a le kamupani o lo o i ai, o le o lo o umia se sea i le taimi o le toe faamauina ua noatia o ia lava i so o se noataga (e aafia ai valaau mo noataga) o lo o faapipii atu i sea. I se tulaga o le a faaliliu se sea ina ua tuanai le toe faamauina, o lenei noataga e tumau pea i le o lo o faamauina, ma e le pasia i le ua faaliliu i ai sea.
- (2) So o se kamupani o lo o i ai pea e mafai ona faia se faaiuga e faaoga ai Mataupu o Faavae i totonu o le Faamatalaga Muamua po o le Faamatalaga Lona Lua po o le Faamatalaga Lona Tolu e pei ona i ai i Mataupu o Faavae i luga o le toe faamauina i lalo o lenei Tulafono.

(3) O se kamupani o lo o i ai pea e mafai ona faia se faaiuga e faaoga ai Mataupu fou o Faavae e ese mai Mataupu faamauina faaletulafono faataitai i luga o le toe faamauina i lalo o lenei Tulafono.

(4) O se faaiuga i lalo o le faafuaiupu (2) po o le faafuaiupu (3) e tatau ona faamaonia ao lumanai le toe faamauina i le auala lava e tasi e pei ona o le a manaomia i lalo o le Tulafono o Kamupani 1955 ma faamatalaga faaletulafono a le kamupani ma mataupu faamauina faaletulafono a le kamupani mo le faamaonia o se iugafono e suia ai mataupu faamauina faaletulafono a le kamupani.

180. Pepa aloaia e ao ona failaina-(1) O se tusi talosaga mo le toe faamauina o se kamupani o lo o i ai nei i lalo o lenei Tulafono e tatau ona faia i le Resitara i totonu o le pepa faatonuina.

(2) O se tusi talosaga mo le toe faamauina o se kamupani e tatau ona faamaoti mai ai:

- (a) Le igoa o le kamupani;
- (b) Po o le kamupani o le a faamauina i lalo o lenei Tulafono e avea o se kamupani tumaoti po o se kamupani a le Malo;
- (c) Le igoa atoa ma le tuatusi nofomau o faatonu uma o le kamupani;
- (d) I le tulaga o se kamupani tumaoti, le igoa atoa ma le tuatusi nofomau o tagata uma e umia sea a le kamupani, ma le aofaiga ma le vasega o sea o lo o umia e tagata taitoatasi e umia sea;
- (e) Le ofisa faamauina o le kamupani;
- (f) Le tuatusi e lafo ai meli a le kamupani, e ono avea ma tuatusi e lafo i ai meli a le ofisa faamauina po o so o se isi tuatusi e lafo i ai meli; ma
- (g) Auiliiliga o le nofoaga o so o se faamaumauga a le kamupani o lo o faasinomia i totonu o le fuaiupu 11 e faapea e le o teuina i le ofisa faamauina o le kamupani.

(3) O se talosaga mo le toe faamauina e tatau ona aumai faatasi ma:

- (a) Se ata o -

- (i) so o se iugafono a le kamupani i lalo o le fuaiupu 179(2) po o (3); po o
 - (ii) so o se Mataupu o Faavae ua faaaogaina e le kamupani i lalo o le fuaiupu 179(3); po o
 - (iii) ata faamaonia o faamatalaga faaletulafono o lo o i ai nei ma mataupu faamauina faaletulafono a le kamupani, pe afai ua toe faamauina faatasi ma ana pepa aloaia tau le faavae i lalo o le fuaiupu 179(1).
- (b) O tupe uma e tatau ona totoi i le Resitara ae lei totogiina e lenei kamupani i lalo o le Tulafono o Kamupani 1955, e le aofia ai so o se faasalaga e tusa ai o le soloia o noataga i lalo o le fuaiupu 182;
 - (c) Le totogifuapauina mo le toe faamauina.

181. Taunuuga o le toe faamauina-(1) O le taimi lava e maua ai e le Resitara se talosaga mo le toe faamauina o lo o tausisia ai le fuaiupu 180, e tatau i le Resitara ona:

- (a) Faaulufale le kamupani i le tusi resitala a Samoa; ma
 - (b) Tuuina atu se tusi faamaonia o le toe faamauina o le kamupani i le pepa faatonuina.
- (2) O se tusi faamaonia o le toe faamauina o se kamupani ua tuuina atu i lalo o le faafuaiupu (1) o se molimau maumaututu lea e faapea:
- (a) O manaoga uma e manaomia mo le toe faamauina, ua faapea ona tausisia; ma
 - (b) I le ma mai le aso o le toe faamauina ua taua i le tusi faamaonia, ua faamauina le kamupani i lalo o lenei Tulafono.
- (3) O le toe faamauina o se kamupani o lo o i ai i le taimi nei i lalo o lenei Tulafono e le:
- (a) Faaituau po o e aafia ai le tulaga e iloagofie ai itutino faaletulafono sa faavaeina i lalo o le Tulafono o Kamupani 1955 po o lona faaauauina e ave a se tagata faaletulafono; po o
 - (b) Aafia ai meatotino, aia tatau, po o noatiaga o lenei itutino ua faamauina faaletulafono; po o

- (c) Aafia ai taualumaga e, po o e faasaga i lena itutino ua faamauina faaletulafono.

182. Noataga o kamupani ua toe faamauina mo aitalafu i lalo o le Tulafono 1955-(1) O se kamupani ua toe faamauina e tusa ai ma le fuaiupu 180 i totonu o le taimi ua faamaoti mai i le fuaiupu 178(2), faatasi ma faatonu uma sa i ai ma faatonu o lo o i ai i le taimi nei o lena kamupani, ua tuusaoloto mai noataga mo so o se aofaiga o tupe totogi atu e ala i faasalaga po o faasalaga tuai ona totogi e faasino i mataupu sa manaomia e faia e lena kamupani ao lumanai le aso e faamamaluina ai lenei Tulafono i lalo o so o se aiaiga ua taua i lalo o le Tulafono o Kamupani 1955:

- (a) Fuaiupu 450, e faasino i le tauaveina o se pisinisi e aunoa ma se laisene faaletausaga;
- (b) Fuaiupu 463, e faasino i sala tupe ua le totogiina.

(2) E tatau i le Resitara, pe afai e talosagina le faia e se kamupani o lo o i ai nei, ona fautuaina lena kamupani e ala i se tusi, i le aofaiga o tupe e tatau ona totogi e ia i le toe faamauina i lalo o le fuaiupu 180(3)(b). Afai e manatu le kamupani e faapea o le aofaiga ua fautuaina e le Resitara ua sese:

- (a) E mafai ona toe talosaga le kamupani i le Faamasinoga i lalo o le fuaiupu 192, ma o le Faamasinoga o le a fuafuaina se aofaiga o tupe e tatau ona totogi;
- (b) Ao talia le suesuega o lea talosaga, e tatau i le kamupani ona totogi le aofaiga ua faamaoti mai e le Resitara i le taimi na toe faamauina ai. O le noatiaga o le kamupani ina ia toe faamauina i totonu o le taimi ua faamaoti mai i le fuaiupu 178 e le aafia i so o se talosaga toe iloilo i lalo o lenei fuaiupu;
- (c) Afai ua manuia le talosaga, e tatau i le Resitara ona toe faafoi i le kamupani so o se aofaiga o tupe ua ova le totogiina, faatasi ma se tupe tului i se fua faatatau e faia e le Faamasinoga.

183. Le usitaia o le toe faamauina-(1) O se kamupani o lo o i ai nei ua le usitaia le toe faamauina i le po o ao lumanai le aso mulimuli o le vaitaimi o fesuiaiga o le a avea o se kamupani ua faataapeina i lena lava aso.

(2) O fuaiupu 145 i le 148 ma le 150 i le 152 e faaaoaga i se kamupani e faapea ua faataapeina e faapei ua aveeseina mai le tusi resitala i lalo o le fuaiupu 138, faatasi ma suiga uma talafeagai.

VAEGA XXI RESITARA

184. Resitara ma Sui Resitara o Kamupani-(1) E tataui i le Minisita ona tofia se tagata e umia le tofiga e avea o se Resitara o Kamupani.

(2) E mafai e le Resitara ona ia tofia ni Sui Resitara se toatele o Kamupani e ono manaomia mo le faamoemoe o lenei Tulafono.

(3) I le noatia ma le fai fuafua i le faafoega a le Resitara, e i le Sui Resitara ma e mafai e se Sui Resitara ona faatino pule, tiute ma matafaioi a le Resitara i lalo o lenei Tulafono.

(4) O le mea moni o le faatinoina e se Sui Resitara o ia pule, tiute, po o matafaioi o se molimau maumaututu lena o lana (alii po o tamaitai) pule e faatino ai.

(5) O le tagata o lo o umia le tofi o le Resitara o Kamupani i lalo o le Tulafono o Kamupani 1955, ma tagata uma o lo o umia tofi o le Sui Resitara o Kamupani i lalo o lena Tulafono, i le taimi lava ao le i amata faamamaluina lenei Tulafono, ua avea e faapea ua tofia e avea ma Resitara o Kamupani po o Sui Resitara o Kamupani, po o le a lava le tulaga e i ai, e tusa ai ma lenei fuaiupu.

185. Tusi resitala-(1) E tataui i le Resitara ona mautinoa e faapea:

- (a) O le tusi resitala o kamupani ua faamauina i lalo o le Vaega II po o le toe faamauina i lalo o lenei Tulafono e tusa ai ma le Vaega XX, po o le a lava le tulaga e i ai; ma

(b) Se tusi resitala o kamupani i atunuu i fafo ua faamauina po o e faapea o le a faamauina i lalo o le Vaega XVIII -
ua teuina i totonu o Samoa.

(2) O le tusi resitala a Samoa e tataua ona teuina i se nofoaga i totonu o Samoa ua fuafuaina e le Resitara mai lea taimi i lea taimi.

(3) O le tusi resitala o kamupani mai atunuu i fafo e tataua ona teuina i se nofoaga i totonu o Samoa e pei ona fuafuaina e le Resitara mai lea taimi i lea taimi.

(4) O le tusi resitala a Samoa ma le tusi resitala o atunuu i fafo e mafai ona teu i se auala e manatu le Resitara ua talafeagai ai e aofia ai, po o atoa pe na o se vaega e ala i le faaaogaina o se masini po o se meafaigaluega:

(a) E faamauina pe teuina faamatalaga i se faiga faaeletoni po o i isi auala; ma

(b) E avanoa ai faamatalaga ua faamaumauina po o ua teuina ina ia asiasia po o le toe lomina i se tulaga e mafai ai ona faaaogaina.

186. Faamauina o pepa aloaia-(1) O le taimi lava e maua ai se pepa aloaia mo le faamauina i lalo o lenei Tulafono, e tataua i le Resitara:

(a) I le noatia ma le fai fuafua i le faafuuiupu (2), ona faamauina le pepa aloaia i le tusi resitala a Samoa po o le tusi resitala o atunuu i fafo, po o le a lava le tulaga e i ai; ma

(b) I le tulaga o se pepa aloaia e faapea e le o se tala o tupe maua faaletausaga, ia tuuina atu se fautuaga tusia o le faamauina i le tagata na maua ai le pepa aloaia.

(2) Afai o se pepa aloaia ua talia e le Resitara mo le faamauina i lalo o lenei Tulafono:

(a) E le o faia i le pepa faatonuina, pe afai e i ai; po o

(b) E le o taasisia ai lenei Tulafono po o tulafono faatonutonu ua faia i lalo o lenei Tulafono; po o

(c) E le o lomina po o taina i se laau lomitusi; po o

- (d) Afai o le tusi resitala a Samoa po o le tusi resitala o atunuu mai fafo ua teuina atoa pe na o se vaega e ala i se masini po o se meafaigaluega e pei ona taua i le fuaiupu 185(4), e le o i se faiga e mafai ai ona tuuina sao auiliiliga i totonu i se auala faaeletoni po o se isi meafaigaluega; po o
 - (e) E lei maea lelei ona faatumuina; po o
 - (f) Ua i ai ni mea e leo manino lelei i le faitau; po o
 - (g) E le o aumai ai le totogifuapauina faatonuina - e mafai e le Resitara ona le taliaina le faamauina o le pepa aloaia. E ono manaomia e le Resitara -
 - (h) E faapea o le pepa aloaia e toe tuuina mai mo le toe faamauina foi, teuteuina po o maea lelei ona faatumuina e pei ona talafeagai ai, po o le tuuina mai ai faatasi ma le totogifuapauina faatonuina; po o
 - (i) E faapea o se pepa aloaia fou e tuuina mai e sui ai le pepa muamua.
- (3) Mo le faamoemoe o lenei Tulafono, ua faamauina se pepa aloaia pe a fai:
- (a) O le pepa aloaia lava ia ua avea ma se vaega o le tusi resitala Samoa po o le tusi resitala o atunuu i fafo; po o
 - (b) O auiliiliga o le pepa aloaia ua tuuina i totonu o so o se masini po o se mea faapena ua taua i le fuaiupu 185(4).
- (4) E le o le faamauina, po o le teena o le faamauina, o se pepa aloaia e le Resitara e aafia ai, po o le faatupuina ai o se faaiuga i le aoga po o le le aoga po o le sao pe ese mai ai i faamatalaga o lo o i totonu.

187. Pule a le Resitara e manaomia ai faamatalaga mata o pepa aloaia-(1) E mafai e le Resitara ona tuuina atu se faasilasilaga i se kamupani e manaomia ai lena kamupani e tuuina mai:

- (a) Faamatalaga faasaoina po o le tuu i se aso lata mai o so o se mataupu ua faaofi i totonu o le tusi resitala a Samoa po o le tusi resitala a atunuu i

fafo, po o le a lava le tulaga e i ai, e uiga i lena kamupani; po o

- (b) O se ata faamaonia o so o se pepa aloaia ua uma ona tuuina atu, po o sa tatau ona auina atu i le Resitara mo le faamauina i lalo o lenei Tulafono po o i lalo o so o se isi Tulafono e tusa ai i lena kamupani,

i le aso ua faamaoti mai i le faasilasilaga, ma e tatau ona le i lalo ifo o le 10 aso faigaluega mai le aso na auina atu ai le faasilasilaga i le kamupani.

(2) I lenei fuaiupu, “kamupani” e aofia ai se kamupani mai atunuu i fafo.

(3) Afai o faamatalaga ua tuuina atu i le Resitara e se kamupani e tusa ai ma lenei fuaiupu e eseese mai faamatalaga o lo o faaalua i le tusi resitala a Samoa po o le tusi resitala a atunuu i fafo e faasino i lena kamupani, e mafai e le Resitara ona suia le tusi resitala ina ia talafeagai ai.

(4) Afai e le tausisia e se kamupani se faasilasilaga e tuuina atu i lalo o le faafuuiupu (1):

- (a) Ua faia e le kamupani se solitulafono ma ua noatia i se moliaga ua faamaonia faaletulafono i le faasalaga o lo o faatulaga ma i le fuaiupu 194(2); ma
- (b) O faatonu uma o le kamupani ua faia se solitulafono ma ua noatia i se moliaga ua faamaonia faaletulafono i le faasalaga ua faatulagaina mai i le fuaiupu 195(2).

188. Asiasiga ma molimau a le tusi resitala-(1) E mafai e se tagata, i luga o le totoigiina o so o se totogifuapauina ua faatonuina ona asiasia:

- (a) So o se pepa aloaia ua avea ma se vaega o le tusi resitala a Samoa po o le tusi resitala a atunuu i fafo;
- (b) Auiliiliga o so o se pepa aloaia ua faamauina sa tuuina i totonu o so o se masini po o se mea faigaluega e pei ona faasinomia i le fuaiupu 185(4);

(c) Auiliiliga o so o se pepa aloaia faamauina ua tuuina i totonu o se masini po o se meafaigaluega - i itula o lo o tatala ai le ofisa o le Resitara mo tagata lautele mo galuega faapisinisi i se aso faigaluega.

(2) E mafai e se tagata, i luga o le totogiina o so o se totogifuapauina ua faatonuina, ona manaomia le Resitara ia tuuina mai po o le faamaonia:

- (a) Se tusi faamaonia o le tuufaatasia faaletulafono o se kamupani; po o
- (b) Se tusi faamaonia o le toe faamauina o se kamupani i lalo o lenei Tulafono e tusa ai ma le Vaega XX; po o
- (c) Se ata o, po o se vaega sii mai se pepa aloaia o lo o avea ma se vaega o le tusi resitala Samoa po o le tusi resitala o atunuu i fafo; po o
- (d) Auiliiliga o so o se pepa aloaia ua faamauina, ua tuuina i totonu i so o se masini po o se mea faigaluega e pei ona faasinomia i ai le fuaiupu 185(4); po o
- (e) Se ata o, po o se vaega sii mai i auiliiliga o se pepa aloaia ua faamauina i totonu o so o se masini po o meafaigaluega.

(3) O se faiga ina ia faamalosia ai le faiga o:

- (a) Se pepa aloaia ua faamauina o lo o teuina e le Resitara; po o
- (b) Faamaoniga o le tuuina i totonu o auiliiliga o se pepa aloaia ua faamauina i totonu o so o se masini po o se mea faigaluega e pei ona faasinomia i ai i le fuaiupu 185(4) -

e le tatau ona tuuina mai e aunoa ma le faatagaga a le Faamasinoga ma afai e faia e le Faamasinoga, e tatau ona i ai se faamatalaga e faapipii mai ai e faapea sa tuuina atu i luga o le faatagaga a le Faamasinoga.

(4) Se ata o, po o vaega sii mai, se pepa aloaia ua faamauina:

- (a) E faapea o lo o fai ma vaega o le tusi resitala a Samoa po o le tusi resitala a atunuu i fafo; po o

- (b) O auiliiliga ua tuuina i totonu o so o se masini po o se meafaigaluega e pei oan faasinomia i le fuaiupu 185(4) -

ua faamaonia o se ata moni po o se vaega sii mai e le Resitara ua taliaina e fai ma molimau i tualumaga faaletulafono i le tulaga lava e tasi e pei ole uluai pepa aloaia.

(5) O se vaega sii mai ua faamaonia e le Resitara e avea o auiliiliga o lo o i ai i totonu o se pepa aloaia ua faamauina ua tuuina i totonu o so o se masini po o se meafaigaluega ua faasinomia i le fuaiupu 185(4) ua, pe afai ua leai se faamaoniga e ese mai ai, e avea ma molimau faaiu o le tuuina i totonu o na auiliiliga.

189. Faasilasilaga e faia e le Resitara-(1) O se faasilasilaga e faapea o le Resitara e manaomia e lenei Tulafono ina ia tuuina atu i se tagata moni, e tataua ona tuuina atu e ala i se tusitusiga ma i se auala talafeagai lelei ua manatu le Resitara e talafeagai ma ia tulaga.

(2) E aunoa ma le faatapulaaina o le faafuuiupu (1), e mafai e le Resitara ona tuuina le faasilasilaga tusitusia i se tagata moni e ala i le :

- (a) Auina atu i lenei tagata; po o
- (b) Lafo i le meli e lenei tagata i lona (alii po o tamaitai) tuatusi mulimuli sa iloa ai; po o
- (c) Auina atu i se masini fesi i se numera o se telefoni o lo o faaogaina e lenei tagata mo le auina atu o pepa aloaia i le fesi; po o
- (d) Faasalalauina i se nusipepa po o se isi ituaiga o lomiga o lo o faasalalauina i le vaega o lo o nofo ai lea tagata po o ua i ai le talitonuga o lo o nofo ai.

(3) O le fuaiupu 212 ua faaogaina, faatasi ma ni teuteuga e ono talafeagai ai, e tusa ai ma le tuuina atu o faasilasilaga e le Resitara.

(4) O se pepa aloaia e faapea:

- (a) Ua foliga mai o se ata o se faasilasilaga na tuuina atu e le Resitara; ma

(b) Ua faamaonia e le Resitara, po o se tagata ua faatagaina e le Resitara, e faapea na maua mai i se masini po o se meafaigaluega o lo o faamaumuina po o teuina ai faamatalaga i faiga faaeletoroni po o isi auala -
ua mafai ona taliaina i tualumaga faaletulafono e avea o se ata o le faasilasilaga.

190. Pule a le Resitara i asiasiga-(1) E mafai e le Resitara po o se tagata ua faatagaina e le Resitara ona:

- (a) Mo le faamoemoe o -
 - (i) le faamautinoaina o se kamupani po o se faatonu o se kamupani o lo o tausisia, pe sa tausisia, lenei Tulafono; po o
 - (ii) le faamautinoaina pe tatau i le Resitara ona faatinoaina nisi o ana (alii po o tamaitai) aia tatau po o pule i lalo o lenei Tulafono; po o
 - (iii) ia mafai ona iloa ai solitulafono e faasaga i lenei Tulafono; ma
 - (b) Afai, i le manatu o le Resitara, o se mea e manuia ai tagata lautele pe afai e fai -
ia faia so o se mea ua taua i lalo:
 - (c) Manaomia se tagata, e aofia ai se tagata o lo o faia le pisinisi o teugatupe, e tuuina mai mo le asiasiga pepa aloaia talafeagai o lo o umia e lea tagata po o lo o lana vaavaaiga; po o
 - (d) Asiasia ma ave ata o pepa aloaia talafeagai; po o
 - (e) Le umia o pepa aloaia talafeagai, ma aveesea mai i latou mai le nofoaga o lo o teuina ai, ma taofia mo se taimi talafeagai, mo le faamoemoe o le faia o ni ata;
 - (f) Taofia o pepa aloaia talafeagai mo se vaitaimi e matua talafeagai e tusa ai ma mea o lo o tutupu, pe afai ua i ai mafuaaga tatau e talitonu ai o molimau ia o se solitulafono sa faia.
- (2) E leai se mea i totonu o lenei faafuaiupu e faatapulaa ai pe aafia ai le Tulafono Tau le Pulea o Lafoga o Tupe Maua 1974, po o Tulafono o Fuainumera Faamauina 1971.

(3) O le Resitara po o se tagata ua faatagaina e le Resitara e tatau ona feutagai ma le Faletupe Tutotonu o Samoa a o lei faatinoina so o se pule ua faaee atu e le faafuaiupu (1) pe afai o le faamoemoe o le faatinoina o le pule e faasino i se kamupani e faapea o se faalapotopotoga tau tupe (e tusa ai ma le uiga o le fuaiupu 2 o le Tulafono o le Faletupe Tutotonu o Samoa 1984).

(4) E le tatau i se tagata ona faalavelave pe taofia le Resitara po o se tagata ua faatagaina e le Resitara ao faatinoina se pule ua faaeeina i ai e le faafuaiupu (1).

(5) So o se tagata o ia lea:

(a) Ua le usitaia le tausisia o se manaoga i lalo o le faafuaiupu (1)(c); po o

(b) Ua faia se gaioiga e faalavelaveina ai le faafuaiupu (4) ua faia se solitulafono ma ua noatia i se moliaga ua faamaonia faaetulafono i le faasalaga ua faatulaga mai i le fuaiupu 194(2).

(6) I totonu o lenei fuaiupu:

“Kamupani” e aofia ai se kamupani mai fafo:

“Pepa aloaia talafeagai”, e faasino i se kamupani, o lona uiga o se pepa aloaia ua i ai faamatalaga e faasino i -

(a) Le kamupani; po o

(b) Tupe po o isi meatotino e faapea, pe sa avea, pulea, vaavaaia, faafoe po o le umia faa tausii mavaega e po o mo le kamupani.

191. Faalauiloaina atu o faamatalaga ma lipoti-(1) O se tagata ua faatagaina e le Resitara mo le faamoemoe o le fuaiupu 190 o ia lea ua:

(a) Mauaina se pepa aloaia po o se faamatalaga i le taimi a o faagasolo le asiasiga i lalo o lena fuaiupu; po o

(b) Saunia se lipoti e faasino i se asiasiga i lalo o lena faafuaiupu -

e tatau, pe a faatonuina le faatinoina e le Resitara, ona tuuina atu le pepa aloaia, faamatalaga, po o lipoti i -

(c) Le Minisita; po o

(d) Le Failautusi; po o

- (e) So o se tagata ua faatagaina e le Resitara e taliaina le pepa aloaia, faamatalaga, po o lipoti mo faamoemoega po o ua i ai se sootaga ma le faatinoina o pule ua faaeeina i ai e lenei Tulafono; po o
 - (f) Se tagata e faamaapeina faaletulafono mo le faamoemoe o le faamaapeina faaletulafono o se kamupani; po o
 - (g) So o se tagata e faatagaina e le Resitara e taliaina pepa aloaia, faamatalaga, po o lipoti mo le faamoemoe o le mataupu o solitulafono e faasaga i so o se Tulafono.
- (2) Se tagata ua faatagaina e le Resitara mo le faamoemoe o le fuaiupu 190 o ia lea ua:
- (a) Mauaina se pepa aloaia po o faamatalaga i le taimi o faagasolo se asiasiga i lalo o lena fuaiupu; po o
 - (b) Saunia se lipoti e faasino i se asiasiga i lalo o lena fuaiupu -
- e tatau ona tuuina atu le pepa aloaia, faamatalaga po o lipoti i le Resitara po o le Sui Resitara pe afai ua faatonuina le faia e so o se tagata o lo o umia so o se tasi o ia tofiga.
- (3) Se tagata faatagaina e le Resitara mo le faamoemoe o le fuaiupu 190 o ia lea ua:
- (a) Mauaina se pepa aloaia po o faamatalaga i le taimi a o faagasolo se asiasiga i lalo o lena fuaiupu; po o
 - (b) Saunia se lipoti e faasino i se asiasiga i lalo o lena fuaiupu -
- e le tatau ona tatalaina atu lena pepa aloaia, faamatalaga, po o lipoti vagana -
- (c) E tusa ai ma le faafuaiupu (1) po o le faafuaiupu (2); po o
 - (d) I le noatia ma le fai fuafua i le faamaoniga a le Resitara, faatasi ma le maliega a le tagata o lo o faasino i ai; po o
 - (e) I le noatia ma le fai fuafua i le faamaoniga a le Resitara, mo le faamoemoe po o i sootaga ma le faatinoina o pule faaee atu e lenei Tulafono; po o

- (f) I le tulaga faapea o le faamatalaga, po o faamatalaga o lo o i totonu o le pepa aloaia po o lipoti, ua avanoa i lalo o so o se Tulafono po o i se pepa aloaia mo tagata lautele; po o
- (g) I le noatia ma le fai fuafua i le faamaoniga a le Resitara, i se tagata e faamaapeina faaletulafono mo le faamoemoe o le faamaapeina faaletulafono o se kamupani po o meatotino a se kamupani mai fafo; po o
- (h) A o faagasolo taualumaga mo soligatulafono; po o
- (i) I le noatia ma le fai fuafua i le faamaoniga a le Resitara, mo le faamoemoe o le mataitu o ni solitulafono faasaga i so o se Tulafono.

(4) E ese mai ai so o se isi Tulafono po o poloaiga faatulafono, o se lipoti na saunia e se tagata e faasino i se asiasiga sa ia (alii po o tamaitai) faia i lalo o le fuaiupu 190 e mafai ona talia e avea ma molimau i le fofogaina o se talosaga i le Faamasinoga mo le tofia o se tagata e faamaapeina faaletulafono le kamupani.

(5) O se tagata e le usitaia le le tausisia o lenei fuaiupu ua faia e ia se solitulafono ma ua noatia i se moliaga ua faamaonia faaletulafono i le faasalaga ua faatulaga mai i le fuaiupu 194(2).

192. Talosaga toe iloilo mai faaiuga a le Resitara-(1) O se tagata o lo o faamanualia i se gaoioiga po o se faaiuga a le Resitara i lalo o lenei Tulafono e mafai ona talosaga toe iloilo i le Faamasinoga i totonu o le 15 aso faigaluega ina ua tuanai le aso sa logoina ai le gaoioiga po o le faaiuga, po o i totonu o nisi vaitaimi e ono faatagaina e le Faamasinoga.

(2) I le fofogaina o le talosaga toe iloilo, e mafai e le Faamasinoga ona faamaonia le gaoioiga po o le faaiuga a le Resitara, po o mafai le tuuina atu o ia faatonuga po o le faia o sea fuafuaga i le mataupu ua manatu le Faamasinoga ua talafeagai.

(3) I le noatia ma le fai fuafua i le faafuaiupu (4), ae ese mai ai i so o se isi aiaiga o so o se Tulafono po o so o se poloaiga faatulafono, pe afai o se tagata ua talosaga toe iloilo po o ua talosaga i le Faamasinoga e faasino i se gaoioiga po o se faaiuga a le Resitara po o se tagata ua faatagaina e le Resitara i

lalo o le fuaiupu 190, vagana ua maua se faaiuga i le talosaga toe iloilo po o le tusi talosaga ua tuuina atu:

- (a) O le Resitara, po o lena tagata, e mafai ona faaauau le faatinoina o pule i lalo o lena fuaiupu e faapei e leai se talosaga toe iloilo po o se tusi talosaga sa faia; ma
 - (b) E leai se tagata e faasao mai le faatinoina o se noatiaga i lalo o lena fuaiupu i luga o se mafuaaga o lena talosaga toe iloilo po o tusi talosaga.
- (4) Afai o se talosaga toe iloilo po o se tusi talosaga o lo o faasino i ai le faafuaiupu (3) ua faatagaina po o ua tuuina atu, po o le a lava le tulaga e i ai:
- (a) E tatau i le Resitara ona faamautinoa e faapea i le taimi lava lea ina ua maea ona tuuina atu le faaiuga a le Faamasinoga, so o se ata o se pepa aloaia na aveina po o ua taofia e le Resitara, po o e se tagata ua faatagaina e le Resitara e faasino i ai lena gaoioiga po o le faaiuga, ua faatamaiaina; ma
 - (b) E leai ni faamatalaga e mauaina i lalo o lena fuaiupu e faasino i lena gaoioiga po o le faaiuga e mafai ona talia e avea ma molimau i so o se tualumaga seia vagana ua faamalieina le Faamasinoga o lo o fofogaina le tualumaga e faapea o nei molimau sa maua i se auala le sagatonu.

193. Totogifuapauina-(1) O Le Ao o le Malo, faia i luga o le fautuaga a le Kapeneta, e mafai ona faia ni tulafono faatonutonu e faatonuina ai:

- (a) Totogifuapauina po o isi aofaiga o tupe e tatua ona totogi i le Resitara e tusa o le faatinoga o matafaioi ma le faatinoga o pule i lalo o lenei Tulafono;
- (b) Aofaiga o tupe e tatau ona totogi i le Resitara e ala i faasalaga mo le le usitaia o le auina atu o se Resitara i totonu o le vaitaimi ua faatonuina e lenei Tulafono;

(c) Totogifuapauina po o isi aofaiga o tupe e tatau ona totogi i le Resitara e tusa ai o so o se isi mataupu i lalo o lenei Tulafono.

(2) E mafai e le Resitara ona teena le faatinoina o se matafaioi po o le faatinoga o se pule seia vagana ua totogi atu le totogifuapauina po o le aofaiga o tupe.

(3) So o se tulafono faatonutonu ua faia i lalo o le faafuaiupu (1) e mafai ona faataga ai le Resitara e soloia, atoa po o se vaega ma i luga o ia tuutuuga e pei ona mafai ona faatonuina, e le tupe totogi o so o se aofaiga o tupe o lo o faasinomia i le parakalafa (b) o lenei faafuaiupu.

(4) Afai o le Resitara, i lalo o le fuaiupu 12(1), e manaomia se kamupani ina ia sui lona igoa, e leai se totogifuapauina e totogi atu e tusa ai o se tusi talosaga e suia ai le igoa o le kamupani.

(5) So o se totogifuapauina po o se aofaiga o tupe e tatau ona totogi atu i le Resitara e mafai ona toe maua mai e le Resitara i so o se Faamasinoga o pulega tau faamasinoga agavaa e avega o se aitalafu e tatau ona totogi i le Malo.

VAEGA XXII SOLITULAFONO MA FAASALAGA

194. Faasalaga mo le le usitaia o le Tulafono-(1) O se tagata ua faasalaina i se solitulafono ua faamaonia faaletulafono e faasaga i fuaiupu ua taua i lalo e noatia i se faasalaga tupe e le silia le \$1,000.00:

(i) fuaiupu 13(5)(a) (e faasino i le faaoga o le igoa o se kamupani);

(ii) fuaiupu 39(5)(a) (e faasino i tusi faamaonia o sea);

(iii) fuaiupu 48(6)(a) (e faasino i iugafono i mea ua faamauina faaletulafono i fonu);

(iv) fuaiupu 102(4)(a) (e faasino i noatiaga e tuuina atu ata o pepa aloaia);

(v) fuaiupu 109(6)(a) (e faasino i manaoga e suia ai le ofisa faamauina o se kamupani).

(2) O se tagata faasalaina i se solitulafono ua faamaonia faaletulafono e faasaga i so o se isi o fuaiupu ua taua i lalo ua noatia i se sala tupe e le sili atu i le \$5,000.00 -

(i) fuaiupu 34(4)(a) (e faasino i noatiaga i le tausia o se tusi resitala o sea);

(ii) fuaiupu 55(8) (e faasino i le suesuega o faamaumauga o kamupani i luga o se talosaga a se tagata umia sea);

(iii) fuaiupu 70(3)(a) (e faasino i le tiute e tuuina atu ai faasilasilaga i le suia o Faatonu);

(iv) fuaiupu 83(4)(a) (e faasino i le suia o mataupu faamauina faaletulafono o le Faamasinoga);

(v) fuaiupu 96(3)(a) (e faasino i faamaumauga a kamupani);

(vi) fuaiupu 98(8)(a) (e faasino i isi nofoaga faaopoopo o faamaumauga);

(vii) fuaiupu 100(2)(a) (e faasino i le asiasiga o faamaumauga a le kamupani e tagata o lo o umia sea);

(viii) fuaiupu 101(2)(a) (e faasino i le asiasia o faamaumauga a le kamupani e tagata lautele);

(ix) fuaiupu 154(3)(a) (e faasino i le faaaogaina o ni igoa o le kamupani mai fafo);

(x) fuaiupu 155(6)(a) (e faasino i le faamauina o kamupani mai fafo);

(xi) fuaiupu 160(3)(a) (e faasino i isi faamatalaga e ao ona tuuina mai e kamupani mai fafo);

(xii) fuaiupu 161(6)(a) (e faasino i le failaina o faamatalaga o tupe maua faaletausaga e kamupani mai fafo);

(xiii) fuaiupu 187(4)(a) (e faasino i pule a le Resitara e manaomia ai faamatalaga ma ata o pepa aloaia);

(xiv) fuaiupu 190(5) (e faasino i pule a le Resitara e asiasia ai);

(xv) fuaiupu 191(5) (e faasino i le faailoa atu o faamatalaga ma lipoti e maua mai a o faagasolo se suesuega).

(3) O se tagata ua faasalaina mo se solitulafono ua faamaonia faaletulafono e faasaga i so o se fuaiupu ua taua i lalo ua noatia i se faasalaga i le falepuipui mo se taimi e le sili atu i le fitu tausaga po o se faasalaga tupe e le sili atu i le \$100,000 po o faasalaga uma e lua -

(i) fuaiupu 198(1) (e faasino i faamatalaga pepelo);

(ii) fuaiupu 198(2) (e faasino i faamatalaga pepelo);

(iii) fuaiupu 199 (e faasino i le faaaogaina faasolitulafono po o le faaleagaina o meatotino a le kamupani);

(iv) fuaiupu 200(1) (e faasino i le suia faasolitulafono o faamaumauga);

(v) fuaiupu 200(2) (e faasino i le suia faasolitulafono o faamaumauga);

(vi) fuaiupu 201(1) (e faasino i le tauaveina o pisinisi i se faiga faasolitulafono);

(vii) fuaiupu 201(2) (e faasino i le tauaveina o pisinisi i se faiga faasolitulafono);

(viii) fuaiupu 202(4) (e faasino i tagata ua faasaina mai le faafoeina o kamupani);

(ix) fuaiupu 203(6) (e faasino i le aveeseina o faatonu mai o latou tulaga agavaa);

(x) fuaiupu 204(10) (e faasino i le aveeseina o ni tagata mai le faafoeina o kamupani);

(xi) fuaiupu 204(11) (e faasino i le faasaina i totonu o le ofisa o ni tagata e le Resitara mai le faafoega o le kamupani).

195. Faasalaga e mafai ona faaee atu i faatonu i mataupu tau i le tagata lava ia-(1) O se faatonu o se kamupani ua faasalaina i se solitulafono ua faamaonia faaletulafono e faasaga i so o se fuaiupu o lo o taua i lalo ua noatia i se sala tupe e le silia le \$1,000.00 -

(i) fuaiupu 13(5)(b) (e faasino i le faaogaina o le igoa o se kamupani);

(ii) fuaiupu 29(6) (e faasino i le toe faaolaina o sea e mafai ona toe faaolaina mai);

(iii) fuaiupu 39(5)(b) (e faasino i tusi faamaonia o sea);

(iv) fuaiupu 48(6)(b) (e faasino i faaiuga e le i faia ini fonotaga);

(v) fuaiupu 102(4)(b) (e faasino i noatiaga e tuuina atu ai pepa aloaia);

(vi) fuaiupu 109(6)(b) (e faasino i se manaoga e suia ai se ofisa faamauina o se kamupani).

(2) O se faatonu o se kamupani ua faasalaina i se solitulafono ua faamaonia faaletulafono e faasaga i so o se fuaiupu ua taua i lalo ua noatia i se sala tupe e le sili atu i le \$5,000. -

(i) fuaiupu 14(4) (e faasino i le talia ma le suiga o mataupu faamauina faaletulafono);

(ii) fuaiupu 20(3) (e faasino i noatiaga a le komiti faatino e auina atu ai se faasilasilaga o le tuuina atu o sea);

(iii) fuaiupu 25(5) (e faasino i le maua e se kamupani o ana lava sea);

(iv) fuaiupu 34(4)(b) (e faasino i le noatiaga e tausia se tusi resitala o sea);

(v) fuaiupu 52(4) (e faasino i tiute e auina atu o se lipoti faaletausaga i tagata e umia sea);

(vi) fuaiupu 70(3)(b) (e faasino i tiute e tuuina atu ai se faasilasilaga i le suiga o faatonu);

(vii) fuaiupu 83(4)(b) (e faasino i le suiga o mataupu faamauina faaletulafono e le Faamasinoga);

(viii) fuaiupu 96(3)(b) (e faasino i faamaumauga a le kamupani);

(ix) fuaiupu 97(3) (e faasino i le faiga o lo o teuina ai faamaumauga a le kamupani);

(x) fuaiupu 98(8)(b) (e faasino i nisi nofoaga mo le teuina o faamaumauga);

(xi) fuaiupu 100(2)(b) (e faasino i le asiasia o faamaumauga a le kamupani e tagata e umia sea);

(xii) fuaiupu 101(2)(b) (e faasino i le asiasia o faamaumauga e tagata lautele);

(xiii) fuaiupu 103(11) (e faasino i le noatiaga e failaina ai faamatalaga o tupe maua faaletausaga);

(xiv) fuaiupu 110(5) (e faasino i le tausia o faamaumauga o faamatalaga tau tupe);

(xv) fuaiupu 111(7) (e faasino i noatiaga e saunia ai faamatalaga o tupe maua ma tupe alu);

(xvi) fuaiupu 117(3) (e faasino i avanoa o suetusi i faamatalaga);

(xvii) fuaiupu 117(4) (e faasino i faamatalaga e talosagaina e suetusi);

(xviii) fuaiupu 118(2) (e faasino i le auai o suetusi i fono a tagata e umia sea);

(xix) fuaiupu 135(7) (e faasino i le faamaoniga o faatulagaga, tuufaatasiga, ma maliega fetuunai e le Faamasinoga);

(xx) fuaiupu 136(3) (e faasino i le pule a le Faamasinoga e faia ai poloaiga faaopoopo e fesootai ma le famaoniga o se faatulagaga, tuufaatasia po o se maliega fetuutuunai);

(xxi) fuaiupu 154(3)(b) (e faasino i le faaaogaina o igoa e kamupani mai atunuu i fafo);

(xxii) fuaiupu 155(6)(b) (e faasino i le faamauina o kamupani mai atunuu i fafo);

(xxiii) fuaiupu 160(3)(b) (e faasino i nisi faamatalaga e ao ona tuuina mai e kamupani mai atunuu i fafo);

(xxiv) fuaiupu 161(6)(b) (e faasino i le failaina o faamatalaga o tupe maua faaletausaga e kamupani mai atunuu i fafo);

(xxv) fuaiupu 187(4)(b) (e faasino i le pule a le Resitara e manaomia ai faamatalaga ma ata o pepa aloaia).

196. Puipuiga mo faatonu-(1) O se puipuiga mo se faatonu ua molia i se solitulafono e faasino i se tiute ua faaee atu i faatonu o se kamupani pe afai e faamaonia e le faatonu e faapea:

- (a) Ua faia e faatonu laasaga uma tatau ai ina ia mautinoa ai le tausisia o manaoga; po o
- (b) O ia (alii po o tamaitai) na faia laasaga uma na tatau ai ina ia faamautinoa ai le tausisia e faatonu o manaoga; po o
- (c) I le tulaga e faapea o ia (alii po o tamaitai) ua le mafai i se mafuaaga tatau ona tauaveina laasaga tatau e mautinoa ai o lo o tausisia e faatonu manaoga.

(2) O se puipuiga mo se faatonu ua molia i se solitulafono e faasino i se tiute ua faaee atu i se kamupani pe afai e faamaonia e le faatonu e faapea:

- (a) Na faia e le kamupani laasaga uma ua tatau ai ina ia faamautinoa ai le tausisia o manaoga; po o
- (b) Ua ia (alii po o tamaitai) faia laasaga uma ua tatau ai ina ia faamautinoa ai ua tausisia e le kamupani manaoga; po o
- (c) E tusa ai ma ia tulaga, o ia (alii po o tamaitai) ua le mafai i luga o se mafuaaga tatau ona tauaveina laasaga e mautinoa ai o lo o tausisia e le kamupani manaoga.

197. Tausalumaga mo solitulafono-(1) E ese mai ai so o se mea e feteenai ma le Tulafono o Tausalumaga Tau Solitulafono 1972, so o se faamatalaga mo se solitulafono i lalo o lenei Tulafono e mafai ona faataatia i so o se taimi i totonu o le tolu tausaga pe a tuanai le aso o le solitulafono.

(2) E leai se mea i totonu o fuaiupu 194 i le 196 e aafia ai se noataga o so o se tagata i lalo o so o se isi Tulafono, ae peitai e leai se tagata e mafai ona faasalaina i se solitulafono e faasaga i so o se fuaiupu ma se aiaiga o so o se isi Tulafono e tusa ai o le amioga lava lea.

198. Faamatalaga tau faasese-(1) O tagata uma o i latou ia, faasino i se pepa aloaia e manaomia e po o mo le faamoemoe o lenei Tulafono:

- (a) Faia, po o ua faatagaina le faia o, se faamatalaga sese po o taitaiina sese ai i se mau autu e faia ma le iloa e le moni po o lo o taufaasese; po o
- (b) Soloia, po o faatagaina le soloia mai i le pepa aloaia o, so o se mataupu ma le iloa lelei o le soloia o le mataupu ua faaseseina ai le pepa aloaia ma taitaiina sese ai se mau autu aemaise -
ua faia se solitulafono, ma ua noatia i se faasalaga i se solitulafono ua faamaonia faaletulafono i se faasalaga ua faataoto mai i le fuaiupu 194(3).

(2) O faatonu uma po o tagata faigaluega o se kamupani o i latou ia ua faia po o ua tuuina atu po o ua faatagaina po o ua faaavanoaina po o le tuuina atu o se faamatalaga po o se lipoti e faasino i mataupu a le kamupani ma e faapea e sese po o le taufaasese i se mea e faapitoa i:

- (a) Se faatonu, tagata faigaluega, suetusi, tagata umia sea, tagata e umia tusi faamaonia faaletulafono o aitalafu, po o tagata tausi mavaega mo tagata e umia tusi faamaonia o aitalafu a le kamupani; po o
- (b) Se tagata tau pulega, se tagata e faamaapeina faaletulafono, komiti o le faamaapeina, po o le tagata e taliaina po o le pule o meatotino a le kamupani; po o
- (c) Pe afai o le kamupani o se lala, se faatonu, tagata faigaluega, po o le suetusi o lana kamupani o lo o umia -

ua iloa lelei o lea mataupu e sese pe taufaasese, ua faia e ia se solitulafono, ma ua noatia i luga o se moliaga ua faamaonia faaletulafono i le faasalaga ua faatulaga atu i le fuaiupu 194(3).

(3) Mo le faamoemoe o lenei Tulafono, o se tagata ua palota mo le lagolagoina le faia o se faamatalaga i se fonotaga ua avea o se tagata ua faatagaina mo le faia o le faamatalaga.

199. Faaaogaina faasolitulafono po o le faatamaia o meatotino a le kamupani-(1) O faatonu uma, tagata faigaluega, po o tagata o lo o umia sea o se kamupani o i latou ia ua:

- (a) Aveeseina faasolitulafono po o faaoga meatotino a le kamupani mo lona ia (alii po o tamaitai) lava manuia, po o faaoga po o mo se faamoemoe e ese mai na i le faaoga po o faamoemoe o le kamupani; po o
- (b) Faaufiufi solitulafono i se faiga faasolitulafono po o faatamaia meatotino a le kamupani -
ua faia se solitulafono, ma ua noatia i se moliaga ua faamaonia faaletulafono e pei ona faataoto mai i le fuaiupu 194(3).

200. Faaseseina o faamaumauga-(1) O faatonu uma, tagata faigaluega, po o tagata umia sea a se kamupani o i latou ia ua faamoemoe e gaioia meatotino mai, po o faaseseina se tagata:

- (a) Faatamaia, aveeseina, faaleaga, suia, po o le faaseseina po o se vaega i le faatamaiaina, faaleagaina, suia po o le faaseseina o so o se tusi resitala, faamaumauga o faamatalaga tau tupe, api, pepa, po o isi pepa aloaia e patino pe faasino i le kamupani; po o
- (b) Ua faia po o ia o se tasi sa i ai i le faia o se faamaumauga sese i totonu o so o se tusi resitala, faamaumauga o faamatalaga tau tupe, tusi pepa, po o isi pepa aloaia e patino i le kamupani po o e faasino i le kamupani -
ua faia se solitulafono, ma ua noatia i se moliaga ua faamaonia faaletulafono i se faasalaga ua faataoto mai i le fuaiupu 194(3).

(2) O tagata uma o i latou ia e faasino i se masini, tulaga faaeletoroni, po o nisi faiga e faaoga e fesootai ma le teuina po o le saunia o so o se tusi resitala, faamaumauga o faamatalaga tau tupe po o isi faamaumauga, faasinoupu, tusi pepa, po o nisi pepa aloaia mo le faamoemoe o se kamupani po o lenei Tulafono:

- (a) Faamaumau po o le teu malu i se masini, po o ua faaavanoa i se tagata mai le masini, mataupu e faapea o lo o ia (alii po o tamaitai) iloa e sese pe taufaasese i se mataupu faapitoa; po o
- (b) Ua i ai le faamoemoe e faasese po o le tuuina atu o ni faiga e taitaiseseina ai so o se tusi resitala, faamaumauga o faamatalaga tau tupe po o ni faamatalaga, faasino upu, tusi, pepa, po o isi pepa aloaia faatamaia, avese po o faaseseina o mataupu faamauina po o lo o teuina i totonu o se masini, po o ua le usitaia le faamauina po o le teuina o so o se mataupu i totonu o se masini -
ua faia se solitulafono, ma ua noatia i se moliaga ua faamaonia faaletulafono i se faasalaga ua faataoto mai i le fuaiupu 194(3).

201. Tauaveina pea o pisinisi i ala faasolitulafono-(1) O tagata o i latou ia o lo o iloa o se vaega i se kamupani o lo o tauaveina ni pisinisi ma le faamoemoe e faasese tagata o lo o nofo aitalafu ai le kamupani po o so o se isi tagata po o se faamoemoe faasolitulafono ua faia se solitulafono ma ua noatia i se moliaga ua faamaonia faaletulafono i se faasalaga ua faataoto mai i totonu o le fuaiupu 194(3).

(2) O faatonu uma o le kamupani o i latou ia:

- (a) E ala i se faafoliga po o isi soligatulafono e faatosina ai se tagata e tuuina atu ai se aitalafu i le kamupani; po o
- (b) E i ai le faamoemoe e faaseseina ai faasolitulafono tagata e nofo aitalafu ai le kamupani -
 - (i) tuuina atu, faaliliuina, po o mafua ai se moliaga e tuuina atu i, meatotino a le kamupani a so o se tagata; po o
 - (ii) taulamua i le tuuina atu po o le faaliliuina o meatotino i so o se tagata; po o
 - (iii) taulamua po o o ia o se vaega o tagata i le faataunuuna o lea faiga faasaga i meatotino a le kamupani -
ua faia se solitulafono ma ua noatia i se moliaga ua faamaonia faaletulafono i se faasalaga ua faataoto mai i totonu o le fuaiupu 194(3).

**VAEGA XXIII
FAASAINA MA LE FAALEAOGAINA O FAATONU**

202. Tagata e faasaina mai le pulea o kamupani-(1)

Afai-

- (a) O se tagata sa molia i so o se solitulafono e faasino i le faatosina, faavaeina, po o pulega o se kamupani e faasalaina i le falepuipui mo se vaitaimi e le sili atu i le lua tausaga, e tusa pe ua nofosala i le falepuipui pe leai; po o
- (b) O se tagata ua faasala i se solitulafono i lalo o so o se fuaiupu 198 e oo i le 201 o lenei Tulafono po o i lalo o so o se aiaiga o le Vaega VIII o le Tulafono o Solitulafono 1961, e ese mai ai fuaiupu 112 po o 113 -

e le tatau i lena tagata i totonu o le lima tausaga ina ua tuanai le faasalaga po o le faaiuga ona avea o se faatonu po o se tagata e faatosina mo, po o i so o se auala, pe tuusao po o faaalatua, e aafia po o auai i le pulega o se kamupani, ae vagana ai e faapea o lena tagata ua maua mai le faatagaga i le Faamasinoga e ono mafai ona tuuina atu i luga o tuutuuga ma aiaiga e manatu le Faamasinoga o lo o talafeagai.

(2) O se tagata e faamoemoe e fia talosaga mo se faatagaga a le Faamasinoga i lalo o lenei fuaiupu e tatau ona tuuina atu i le Resitara e le i lalo ifo o le 10 aso faigaluega se faaaliga o le faamoemoe o lena tagata e fia talosaga.

(3) O le Resitara, ma nisi tagata e manatu le Faamasinoga e talafeagai, e mafai ona auai ma faalogoina i le fofogaina o so o se talosaga i lalo o lenei fuaiupu.

(4) O se tagata e faalavelaveina lenei fuaiupu, po o so o se poloaiga ua faia i lalo o lenei fuaiupu, ua faia se solitulafono ma ua noatia i se moliaga ua faamaonia faaletulafono i se faasalaga ua faataoto mai i totonu o le fuaiupu 194(3).

(5) I totonu o lenei vaega, o le upu, “kamupani” e aofia ai se kamupani mai atunuu i fafo o lo o tauaveina pisinisi i totonu o Samoa.

203. E mafai e le Faamasinoga ona faaleaogaina faatonu

-(1) Pe afai:

- (a) O se tagata na faasalaina i se moliaga ua faamaonia faaletulafono i so o se solitulafono e faasino i le faatosina, faavaeina, po o pulega o se kamupani e mafai ona faasalaina i le falepuipui mo se vaitaimi e le silia le lua tausaga, e tusa lava pe na faataunuuna le faasalaga pe leai; po o
- (b) Se tagata na faasalaina i se moliaga ua faamaonia faaletulaono i se solitulafono i lalo o so o se fuaiupu o le 198 e oo i le 201 po o i lalo o so o se aiaiga o le Vaega VIII o le Tulafono o Solitulafono 1961 e ese mai ai fuaiupu 112, po o 113; po o
- (c) O se tagata ua faia se solitulafono e noatia ai (pe a faasalaina pe leai) i lalo o lenei Vaega; po o
- (d) O se tagata ua avea ma se faatonu o se kamupani ma pe sa faamaonia faaletulafono le moliaga pe leai-
- (i) ua le usitaia i le tele o taimi le tausisia o lenei Tulafono po o le Tulafono o Kamupani 1955, po o, afai o le kamupani ua le usitaia le tausisia, le le usitaia i le tele o taimi e faia laasaga talafeagai mo le tausisia o tulafono; po o
 - (ii) ua faamaonia le solitulafono e faasino i le kamupani po o le solia o ona tiute i le kamupani po o se tagata umia sea; po o
 - (iii) le faia o ni gaoioiga matautia po o ni amio le tusa ai i le faatinoga o ona (alii poo tamaitai) tiute faa faatonu; po o
- (e) O se tagata ua faaletonu lona mafaufau - e mafai e le Faamasinoga ona faia se poloaiga e faapea o lenei tagata e le tatau, e aunoa ma se faatagaga a le Faamasinoga, ona avea ma se faatonu po o se tagata e faalauiloaina le kamupani, po o i so o se auala, tuusao pe faaalatua, aofia ai po o le galue i le pulea o se kamupani mo se vaitaimi e le silia ma le 10 tausaga e pei ona faamaoti mai i se poloaiga.
- (2) O se tagata o lo o faamoemoe e fia talosaga mo se poloaiga i lalo o lenei fuaiupu e tatau ona tuuina atu e le laititi ifo i le 10 aso faigaluega se faaaliga o lenei faamoemoe i le tagata e faasaga i ai le poloaiga ua sailia, ma i le fofogaina o le

talosaga e mafai e le tagata ua taua mulimuli ona sau ma fai lana molimau po o le valaauina mai o ni molimau.

(3) O se talosaga mo se poloaiga i lalo o lenei fuaiupu e mafai ona faia e le Resitara, le Tagata Aloaia e faaliliu i ai, po o le tagata e faamaapeina faaletulafono a le kamupani, po o se tagata o ia lea po o sa avea ma tagata umia sea po o sa nofo aitalafu ai le kamupani, ma i le fofogaina o le:

- (a) O se talosaga mo se poloaiga i lalo o lenei fuaiupu e le Resitara po o le tagata ua aloaia e faaliliuina i ai po o le tagata e faamaapeina meatotino; po o
- (b) O se talosaga mo se faatagata i lalo o lenei fuaiupu e se tagata o lo o faasaga i ai se talosaga i luga o se talosaga a le Resitara, le tagata ua aloaia e faaliliu i ai po o le tagata e faamaapeina faaletulafono meatotino -

o le Resitara, Tagata ua aloaia e faaliliu i ai po o le tagata e faamaapeina faaletulafono meatotino e tatau ona tulai ma valaau le Faamasinoga i so o se mataupu o lo o manatu ia (alii po o tamaitai) e talafeagai, ma e mafai ona tuuina atu molimau po o le valaau o ni molimau.

(4) E mafai ona faia se poloaiga i lalo o lenei fuaiupu e ui lava o le tagata o lo o aafia ai e ono noatia i solitulafono e faasino i mataupu e mafua ai ona faia le poloaiga.

(5) E tatau i le Resitara o le Faamasinoga, i le vave e mafai ai ina ua tuanai le faia o le poloaiga i lalo o lenei fuaiupu, ona tuuina atu i le Resitara se faaaliga e faapea ua uma ona faia le poloaiga ma e tatau i le Resitara ona tuuina atu se faasilasilaga faalauaitetele i le igoa o le tagata o lo o faia i ai le poloaiga.

(6) O tagata uma ua faia ni gaoioiga e faalavelaveina ai se poloaiga i lalo o lenei fuaiupu ua faia se solitulafono ma e noatia i se moliaga ua faamaonia faaletulafono i se faasalaga ua faataoto mai i le fuaiupu 194(3).

(7) I totonu o lenei fuaiupu, “kamupani” e aofia ai kamupani mai atunuu i fafo.

204. Faaleaogaina o tagata mai le puleaina o kamupani o i latou ia e i ai o latou sao i le gau o le kamupani-(1) O lenei fuaiupu e faasino i se kamupani:

- (a) Ua faataapeina faaletulafono talu ai ua le mafai ona totogi ana aitalafu i le taimi e tatau ai;
 - (b) Ua faamuta le tauaveina o se pisinisi talu ai ua le mafai ona totogi aitalafu i le taimi e tatau ai;
 - (c) E faasino i le faatinoga ua faafoi mai talu ai e le faamalieina atoa po o na o se vaega;
 - (d) E faasino i meatotino e faapea o se tagata e taliaina po o se tagata e taliaina ma se tagata pule, ua tofia e se faamasinoga po o e tusa ai ma le malosiaga i totonu o se pepa aloaia, tusa lava po o ua faamuta le tofiga pe leai;
 - (e) E faasino i lea po o meatotino e faapea, sa tofia ai se tagata mo le taliaina ma pulea, po o se pule faalefaamasinoga, po o se pule, po o le faatinoina o le vaai, i lalo o po o e tusa ai i so o se faatinoga o se tulafono, tusa lava po o ua faamuta le tofiga pe leai;
 - (f) E faapea ua faia se maliega fetuutuunai po o se fetuututunaiga ma tagata o lo o nofo aitalafu ai.
- (2) O lenei fuaiupu e faaoga i se kamupani ua maea ona faamaapeina faaletulafono tusa lava pe ua aveeseina mai le tusi resitala a Samoa pe leai.
- (3) Afai -
- (a) O se tagata sa, i totonu o le taimi e lima tausaga a o lumanai le tuuina atu o se faasilasilaga i lena tagata i lalo o le faafuaiupu (5) tusa lava po o lena vaiitaimi na amataina ao lumanai po o ua tuanai foi le faamamaluina o lenei Tulafono, o se faatonu o se, po o aafia ai, po o se tagata sa i ai sana vaega sa faia ai, le pulega o, se kamupani e faasino i ai le faaogaina o lenei fuaiupu; ma
 - (b) Le faiga sa faafoe ai mataupu o le kamupani ua avea ma vaega atoa po o se vaega foi o le faaogaina o lenei fuaiupu i le kamupani; ma
 - (c) O lenei tagata e i ai lona faailoga taua i le tauaveina o mataupu a le kamupani,
- e mafai e le Faamasinoga, i luga o se talosaga a le Resitara, ona faia se poloaiga e faapea o lena tagata e le tatau ona, e aunoa ma le faatagaga a le Faamasinoga, ona avea ma faatonu po o se

tagata e gafa ma faatosina a le kamupani, po o i se isi lava faiga, tuusao po o le faaalatua, e aafia ai, po ole faia o sana vaega i totonu o le pulega o le, se kamupani mo se vaitaimi e le silia le lima tausaga e pei ona faamaoti mai i totonu o le poloaiga.

O le Resitara, e tatau ona tuuina atu se faasilasilaga faalauaitele i le faia o so o se poloaiga i lalo o lenei faafuaiupu.

(4) Pe afai o se tagata sa, i totonu o le lima tausaga ao lumanai le tuuina atu o se faasilasilaga i lena tagata i lalo o le faafuaiupu (5) (e tusa lava pe o lena vaitaimi na amatatia ao lumanai po o ua tuanai foi le faamamaluina o lenei Tulafono), o se faatonu o, po o aafia ai, po o se tagata sa auai ai, le pulega o, lua po o le sili atu foi o ni kamupani o lo o faaaogaina i ai lenei fuaiupu, parakalafa (b) ma le (c) o le faafuaiupu (3) ua manatu ua faamalieina e tusa ai ma ia kamupani taitasi vagana ua faamalieina e lena tagata le Faamasinoga i se isi itu e ese mai ai.

(5) E le tatau i le Resitara ona faia se talosaga i lalo o le faafuaiupu (3) vagana:

(a) E le laititi ifo i le 10 aso faigaluega le faaaliga e faapea o le Resitara ua faamoemoe e faia sea talosaga ua tuuina atu i le tagata ma le Resitara e iloilo so o se talosaga ua faia e le tagata; ma

(b) O le Resitara e tofia se tausitusi a le Malo mo tagata lautele e fautuaina le Resitara e tusa ai i le faia o le talosaga. O lena tausitusi e ono toe tofia e sailiili i mataupu a le kamupani i lalo o le fuaiupu 190; ma

(c) O le tausitusi mo tagata lautele ua tofia i lalo o le parakalafa (b), ina ua tuanai le talanoaina o faamatalaga o lo o i aao o le Resitara, so o se faamatalaga e faia e le tagata o lo o aafia i le Resitara, ma afai e manatu le tausitusi e talafeagai ai, so o se faamatalaga ua faia e lena tagata i le tausitusi mo tagata lautele, ua fautuaina ai le Resitara e faapea i lona (alii po o tamaitai) manatu faatoma faapitoa -

(i) le faiga sa faafoe ai atoa po o nao se vaega o mataupu a le kamupani ua avea ma mafuaaga ua faaaoga ai lenei fuaiupu i le kamupani; ma

(ii) o lea tagata o lo o i ai sona faailoga taua o le gafa ma tulaga o lo o faafoe ai mataupu o le kamupani.

(6) Afai ua faia e le Resitara se talosaga i lalo o le faafuaiupu (3) e faasino i lena tagata, e mafai e le Resitara ona tuuina atu se faaaliga i lena tagata e faasa ai lena tagata mai le avea ma faatonu po o e avea ma tagata e faia faatosina, po o e aafia ai, po o e auai ai, tuusao pe faaalatua, i le pulega o, se kamupani o lo o talia le faaiuga a le Faamasinoga mo lena talosaga. E tatau i le Resitara ona tuuina atu se faasilasilaga faalauaitele o lena faasilasilaga.

(7) E leai se tagata ua tuuina atu i ai se faasilasilaga i lalo o le faafuaiupu (6) e mafai ona avea ma faatonu po o se tagata e gafa ma faatosina a le kamupani, po o aafia po o auai ai (tusa lava pe tuusao pe faaalatua) i le pulega o se kamupani.

(8) Pe afai o se tagata o ia lea ua tuuina atu i ai e le Resitara se faaaliga i lalo o le faafuaiupu (6) ua talosaga toe iloilo faasaga i le tuuina atu o le faaaliga i lalo o lenei Tulafono po o ua saili se iloiloga faalefaamasinoga o le faaaliga, e tumau pea le taualoa o le faaaliga ma lona aloaia ao talia le faaiuga o le talosaga po o le toe iloiloa, po o le a lava le tulaga e i ai.

(9) E mafai e le Resitara, ona tuuina atu e ala i se faaaliga; tusitusia i se tagata ua tuuina atu i ai se faaaliga i lalo o le faafuaiupu (6):

(a) Soloia lena faaaliga; po o

(b) Tuusaunoa lena tagata mai le faaaliga e faasino i se kamupani po o ni kamupani maoti, i ni tuutuuga e manatu ai le Resitara e talafeagai.

E tatau i le Resitara ona tuuina atu se faaaliga faalauaitele o so o sea faaaliga.

(10) O tagata uma ua faia ni gaoioiga e faalavelaveina ai se poloaiga i lalo o lena fuaiupu, ua faia se solitulafono ma e noatia i se moliaga ua faamaonia faaetulafono i se faasalaga ua faataoto mai i le fuaiupu 194(3).

(11) O tagata uma o i latou ua tuuina atu i ai se faaaliga i lalo o le faafuaiupu (6) e le usitaia le tausisia o le faaaliga ua faia se solitulafono ma e noatia i se moliaga ua faamaonia faaetulafono i se faasalaga ua faataoto mai i le fuaiupu 194(3).

(12) I totonu o lenei fuaiupu, “kamupani” e aofia ai kamupani mai atunuu i fafo o lo o tauaveina pisinisi i totonu o Samoa.

205. Noataga mo le solia o fuaiupu 202 po o le 203 po o le 204-(1) O se tagata ua galue e avea o se faatonu o se kamupani e faalavelaveina le fuaiupu 202 po o se poloaiga ua faia i lalo o le fuaiupu 203 ua noatia o ia i:

- (a) Se tagata e faataapeina meatotino a le kamupani mo aitalafu uma faatupulaia ua le totoaia a le kamupani; ma
- (b) Se tagata o lo o nofo aitalafu ai le kamupani mo se aitalafu i lena tagata ua faatupulaia e le kamupani;

ao avea lena tagata ma le sa faatinoina.

(2) O se tagata ua faia se gaoioiga e faalavelaveina se poloaiga i lalo o le fuaiupu 204 ua noatia o ia i:

- (a) Se tagata e faamaapeina faaletulafono meatotino a le kamupani mo aitalafu uma na faia e le kamupani e lei totoaina; ma
- (b) Se tagata o lo o nofo aitalafu ai le kamupani mo se aitalafu mo lena tagata o lo o nofo aitalafu ai le kamupani sa faia e le kamupani -

ao avea lena tagata ma le sa faatinoina.

VAEGA XXIV MEA UA SOLOIA MA TEUTEUGA

206. Soloia o le Tulafono o Kamupani 1955 – O le Tulafono o Kamupani 1955 ma le Poloaiga o Kamupani a Samoa 1935 ua soloia i le aso faatonuina.

VAEGA XXV MEA ESEESE

207. Tufaina atu o pepa aloaia i kamupani i taualumaga faaletulafono – O se pepa aloaia, e aofia ai se faasilasilaga tau faiga palota, samania, faasilasilaga po o poloaiga i so o

se tualumaga faaletulafono e mafai ona auina atu i se kamupani e faapea:

- (a) E ala i le auina atu i se tagata ua taua o se faatonu o le kamupani i le tusi resitala a Samoa; po o
- (b) E ala i le auina atu i se tagata faigaluega a le kamupani i le ofisa autu o le kamupani po o le nofoaga autu e fai ai le pisinisi; po o
- (c) E ala i le tuuina atu i le ofisa faamauina a le kamupani; po o
- (d) E ala i le auina atu e tusa ai ma so o se faatonuga e faasino i le tautua tuuina atu e le faamasinoga o lo o pulea tualumaga; po o
- (e) E tusa ai ma se feagaiga ua faia ma le kamupani; poo
- (f) E ala i le auina atu i se tuatusi mo le auina atu i ai e tusa ai ma le tulafono a le faamasinoga e pulea le tualumaga po o i se isi auala e mafai e se loia, e tusa ai ma na tulafono, e taua ai o le a talia e le loia lea auunaga.

208. Tufaina atu o isi pepa aloaia i kamupani – E mafai ona auina atu i se kamupani se pepa aloaia e ese mai ai se pepa aloaia i so o se tualumaga faaletulafono, e faapea:

- (a) E ala i so o se isi auala ua faataoto mai i parakalafa (a) po o le parakalafa (b) po o le parakalafa (c) po o le parakalafa (e) o le faafuaiupu (1) o le fuaiupu 207; po o
- (b) E ala i le lafo i le meli i le tuatusi o le kamupani; po o
- (c) E ala i le auina atu faa-fasimile i se numera o se telefoni o lo o faaoga mo le auina atu o pepa aloaia i le ofisa faamauina o le kamupani po o lona ofisa autu po o nofoaga autu o le pisinisi.

209. Tufaina atu o pepa aloaia i kamupani mai fafo i tualumaga faaletulafono-(1) E mafai ona auina atu i se kamupani mai atunuu i fafo o lo o i Samoa, se pepa aloaia e aofia ai se poloaiga, samania, faasilasilaga, po o se poloaiga i so o se tualumaga faaletulafono e faapea:

- (a) E ala i le auina atu i se tagata o lo o i ai lona igoa i le tusi resitala o kamupani mai atunuu i fafo, o ia o se faatonu o le kamupani mai fafo ma o ia o lo o nofo i Samoa; po o
- (b) E ala i le auina atu i se tagata o loo taua lona igoa i le tusi resitala o kamupani mai fafo o ia ua faatagaina e talia lea auaunaga e avea ai ma sui o le kamupani i atunuu mai fafo; po o
- (c) E ala i le auina atu i se tagata faigaluega o le kamupani mai fafo i le nofoaga o le pisinisi a le kamupani mai fafo i totonu o Samoa po o, pe a fai e sili atu i le tasi le nofoaga o le pisinisi o le kamupani mai fafo i totonu o Samoa, i le nofoaga autu o le pisinisi a le kamupani mai fafo i totonu o Samoa; po o
- (d) E ala i le tuuina atu e tusa ai ma so o se faatonuga faasino i le tufaina atu e pei ona tuuina mai e le Faamasinoga o lo o i ai le pule faaletulafono i tualumaga; po o
- (e) E tusa ai ma se feagaiga ua faia ma le kamupani mai fafo.

210. Tufaina atu o isi pepa aloaia i kamupani mai fafo–

(1) E mafai ona tufaina atu i se kamupani mai fafo se pepa aloaia, e ese mai ai i se pepa aloaia i so o se tualumaga faaletulafono e pei ona taua i lalo:

- (a) E ala i soo se auala ua faatulaga atu i le parakalafa (a) po o le parakalafa (b) po o le parakalafa (c) po o le parakalafa (e) o le faafuaiupu (1) o le fuaiupu 209; po o
- (b) E ala i le lafoina atu i le tuatusi o le nofoaga autu o le pisinisi a le kamupani mai fafo i totonu o Samoa; po o
- (c) E ala i le lafoina atu i le tuatusi o se tagata o lo o taua lona igoa i totonu o le tusi resitala i atunuu i fafo ua faatagaina e talia lea auaunaga i totonu o Samoa mo pepa aloaia e avea ai ma sui o le kamupani mai atunuu i fafo; po o

- (d) E ala i le auina atu i se masini fesi i se numera o le telefoni o lo o faaaogaina mo le auina atu o pepa aloaia i le fesi i le nofoaga autu o pisinisi a le kamupani mai fafo i totonu o Samoa.

211. Tufaina atu o pepa aloaia i tagata e umia sea ma tagata o nofo aitalafu ai le kamupani-(1) O se faasilasilaga, faamatalaga, lipoti, faamatalaga tau tupe, po o isi pepa aloaia e ao ina auina atu i se tagata e umia sea po o se tagata o loo nofo aitalafu ai le kamupani, o ia lea o se tagata moni e mafai ona:

- (a) Auina atu i lena tagata; po o
- (b) Lafo atu i le tuatusi o le falemeli o lea tagata; po o
- (c) Auina atu i le masini fesi i se numera o le telefoni o loo faaaogaina e lea tagata mo le feaveaia o pepa aloaia e ala i le fesi.

(2) O se faasilasilaga, faamatalaga, lipoti, po o isi pepa aloaia i se tagata e umia sea po o se tagata o nofo aitalafu ai le kamupani i so o se auala o le tufatufaina atu o pepa aloaia o lo o faasinomia i ai le fuaiupu 207 po o le fuaiupu 209, po o le a lava le tulaga e i ai.

(3) O se faasilasilaga, faamatalaga, lipoti, faamatalaga tau tupe, po o isi pepa aloaia e fia auina atu i se tagata umia sea, po o tagata o loo nofo aitalafu ai le kamupani po o se kamupani mai atunuu i fafo e mafai ona auina atu e ala i so o se auala o le auina atu o pepa aloaia o lo o faasinomia i ai le fuaiupu 207 po o le fuaiupu 209, po o le a lava le tulaga e i ai:

- (a) Auina atu i se tagata, o ia lea o le tagata ofisa autu o le itutino ua tuufaatasia faaletulafono; po o
- (b) Auina atu i se tagata faigaluega o le itutino ua tuufaatasia faaletulafono i le ofisa autu po o le nofoaga autu o le pisinisi a le itutino ua tuufaatasia faaletulafono; po o
- (c) Auina atu i se auala ua faatonuina e le Faamasinoga; po o
- (d) Auina atu e tusa ai ma se maliega ua faia ma le itutino ua tuufaatasia faaletulafono; po o
- (e) Lafo atu i le tuatusi o le falemeli a le ofisa autu o le itutino ua tuufaatasia faaletulafono; po o

- (f) Auina atu ise masini fesi i se numera o le telefoni o loo faaaogaina mo le feaveaia o pepa aloaia e ala i le fesi i le ofisa autu po o le nofoaga autu o le pisinisi a le itutino ua tuufaatasia faaletulafono.

212. Aiaiga faaopopo e faasino i le tufatufaina atu-(1)

I le noatia ma le fai fuafua i le faafuaiupu (2), mo le faamoemoe o fuaiupu 207 e oo i le 210:

- (a) Afai o se pepa aloaia e ao ina auina atu i se tagata moni, e tatau ona tufatufaina atu -
- (i) e ala i le tauaaoina atu o le pepa aloaia i le tagata; po o
 - (ii) pe afai e teena e le tagata le taliaina o le pepa aloaia, e ao ina iloa e le tagata ma ia tuuina ise nofoaga e faigofie ona uia e le tagata;
- (b) O se pepa aloaia ua lafoina i le meli e tatau ona mauaina i le 5 aso faigaluega talu ona lafoina i le meli;
- (c) O se pepa aloaia sa auina atu i le masini fesi e tatau ona mauaina i le aso faigaluega e sosoo ai ma le aso na auina atu ai;
- (d) I le faamaonia o se pepa aloaia ua lafoina i le meli, e taua tele le faamaoniga e faapea -
- (i) o le pepa aloaia sa lelei ona faatuatusi; ma
 - (ii) sa totogi uma totogi o le meli po o tau feaveaiga; ma
 - (iii) o le pepa aloaia sa lafoina i le meli:
- (e) I le faamaonia o se pepa aloaia ua auina atu i le masini fesi, e taua tele le faamaoniga e faapea sa lelei le auina atu i le tagata o loo aafia ai.

(2) Ua le avea e faapea sa tufatufaina atu, po o sa auina atu pe sa tuuina atu se pepa aloaia ise tagata, pe afai e faamaonia e lea tagata, e faapea e lei faapogai lea tagata i le le mauaina o le pepa aloaia i totonu o le taimi na faamaotiina mai.

213. Fesootaiga i tulaga aloaia-(1) E leai se mea i totonu o lenei Tulafono e manaomia ai se loia e tatala atu se fesootaiga aloaia.

(2) Mo le faamoemoe o lenei Tulafono, o se fesootaiga e taua o se fesootaiga taualoa pe afai:

- (a) O se fesootaiga faalilolilo pe tuufofoga po o le tusitusia, ua faia i le va -
 - (i) o se loia (alii po o tamaitai) i lona malosiaga faaloia ma se isi loia i lea lava malosiaga; poo
 - (ii) o se loia (alii poo tamaitai) i lona malosiaga faaloia ma lana paaga faipisinisi, -
- pe faia i se ala tuusao po o le faaalatua e ala i se sooupu; ma
- (b) Ua faia po o ua faatulai mai mo le faamoemoe o le mauaina po o le tuuina atu o fautuaga faaletulafono po o se fesoasoani; ma
- (c) Ua le faia po o ua le faatulai mai mo le faamoemoe o le faia po o le faateleina o le faia o se gaioiga faasolitulafono po o se gaioiga sese.

(3) Afai o se faamatalaga po o se pepa aloaia e aofia ai na o tupe totogi atu, tupe maua, tupe faalu, po o feuiaiga tau tupe a se tagata faapitoa (pe se loia po o sana paaga faipisinisi (alii poo tamaitai) po o so o se isi lava tagata), ua le o se fesootaiga aloaia pe afai o lo o aofia ai i totonu, po o ua aofia ai atoa po o se vaega o, se tusi, o faamatalaga tau tupe, faamatalaga po o isi faamaumauga ua saunia po o tausia e le loia e fesootai ma teugatupe faamavaega a le loia.

(4) E mafai e le Faamasinoga, i luga o se talosaga a so o se tagata, ona fuafuaina po o aoga pea se talosaga mo se tau tau fesootaiga aloaia pe leai ma e mafai, mo lena faamoemoe, ona manaomia le faamatalaga po o se pepa aloaia ina ia tuuina mai.

(5) Mo le faamoemoe o lenei Tulafono, o le fuaitau “loia faaletulafono” o lona uiga o se loia po o se loia o le Faamasinoga Sili, (Barristers & Solicitors) ma o faasinomaga i se loia faaletulafono e aofia ai se kamupani o lo o ia (alii poo tamaitai) galue faapaaga ai po o lo o faamoemoe e avea ma paaga.

214. Tulafono faatonutonu – E mafai e le Ao o le Malo, ona faia i luga o le fautuaga a le Kapeneta, ni tulafono faatonutonu mo faamoemoega uma po o so se faamoemoe e pei ona taua i lalo:

- (a) Faatonuina ai pepa mo le faamoemoe o lenei Tulafono; ma o na tulafono faatonutonu e manaomia ai -
 - (i) le aofia ai i totonu, po o le faapipiina i ai o, pepa o faamatalaga maoti po o pepa aloaia;
 - (ii) pepa mo le sainia e tagata faapitoa;
 - (b) Faatonuina manaoga, e tausisia ai lenei Tulafono, o loo auina atu ia, pepa aloaia mo le faamauina ina ia tausisia;
 - (c) Aiaia ai isi mataupu e pei ona mafaufauina e poo talafeagai mo le taunuuga i aiaiga o lenei Tulafono faatasi ma lona faafoeina.
-